

**Ҳамидулла Дадабоев**

**АМИР ТЕМУРНИНГ  
ҲАРБИЙ МАҲОРАТИ**

Тошкент  
«Езувчи» нашриёти

УЗБЕКИСТОН РЕСПУБЛИКАСИ ФАЙЛАР АКАДЕМИЯСИ  
ҲАМИД СУЛАЙМОНОВ НОМИДАГИ ҚҰЛЕЗМАЛАР  
ИНСТИТУТИ

Масъул мұхаррир:

Узбекистон Республикаси Файлар  
академиясининг академиги  
Азизхон ҚАЮМОВ

Д 4702620204—5  
М 362 (04) — 96 41—1996.

© Х. ДАДАВОЕВ, «Езувчи  
нашриёти, 1996 й.

ISBN—5—8255—0341—2

## БЮОК САРКАРДА

Демократик жамиятнинг халқаро миқёсда эътироф этилган тамойиллари асосида ривожланиши ва тараққий этиш йўлига дадил қадам қўйиб, ўз миллий давлатчилигини қайта тиклаётган келажаги буюк Мамлакатимиз бу борада умумбашарий тараққиётга, бошқа халқлар эришган тажрибаларга, айниқса, ижтимоий қадриятларга сунямоғи лозим.

Ўзбекистон Республикаси Президенти Ислом Каримов таъкидлаганидек: «Бугун бизнинг олдимиздан шундай тарихий имконият пайдо бўлдики, биз босиб ўтган йўлимизни танқидий баҳолаб, миллий давлатчилигимиз негизларини аниқлаб, буюк мамлакатимиз томирларига, қадимий меросимиз илдизларига қайтиб, ўтмишдаги бой анъанааларни янги жамият қурилишига тадбиқ этмоғимиз керак»<sup>1</sup>.

Ўзбек халқи довругини бутун дунёга таралишида ўзининг бетакрор даҳоси билан жаҳон тафаккур ва маданият хазинасининг бойиб, тақомиллашиб боришига бебаҳо улуши қўшган И мом Бухорий, Абу Наср Форобий, Абу Райхон Беруний, Ибн Сино, Хожа Аҳмад Яссавий, Хожа Баҳоуддин Нақшбанд, Амир Темур, Алишер Навоий, Заҳирiddин Бобур, Бобораҳим Машраб, Абдулла Қодирий сингари атоғли ажоддларимизнинг ўрни ва роли бекиёсdir.

1996 йили таваллудининг 660 йиллиги улкан тантаналар ва кўтарилик руҳ билан нишонланиши кутилаётган, XIV асрнинг ўрталарида сиёсий майдонга чиқиб, Мовароунахрда бир ярим аср давом этган мӯғул хонлари зулми ва истибодига барҳам берган, ижтимоий, иқтисодий, сиёсий, ҳарбий жиҳатдан кучли, марказлашган, мустақил давлат барпо этишдек олий мақсадга бор куч-гайратини, билимини, истеъодини, қобилиятини бағишлаган, ўз тояларининг ушалиши йўлида, Даشتி Қипчоқ, Жата, Хоразм, Хиндистон, Эрон, Ироқ, Шом, Кавказ, Кичик Осиё, Миср каби мамлакатлар ва юртларга ҳарбий юришлар қилиган улуг саркарда, давлат арбоби Ҳазрати Соҳибқирон Темурбек Кўрагоннинг ҳаёти ва фаолияти мана бир неча юз йиллардан бери тарих саҳифаларидан ўрин олиб келмоқда.

МАНГИСТАУСКОИЯНИНГ СИЁСИЙ-ИЖТИМОИЙ ВА ИҚТИСОДИЙ ИСТИҶБОЛИЧИЙ АСОСИЯ ТАМОЙИЛЛАРИ. Президент Ислом Каримовнинг Ўзбекистон Республикаси Олий Мажлиснинг биринчи сессиясидаги маърузасон, Ҳаёт сўзи, 24 февраль, 1993 й.

Шарқ ва ғарб тилларида буюк тарихий сиймо Темурбек тарихига оид солномалар, адабий-бадиӣ, илмий асарлар вужудга келди. Жаҳонгир ҳақидаги ҳар доим ҳам реал тарихий воқеаликка мос келавермайдиган турли-туман афсонга ҳамда ривоятлар тўқи-либ, машриқу магрибга тарқалиб кетди.

Сир эмас, совет тарихшунослиги, сиёсатишунослиги ва адабиёт-шунослигига Соҳибқирон ҳаёти ва фаолияти, у яратган марказлашган давлатнинг туб моҳияти, боин гояси, ижтимоий, сиёсий, иқтисодий, маданий, диний нуқтаи назардан жаҳон тараққиётида туттган ўрни ва аҳамияти аксарият ҳолларди ҳукмрон маркечаленичча дунёқараш замирида сохталаширилди, мазмуни жўрттага бузиб талқин қилинди.

Истиқлол туғайли республикамиизда содир бўлаётган туб демократик ўзгариш ва қайта қуриш жарабии Темурбекнинг туркий халқлар давлатчилиги анъанааларини, тажрибаларини, ислом ҳамда шариат қонув-қоидаларини барро этилган қудратли давлатнинг асосий дастури қилиб, ўз сиёсати ва ҳукимишини жуда кенг минтақаларига ёйғанилиги ҳақидаги бор ҳақиқатини бекаму кўст билишга, рўй-ростанглаб этишга имконийт яратди.

Бутун онгли умрими «рости расти», яъни «ҳақ бўлсанг, најот тоиласан», «куч-адолатда» сингари ишсоншарварлик руҳи билан йўғрилган шиорларга суняган ҳолда сиёсат юритишга сарф қилгац Темурбекнинг табиат инъом этган ақл-заковат, қобилият ва ҳарбий маҳоратни ишга солиб, давлатни идора қилиш усул ҳамда услублари андозаларини белгилаб бериш борасидаги сатъ-хара-катлари, илгари сурған Фикр-мулоҳазалари ўз ўтмишига янгича наэар билан ёндошаётган бугунги авлод томонидан ҳар томонлама мута-чуқур илмий асосда ўрганилмоги, ижтимоий фан соҳалари мута-хассислари олиб боражак тадқиқотлар учун мавзу бўлмоги керак.

Бизнингча, Темурбек асос соглган марказлашган юрик феодал жамият ва у олиб борган сиёсат тўғрисидаги холис фикрни сиёсат-шунослар, ҳуқуқшунослар, тарихчилар, иқтисодчилар айтгани мақсадга молик.

Биз эса кенг китобхонлар афкор оммасига ҳавола қилинаётган ушбу рисолада Темурбекнинг жаҳоншумул обрў-эътибор ва шоншуҳрат тонишида боин омил ҳисобланган жиҳат, яъни саркардалик истеъодиди, ҳарбий маҳорати, жаҳон ҳарб санъати ривожига кўшган улкан ҳиссаси хусусида машибаларда қайд этилган аниқ маълумотларга таянган тарзда ўз мулоҳазаларимизни баҳоли қудрат билдирамоқчимиз, холос.

Мұхтарам ўқувчиларимизни ушбу рисолада Соҳибқирон исми-нинг Амир Темур эмас, балки Темурбек шаклида берилиши албатта, қизиқтираса керак. Бу борада ўзини алоҳида таъқидлаш лозим бўладики, Мовароуннаҳрда туркнида битилган асарларнинг деярли барчасида жаҳонгирнинг муборак номи ушбу рисолада келтирилган шаклида қайд этилган. Захириддин Мұхаммад Бобур ўзининг машҳур «Бобурнома» асарида Соҳибқирон номини ўттиз марта тилга олар экан, бирор марта ҳам Амир Темур демасдан Темурбек деб юритади. Ушбу ҳолатни биз Алишер Навоий асарларида, Мұхаммад Солиҳнинг «Шайбонийнома» достонида, муаллифи номаълум «Таворихи гузида. Нурсратнома» (XVI) сингари ёзма обидаларда кузатишимиз мумкин.

Соҳибқироннинг биз келтираётган тарзда номланишини у зот барҳаётлигига ёзилган ҳужжатлар, кундайлар ҳам тасдиқлайди. Жумладан, 1403—1406 йиллар давомида Самарқандда расмий

ташриф билан бўлган Испания элчиси Руи Гонсалес де Клавихо Соҳибқироннинг ҳақиқий номи Темурбек эканлигини қайд этиб ўтади.<sup>1</sup>

Англия қироли Генрих IV нинг 1402 иили, Франция қироли Карл VI нинг 1403 йил 15 июнида Соҳибқиронга йўллаган мактубларида ҳам Жаҳонгирнинг номи Темурбек шаклида келтирилади.<sup>2</sup>

Юқорида зикр этилган ашёвий далиллардан келиб чиқсан ҳолда буюк юртошишимизнинг исмини аксарият форсий адабиётда қайд этилган, Эрон ва Турон халқлари орасида шуҳрат топган Амир Темур шакли билан бир қаторда Темурбек шаклида қўллашп ҳам мақсадга мувофиқдир.

---

<sup>1</sup> Қаранг: *Руи Гонсалес де Клавихо. Дневник путешествия в Самарканد ко двору Тимуру [1403—1406].* Перевод со староиспанского. М., Наука. 1990, б. 69.

<sup>2</sup> Қаранг: *И. Умияков. Из истории международных отношений Средней Азии с западной Европой в начале XV в.* М., 1960. б. 7, 8.

## ИСТЕДОДНИНГ САЙҚАЛ ТОПИШИ

Темурбек иби Тарагай иби Абагай 1336 йилнинг 9 априлида Мовароуиннаҳрининг тўзал шаҳарларидан бири бўлмиш Кеш (ҳозирги Шаҳрисаба) га қарашли Хўжа Илгор қишилогида дунёга келди<sup>1</sup>.

Темурбек ёшлик чогидан ҳарб ишига ўзгача муҳабат ва эҳтирос билан қарай бошлади. Унда ҳарбий санъатга бўлган қизиқишининг ўта эрта пайдо бўлишида шадари бузруквори, амир Қазаган (1358 йили шаҳид бўлган) давлатнинг арконларидан бири, мардлиги, шижоати ва олижаноблиги билан ном чиқарган амир Тарагайнинг (1360 йили вафот этган) маълум даражада таъсири борлиги шубҳасиз.

Навқирон ёшга етган Темурбек салкам бир ярим асрлик мўтуллар истибодига чек қўйиш, феодал тарқоқлик натижасида Чигатой улусида ҳукм суроётган ўзаро низолар ва урушиларга барҳам берини, таини ва ички зугум туфайли тиикаси қуриган халқ оммасига мадад қўлини чўзиши, хароб бўлган шаҳар ва қишлоқларни қайта обод қилиш, улусни ташқаридан бўладиган босқицлардан ҳимоя қилиш сингари олижаноб мақсадларни юзага чиқаришнинг бирдан-бир йўли — ҳокимиятни қўлга киритиш эканлитини яхши англаб етади. Яқин йиллар ичida рӯёбга чиқажак режалари ҳақида Темурбек аввалдан уни қўллаб-қувватлаган, кейинчалик эса унинг садоқатли ва ишончли бек ҳамда саркардалари қаторидан ўрин олган Аббос, Довуд, Қўумари, Муайяд, Сайфуддин, Сарибўға,

<sup>1</sup> Қаранг: *Иbn Арабшоҳ. Ажойиб ал-мақдур фи тарихи Таймур [Темур тарихида тақдир ажойиботлари]* Тошкент. Меҳнат, 1992. 6-б; *Ruy Gonçalves de Клавихо. Дневник путешествия ко двору Тимура в Самарканد в 1403—1406 годах. Подлинный текст с переводом и примечаниями И. И. Срезневского. СПб, 1881, б. 238. Якубовский А. Ю. Тимур [опыт краткой характеристики] Вопросы истории. 1946. № 8—9. б. 53.*

Идику Темур, Жаку каби төнгүрлари билан очиқдан-очиқ ўртоқлашар эди. Дўстларий Темурбекнинг яқин кезларда давлатни әгаллаши, жуда катта ҳудудда барно этиладиган кучли салтанатга асос солиши, атоқли саркарда бўлиб етишишини олдиндан сезгандай ўзларини унга яқин тутар, у бел боғлаган жуда масъулиятли ва шарафли ишга киришишда мададкор бўлишларини рўй-рост баён қиласардилар.

Темурбек қасд қилган юмушни ниҳоясига етказишда унга таянч ва суюнч бўлишга аҳд қилган, шодлик онларини ёки заҳмат азобларини у билан баҳам кўришга, оғир дақиқаларда ундан юз ўғирмасликка қасамёд қилган биродарларининг бегараз кўмаги ва айниқса, мўғул босқинчилари зулмидан азиат чеккан Мовароуннаҳр халқи барча табақаларининг қўйлаб-қувватлаши ҳамда бевосита иштирокида 1370 йили ҳокимиётни қўлга олиш, Шимолий Анадўли, Ҳиндистон каби минтақаларга бир лигидан маҳрум бўлган мамлакатни бирлаштириш, истиқлолни қайта тиклаш бахтига муяссар бўлади.

Темурбек таҳтга ўтириш боиси ўлароқ ижтимоий, сиёсий, иқтисодий ҳаётда содир бўлган ижобий ўзгаришлар ўз ифодасини ҳарб ишида ва ҳарбий санъатда ҳам намоён этади.

Асосий карвон йўллари устидан назораৎ ўрнатиш<sup>1</sup>, улус қудратини янада ошириш, халқ турмуш тарзини яхшилаш сингари устувор мақсадлар йўлида Темурбек ўша даврда тенги йўқ ҳарбий кучлари билан Жата, Эрон, Афғонистон, Кавказ, Ироқ, Шом, Миср, Дағити Қипчоқ, Шимолий Анадўли, Ҳиндистон каби минтақаларга бир неча бор қўшин тортиб борди, оламшумул зафарлар қучди.

Ҳарб тарихи Темурбекни жаҳоннинг энг буюк саркардаларидан бири сифатида, ҳақли равишда, тан олади.

Унинг ҳарбий истеъоди асосан икки йўналишда: мондир ҳарбий ташкилотчи ва атоқли саркарда тарзида ёрқин намоён бўлди<sup>2</sup>.

<sup>1</sup> Қаранг: Самарканд при Тимуре и тимуридах. Очерк А. Ю. Якубовского с двадцатью автотипиями. Л., 1933, б. 13, 15-16.

<sup>2</sup> Қаранг: Муминов И. М. Роль и место Амира Тимура в истории Средней Азии. Ташкент, 1968, б. 28—29, Граков Б. Д., Якубовский А. Ю. Олтин Ўрта ва унинг қулаши. Тошкент, 1956, 288—318 б. Автобиография Тимура. Богатырские сказания о Чингизхане и Аксак-Тимуре. М.—Л., 1934; Иванин М. И. О военном искусстве и завоеваниях монголо-татар и среднеазиатских народов при Чингиз-хане и Тимурлане. СПб., 1875; А. Ю. Якубовский Тимур... б. 68.

Буюк лашкарбоши ва новатор ҳарбий ташкилотчи сифатида Темурбек ўта интизомли армия тузишга, муҳораба чоғида қўшин қисмларини санъаткорона бошқаришга, жанг тақдирни ҳал бўладиган жойларга ҳарбий кучларни ўз вақтида усталик билан йўллашга, ҳар қандай тўсиқ ва ғовларни тадбиркорлик билан босиб ўтишга, армиядаги жанговар руҳни керакли даражада ушлаб туришга мусассар бўлди.

Соҳибқирон турк-мўгул халқлари, хусусан Чингизхон лашкари тузилишини, уларниң жанг олиб бориш амалларини атрофлича ўрганиб, таҳлил қиласиди ва зарур ўзгаришишлар киритади.

Темурбек барпо этган армиянинг тузилиши Чингизхон тузган қўшин тизими ва тузилишига маълум дарајада яқин бўлса-да, бироқ қуийидаги муҳим жиҳатлари билан фарқланар эди:

1. Чингизийлар қўшини ялни мажбурият асосида ҳарбий хизматга чиқариладиган халқ лашкаридан иборат бўлган ҳолда, Темурбек армияси умумхалқ характеристига эга эмас эди.

2. Чингизхон даврида қўшин асосини кўчманчи омма ташкил қилган эди. Темурбек қўшинига олий бош қўмондан кўрсатган аниқ талабга биноан чорвадорлар қатори косибчилик, ҳунармандчилик, деҳқончилик билан машгул ўтроқ аҳолидан ҳам сезиларли миқдорда аскар олинган<sup>1</sup>.

3. Темурбек қўшинида ҳарбий кучлариниг асосини ташкил қилувчи отлиқ аскарлар билан бир қаторда пиёдалардан тузилган қисмлар ҳам анчагина бўлган. Маълумки, Чингизхон қўшини, забт этилган мамлакатлар аҳолисидан мажбурий тартибда тузилган ҳашарни ҳисобга олмагандা, ишёда аскарларга эга бўлмаган.<sup>2</sup>

4. Темурбек Шарқда бирничилардан бўлиб ўз армиясига ўт сочар қурол, яъни тўп-раъдни олиб кирди.<sup>3</sup>

5. Соҳибқирон тогли ҳудудларда жанг ҳаракатлари олиб борувчи пиёдалардан тузилган маҳсус ҳарбий қисмларни ташкил қилди.

<sup>1</sup> Каранг: Греков Б. Д., Якубовский Ю. А. Олтин Ўрда... 293 б.

<sup>2</sup> Каранг: История народов Узбекистана. Т. 2. М., 1947. с. 362, Греков Б. Д., Якубовский А. Ю. Олтин Ўрта... 293 б; Якубовский А. Ю. Тимур... б. 70.

<sup>3</sup> Каранг: Беленицкий А. М. О появлении огнестального оружия в Средней Азии и Иране в XIV—XVI вв. //Известия АНССР, Таджик. филиал. Сталинабад. 1949.

6. Темурбек жаҳон ҳарб санъати тарихида биринчи бўлиб қўшинни жанг майдонида етти қўлга бўлиб жойлаштириш тартибини жорий этди.<sup>1</sup>

7. Темурбек армиясида аёллардан тузилган бўлинмалар бўлиб, улар жанг чоги эркаклар билан бир сафда турган, қаҳрамонлик ва матонат намуналари кўрсатган.<sup>2</sup>

Темурбек қўшини ҳарбиини Мовароуннаҳр, Даҳти Қинчоқ, Хурросон, Эрон, Бадахшон, Мӯгулистон, Хоразм, Мозандарон, Жата сингари ерлардан йигилган аскарлар ташкил қиласиди.

Унда мунтазам қўшинга хос бўлган кўпгина белгилар мавжуд эди: қўшин сон жиҳатдан аниқ ва пухта ташкил қилинган, унинг жанговар тартиби — ясол жангдан-жангга такомиллаштирилиб борилган, армия ўз замонасининг илгор қурол ва техникаси билан қуролланган, айнан бир турдаги қурол-яроғ, аслаҳа-анжом билан таъминланган, қисмлар бир-биридан кийим боши, тутган байроқ ёки туғи орқали ҳам фарқланган.<sup>3</sup> Бундай ажралиб туриш жанг пайтида қўшинни бошқаришда жуда қўл келган.

Душман мудофаасини турли усуслар ёрдамида барбод қилиш, ганим томоннинг йирик ва мустаҳкам мудофаа иншоотларига эга бўлган шаҳарларига қўйқисдан кучли зарба бериш, забт этилган мамлакатнинг бошликларини ва, айниқса, лашқарбошиларини ҳибсга олиш, қалъа ҳамда қўргонларни узоқ муддат давомида муҳосара қилиш, ёв кучларини иложи борича кенг қамровда қуршаб олиш, унинг қишлоқ, шаҳар, туман, вилоятларини бирин-кетин фатҳ этиш, душманни батамом яксон этгунга қадар таъқиб қилиш, фатҳ бўлган юртларни бошқариш учун ўзининг ишончли вакилларини тайинлаш сингари стратегик мақсадларини кўзлаб иш юритиш Темурбекка кўплаб зафарлар олиб келди.

Тактика жиҳатдан Темурбек армияси ўзига хос хусусиятларга эга эди. Қўшиннинг ясоли Қораҳонийлар, Ғазнавийлар, Салжуқийлар, Чингизийлар қўшини жанговар тартибидан фарқли ўлароқ, етти қисм — қўлга ажратилган, разведка аъло даражада йўлга қўйилган, қисмларнинг жанг майдонида ҳамда юриш вақтида талаб да-

<sup>1</sup> Қаранг: Якубовский А. Ю. Тимур... б. 70.

<sup>2</sup> Қаранг: Ибн Арабшоҳ. Кўрсатилган асар... II китоб, 99—100 б.

<sup>3</sup> Қаранг: Разин Е. А. История военного искусства. т. II, М., 1957, б. 234.

ражасида ҳаракат қилиши учун зарур тадбир ва режалар ишлаб чиқилган, уларни жанг пайтида оператив бошқаришга алоҳида катта эътибор қаратилган. Темурбек *ўнлик*, *юзлик*, *минглик* ҳамда *туман* қўмондонларини танлани масаласига бевосита раҳбарлик қилган. Йашкарбошилик салоҳиятига әга бўлган кўмондонларнинг тўғри танлангалиги ва ўз жойига қўйилганлиги аксар ҳолларда жанг натижасининг муваффақиятли якунлашишiga сезиларли таъсир кўрсатган.

Соҳибқироннинг ҳарб санъети ривожига қўшган улкан хизматларидан яна бири — қўшин қанотларини жанг чоғида душман ҳужумидан муҳофаза қилиш ва аксинча ганим кучларини ёп томондан айланаб ўтиб, унга ортдан зарба бериш мақсадида тузилган отлиқ қисм — *кунбул*|| *кумбул*нинг жорий этилишидир. Бундай мутлақо янги ҳарбий қисм, тарихнинг гувоҳлик беришича, Александр Македонский, Ганнибал, Людвиг XIV, Буюк Фридрих, Чингизхон каби донгдор саркардалар қўшинида бўлмаган. Факат XIX асрнинг атоқли лашкарбошиси Наполеон Бонапарт армиясининг жанговор тартибида қўшин қанотларини ҳимояловчи қисм мавжудлигини кузатиш мумкин. Ҳарбий мутахассисларнинг, Наполеон Шарқ мамлакатларига ҳарбий сафар қилишдан аввал Темурбек армияси тузилишини, унинг жанг олиб бориш йўлйуриқларини синчилаб ўрганган, зарур топган тактик усулларни ўзлаштиргап деган мулоҳазаси, ҳар қалай, ҳақиқатдан йироқ эмас.<sup>1</sup>

Хўш, турк-мўгул ҳалиqlари армиясининг беш қисмдан иборат анъанавий жанговар тартибига ўзгартириш қачон киритилди, яъни ясолни етти қисмга бўлишга Соҳибқиронни қандай зарурият мажбур этди, деган саволнинг туғишини табиий.

Ушбу саволга қониқарли жавоб олиш учун Темурбекнинг Балх ҳокими амир Ҳусайн (1370 йили ўлдирилган) билан иттифоқида 1365 йили Жата (Мўғулистан) хони Илёсҳожага қарши қилган, тарихга «Лой жанг» номи билан кирган муҳорабада иттифоқдошлар *чериги* қандай ясолда жойлашганлигини кузатиш керак бўлади.

Йириқ қўшин билан Мовароунаҳрга бостириб кирган Илёсҳожа ҳужумини даф этиш мақсадида Темурбек ва амир Ҳусайн черик жамлайдилар.<sup>2</sup> Амир Ҳусайннинг

<sup>1</sup> Қаранг: *Иванин М. И. О военном искусстве. ... б. 163.*

<sup>2</sup> Қаранг: *Шарафиддин Али Яздий. Зафарнома, Тонкент, Камалак, 1994 й., 103—113 бетлар.*

сипоҳи Чиноз ва Тошкент оралиғидаги сув бўйини ўз қўнимгоҳи қилиб турған Темурбек қўшини билан қўшилади ва белгиланган будал — яъни, позицияларига тушиди. Илёсҳожа сипоҳи ҳам Бодом суви ёқасига ўрнашади. Муҳолиф томон қоровулларининг назари бир-бирағига тўқнаш келгач, ҳар икки томон байроқларни ҳилпиратиб, дўмбирапларни гумбирлатиб, сафларни ростлайдиlar. Амир Ҳусайн барангарга бошчилик қиласиди. Барангарнинг қунбулида арлат қабиласининг вакили Тиланчи, илгор қисм — ҳиравулда Улжайтий апарди, Шер Баҳром, Пўлатбўға, Фарҳод апарди, Малик баҳодир ва ўзга номдор баҳодирлар жойлашади. Жувангарга Темурбек қўмандонлик қиласиди, унинг қунбулида Сарибуға-қипчоқ қавми билан туради. Ҳиравулда эса Темурхожа ўғлон тайинланади. Марказ — қўлда амир Жаку, амир Сайфуддин, амир Мурод барлос, Аббос баҳодир ва бошқа атоқли баҳодирлар жаигга шай бўлиб туради. Баёндан Темурбек ва амир Ҳусайн черигининг ясоли барангар, жувангар, қўлдан иборатлиги, шу билан бирга барангар ҳамда жувангарнинг ҳар бири қўшимча аскари қисм-қунбул ва ҳиравулга эга бўлганлиги равшан бўлади. Бу ясолнинг нисбатан заиф томони шундан иборат бўлганки, барангар ва жувангарга қараганда қўл анча кучсиз бўлган, унинг на илгор қисми, яъни, ҳиравули, на қўмакчи захира қисми ҳам бўлмаган.<sup>1</sup> Шарафуддин Али Яздий иттифоқчилар лашкарининг сон жиҳатдан ганим сипоҳидан зиёд бўлганлигини таъкидлаб ўтади. Жанг бошланиш арафасида кучли жала қуйиб, жанг майдони лой бўлиб кетади. Намгарчиликнинг ҳаддан ташқари кучлилигидан кийим-кечак ва асбоб-анжом шу даражада оғирлашадики, ниёдада ҳам, отлиқда ҳам қимирлашга мажол қолмайди. Жата лашқари бошларига кигиз ёнишиб, кийим-кечак ҳамда қурол-яргони ёмғирдан пана қиласидилар. Иттифоқчилар қўшини уларга яқинлашиши билан жаталиклар кигизлар остидан чиқиб, дам олиб турган отлар билан жаигга ташланадилар. Темурбек ёвнинг амир Ҳамид ва унинг биродари Шангум нўён сардорлик қилаётган барангарига шикаст етказади. Аммо рақибнинг Шировул ҳамда Ҳожибек қўмандонлигидаги қунбули иттифоқчилар барангари қунбулидан устун келди ва унинг сердори Тиланчини қувлаб, ўнг қўлда турган амир Ҳусайн қошигача олиб боради. Саросима-

<sup>1</sup> Қаранг: Якубовский А. Ю. Тимур... б. 70.

га тушган амир Ҳусайн аскарлари қочишга юз тутади ва тарқалиб кетади. Лашкарнинг ўнг қанотидаги вазиятдан хавотирга тушган Соҳибқирон ўз қўл остидаги ўн етти фавж билан амир Шамсуддин бошчилигидаги ғаним қисмга кучли зарба беради ва уни тўзитиб юборади. Қўлга киритилган ютуқни мустаҳкамлаш йўлида Соҳибқирон амир Ҳусайн ҳузурига чонар юбориб, биргалашиб душманнинг асосий кучларига ҳужум қилишни таклиф этади. Бироқ, мутаккаббир амир Ҳусайн: «Бу жангда ҳеч тиришиш керак эмас ва бу борада ортиқча уринмаслик лозим»,— деб жавоб қайтаради. Эртаси жанг давом эттирилади ва Жата лацкари маглубиятга учраб, қочишга тушади. Иттифоқчилар орқасига қарамай чекинаётган Илёсхожа аскарларини таъқиб қила туриб, амир Шамсуддин қисмидан ажralиб қолган аскарий гурухга дуч келиб қолади ва беихтиёр бу тўп билан жидол қилишга мажбур бўлади. Кутимаган фурсатдан усталиқ билан фойдаланган душман ўз сафларини қайтадан тартибга келтиради ва таъқибчиларга қарши бирдан ҳужумга ўтади. Иттифоқчилар танг аҳволга тушшиб қолади ва улар отларнинг жиловини орқага буришдан ўзга чора топа олмайдилар. Қочаётганларнинг отлари лой ва балчиққа ботиб қолади. Тўс-тўполонда ўн мингга яқин аскаридан жудо бўлган иттифоқчилар Кешга қараб равона бўладилар. Мана шу мағлубиятдан керакли хуносалар чиқарган Темурбек 35 йил давомида олиб борган тўхтовсиз юришлари пайтида қўшиннинг жанговар тартибини муттасил такомиллаштириб туришга катта эътиборини қаратди. У қўшин маркази — қўлни илғор қисм-ҳиравул ҳамда мададкор қисм-чағдаувул билан мустаҳкамлади ва уни фақат олий бош қўмондон олдида масъул қилиб қўйди.<sup>1</sup>

Тарихий маинбаларда<sup>2</sup> келтирилган маълумотларга қараганда, отлиқ аскарлар Темурбек армиясининг зарбдор қисми ҳисобланган, улар оғир ва енгил қуроллар билан қуролланган суворий гуруҳларга бўлинган. Ёй, садоқ ва қилич билан енгил қуролланган отлиқлар асосан разведка ва соқчилик билан шугулланган, ўта зарур чордагина душман кучлари билан жанг қилиш ҳуқуқига эга бўлган.

<sup>1</sup> Қаранг: Греков Б. Д., Якубовский А. Ю. Олтин Ўрда... 297—298 б; Якубовский А. Ю. Тимур... б. 70.

<sup>2</sup> Қаранг: Уложение Тимура. Казанъ, 1894, б. 52—53; Самарканд при Тимуре... б. 17; Иванин М. И. О военном искусстве... б. 149.

Дубулға, зириҳ (совут), қилич, ёй, садоқ, қалқон ва найза билан таъминланган оғир қуролли суворийлар сара жангчилардан тузилган, ганимнинг асосий зарбасига қарши турган, жанг натижасини ҳал этишда катта роль йўнаган.

Юришга жўнашдан олдин Темурбек аркони давлат, вазирлар, саркардалар, беклар, амирларни ҳарбий кенгаш — *машваратга* чорлаган. Айни чоғда улуснинг турли вилоят ва туманларидан, шунингдек тобе юртлардан қўшин тўплаш учун маҳсус буйрак — *тунқал* эълон қилинган. Фармон керакли жойларга юқори мансаб эгаси, бош қўмопдоннинг адъютанти — тавачи томонидан тезлик билан етказилган. Тавачининг зиммасига аскар жамлашдан ташқари қўшин қисмларининг қароргоҳ ёки сафардаги ўрни, жанговар тартиб — ясоли ҳамда бир жойдан иккинчи жойга кўчишни назорат қилиш ҳам юклатилган эди.

Тўнкалга биноан вилоят ҳокимлари, туман ёки шаҳар беклари, қалъя, қўргон доругаларининг Темурбек томонидан тузилган рўйхат-соңга<sup>1</sup> мувофиқ ўз жангчилари, зарур от-улови, қурол-яроги, озиқ-овқати, ем-хашаги билан белгилаб қўйилган тўпланиш ўрни — *миод ерига*, ўз вақтида кечикмасдан етиб келиши шарт ҳисобланган.

Шарафуддин Али Яэдийнинг ёзишига кўра, Темурбек Дашиби Қипчоққа қилинган юриш (1390—1391) олдидан қўшинни бир йилга етадиган озиқ-овқат, қурол-ярог, кийим-кечак ва бошқа сафар учун зарур ашёлар билан таъминлашни ўз ноибларига буюрган. Ҳар бир суворийга битта ёй, 30 та ўқ, бир садоқ, бир қалқон ва битта қўнимча от ажратилган. Юриш вақтида ҳар ўн жангчи бир чодир, икки белкурак, бир керки, бир ўроқ, бир арра, бир теша, бир болта, 100 дона нина олган.

Абдураззоқ Самарқандий ҳар бир жангчининг шунингдек, ярим ман оғирлигида арқон, бир дона пишиқ тери ва битта қозон олиб келиши лозим бўлганлигини қайд этади.<sup>2</sup>

«Темур ҳузуклари»да таъкидланишича, сафар чогида оддий аскарларнинг ҳар ўн саккизтасига битта чодир берилган. Ҳар бир жангчи иккита от, ёй, совут, қилич,

<sup>1</sup> Қаранг: *Тизенгаузен В. Г.* Сборник материалов относящихся к истории Золотой Орды. Т. II. б. 185; Греков Б. Д., А. Ю. Якубовский. Олтин Ўрда... 294 б.

<sup>2</sup> Қаранг: Греков Б. Д., Якубовский А. Ю. Олтин Ўрда... 295 б; Якубовский А. Ю. Тимур... б. 69.

жуволдиз, қол, ўнта нина, арра ва тери халтага (чанач) эга бўлган.

Сара жангчиларнинг ҳар бештаси бир чодирга жойлашган. Уларнинг ҳар биттаси дубулга, совут, қилич, ўқ-ёй, садоқ ва буйруқда кўрсатилган миқдорда от билан таъминланган.

Ўнбегининг алоҳида чодири бўлган. У совут, қилич, ўқ ёй, садоқ билан қуролланган ва бешта қўшимча от олиш ҳуқуқига эга бўлган. Юзбегининг ҳам алоҳида чодири бўлган. Унинг қурол-яроги қилич, ўқ-ёй, совут, садоқ, гурзи, ойболтадан иборат бўлган. Унга ўнта қўшимча от берилган.

Мингбеки чодирдан ташқари соябон билан ҳам таъмин этилган. Дубулға, зириҳ (*чаҳоройна*), совут, наиза, қилич, садоқ ва ўқ сингари ранг-баранг қурол турлари билан қуролланган.

Пиёда аскарлар асосан қилич, камон ва керакли миқдордаги ўқ билан сафарга чиққан<sup>1</sup>. Миод ерида олий бош қўмондоннинг боргоҳи тикилган ва у турли рангдаги түғ ҳамда байроқлар билан безатилган. Белгиланган вақтда (*миод вақти*) да лашкаргоҳга етиб келган аскарлар қатъий тартиб ва интизом билан ўз бўлжар (позиция) ларини әгаллаган ҳамда юриши олдидан ўтказилажак анъанавий ҳарбий қўрикка пухта тайёргарлик кўрабошлиган.

Соҳибқирон юриш пайтида тажрибали *сипоҳийларга* катта ишонч билдирган. Кўни маротабали сўқишиларда суяги қотган, урушини ўзининг бош машғулоти деб санаған жангчилар сафар бошланинишидан аввал жам қилинган, улар кирим-чиқим дафтариға, шунингдек давлатдан маош<sup>2</sup> улуғфа, озиқ-овқат, ем-хашак олувчилар рўйхатиге киритилган. Тузилишига кўра Темурбек армияси туркмўғул халқлари учун апъянавий бўлган ўн, юз, минг ва туманларга тахсилланган. Уларга ўнбеки, юзбеки, мингбеки ва туманбекилар сардорлик қилган<sup>2</sup>. «Темур тузуклари» да қайд қилининиича, қўшин қўмондонлари сафиға Темурбек олий ҳиммат, оқил, мард, тадбиркор, сезигир журъатли, саботли, ҳарб ишига жон-дилини бағишиланган истеъдодли шахсларни жалб этиш масаласига катта

<sup>1</sup> Қаранг: Уложение Тимура... б. 52.

<sup>2</sup> Якубовский А. Ю. Тимур... б. 68. Руи Гонсалес де Клавихо Дневник путешествия в Самарканд по двору Тимуру (1403—1406) Перевод со староиспанского. М., Наука, 1990: б. 146.

эътибор берган. Ҳар бир бек ёки амир ўз ноиби-ўринбосарига эга бўлган. Бирор бек ёки амир ҳаётдан кўз юмган тақдирда ноиби унинг ўрнини эгаллаган<sup>1</sup>.

Руи Гонсалес де Клавихонинг гувоҳлик беришича, қўшин тўплаш тўғрисида фармони олий эълон қилинishi билан аскарлар ўз оиласи, асбоб-аслаҳаси, мол-мулки билан миод ерига етиб келган. Ўрдагоҳдаги соҳибқирионнинг саропардаси атрофида ҳар бир қисм ва бўлинмаларнинг чодирлари тикилган. Оддий аскардан йирик саркардагача ҳар ким ўз жойлашиш ўрнини аниқ билган. Барча ишлар тартиб-интизом билан, шовқин-суронсиз бажарилган. Қўшин билан бирга қассоблар, баковуллар, қовурилган ва пиширилган гўшт билан савдо қилувчилар, арна ва мева сотувчилар, понвойлар ҳам кўчиб юрган. Турли касб эгалари аскарларга хизмат кўрсатганлар. Ҳатто кўчма ҳаммомлар ҳам жангчилар хизматида бўлган<sup>2</sup>.

Темурбек таинлаб олган саркардалар ўзларининг ҳарбий маҳоратларини на фақат уруш кезларида, балки тинч меҳнат чоғида ҳам намойиш этишига тинмай ҳарарат қиласлар эдилар.

Ҳарбий санъатнинг ўзига хос сир-асрорларидан тўла воқиф бўлган, душман сафларини пароканда қилиш йўл-йўриқларини яхши эгаллаган, мушкул вазиятларда дадил ва тез ҳаракат қиласларидан таш тортмайдиган, қўшин сафида содир бўлиши эҳтимолдан ҳоли топилмаган тартибсизликларни ўз вақтида бартараф эта оладиган истеъдод эгаларигина Темурбек то-монидан лашкарбошиликка қўйилган.

Темурбекнинг фармойишга биноан атоқли лашкарбoshiлардан тўрттаси биринчи даражали саркарда, яъни бекларбеги мансабига тийинлангац. Донгдор амирлардан бирига амирул-умаро лавозими берилган ва у олий бош қўмондон, яъни Темурбекнинг ноиби вазифасини адо этган. Соҳибқирион бевосита иштирок этмаган уруш ва жангларда амирул-умаро қўшинга қўмондонлик қиласлар.

Зикр этилганлардан ташқари қўшин қўмондонлигига яна ўн икки бек жалб этилган. Минг кишидан иборат суворийларга биринчи бек, икки минг отлиқлардан ташкил қилинган турӯҳга иккинчи бек, уч минг отлиқли

<sup>1</sup> Карапнг: Уложение Тимура... б. 43—45.

<sup>2</sup> Карапнг: Руи Гонсалес де Клавихо. Дневник... б. 114—115.

фавжга учинчи бек ва шу тартибда ўи икки минг отлиқ аскарлардан тузилган қўшинга ўн иккинчи бек сардорлик қилган. Қуйи погонада турган қўмондон ўзидан юқори лавозимни эгаллаб турувчи саркардага бўйсунган.

Темурбек армиясининг турли қисм ва бўлинмалари га уч юз ўн уч бек бошлилик қилган. Уларнинг дастлабки юзтаси ўнбегилик, иккинчи юзтаси ўзбегилик, учинчи юзтаси эса мингбегилик рутбаларини эгаллаган<sup>1</sup>. Туманларга соҳибқироннинг фарзандлари, набиралари ҳамдамир Шайх Нуруддин, амир Ҳожи Сайфуддин, амир Шоҳмалик, амир Аллоҳдод, амир Жаҳоншоҳ сингари номдор лашкарбошилар раҳбарлик қилган.

Темурбек қўмондонлар таркибининг ҳарб ишидан талаб даражасида маҳорат ва малакага эга бўлган шахслардан шақлланишига алоҳида дикқат қилган.

Жангларда қаҳрамонлик ва мардлик намуналари кўрсатган сара жангчилар муносиб равишда тақдирланиб ўнбеги, такрор жанговар хизматлари эвазига ўзбеги ва ниҳоят, мингбеги амалига кўтарилиш имкониятига эга бўлган.

Евнинг аскарий гуруҳини тор-мор этган мингбеги биринчи даражали амир унвонига, йирик душман қисмини мағлуб этган биринчи даражали амир ўз иавбатида иккинчи даражали амир мансабига ва шу йўсиnda ўзга бек ҳамда амирлар юқорироқ ҳарбий мартабага кўтарилиб борган. Жангхода мардлик ва қаҳрамонлик кўрсатган оддий жангчиларнинг маоши оширилган. Баъзи сабаблауга кўра жанг майдонини ташлаб қочган аскарлар ўлжака тақсимотида иштирок этишдан маҳрум қилинган. Муҳорабадан ярадор бўлиб қайтган шахсларнинг иззатхўрмати жойига қўйилган, уларга Онҳазратнинг марҳамати кўрсатилган.<sup>2</sup>

Бирор кишварни фатҳ қилган ёки ганим армиясини мағлубиятга учратган саркарда учун уч хил мукофот таъсис этилган,<sup>3</sup> яъни шарафли баҳодир унвони ҳамда түғ ва ногора берилган. Айни шундай юксак мукофот билан муҳолифатчи тараф таҳт ворислари раҳнамолигидаги қўшинни паришонликка солган амир ёки бекнинг ҳам шавкати зиёда қилинган.

Жангу жадал чоғида шиҷоат кўрсатиб душман гуру-

<sup>1</sup> Қаранг: Уложение Тимура... б. 44.

<sup>2</sup> Қаранг: Уложение Тимура... б. 45—46.

<sup>3</sup> Қаранг: Уложение Тимура... б. 45—51.

ҳини қочиришга мұяссар бўлган ўнбеги шаҳар доругаси, юзбеги эса вилоят ҳокими вазифасига тайинланган. *Муқоталада адув ҳашамлари* устидан зафар қучган мингбети вилоят волийиси мансаби билан тақдирланган.

Бирор мамлакат ёки юртни эгаллаган амирга ўша ерлар маълум шарт ва имтиёзлар асосида бошқарилиши учун *суюргал* тарзида иноят қилинган. Темурбек ва темурийлар даврида суюргал кенг тарқалган феодал ер эгалиги турларидан бири бўлиб, наслдан наслга ўтган. Суюргал эгаси давлат ҳисобига тўланиши зарур бўлға солиқлардан озод қилинган. Бундай суюргал тури «*дарбаста суюргал*» деб юритилган<sup>1</sup>.

Темурбек тарбиялаб вояга етказган атоқли сарқардалар қаторидан амир Ғиёсуддин Шоҳмаликнинг ҳам ўрин олганлиги тарихдан маълум. Соҳибқирон Шоҳмаликнинг келажакда йирик лашкарбоши бўлиб етишиши мумкинлигини мушоҳада қиласи ва уни бевосита ўзи тарбиялашга майл кўрсатади. Темурбекнинг меҳнати зое кетмайди. Шоҳмалик тадбиркор улуғ беклардан бири бўлиб шаклланади. У ҳазрат Соҳибқиронга муносиб хизматлар кўрсатиб, олий даражага ва мансабга эришади. Темурбекнинг Шоҳмаликка нисбатан инояти жуда юқори бўлган. У «қайси бир мамлакат фатҳ қилинса ва у мамлакатдаги қайси бир қишлоқни Шоҳмалик ихтиёр қилса, у қишлоқ унинг суюргали бўлади», — деб буюрган эди. Ҳаёти муддатида унинг суюргали узлуксиз кўпайиб борди. Шоҳмалик ўзига тегишли мулкларда мадрасалар, хонақоҳлар, масжидлар, работлар ва ҳовузлардан иборат кўп хайрли иморат — қурилишларни ёдгор қолдирди<sup>2</sup>. Шоҳруҳ мирзо даврида Хоразм вилояти Шоҳмаликка дарбаста суюргал қилиб тайинланади «ва у Хоразм мулкидагосойишта ҳаётни шу даражага етказадики, дунё саркашлари ҳам ўзбек вилоятларию Дашиби Қипчоқ мутакаббирларини эл қилиб итоатга келтирди»<sup>3</sup>. Шоҳмалик 1426 йили вафот этгач, Шоҳруҳ мирзо улуғ амирнинг суюргали бўлган Хоразмни идора қилишини унинг фарзанди Иброҳим Султонга топширади<sup>4</sup>.

<sup>1</sup> Қаранг: *Абдураззоқ Самарқандий*. Матлаи саъдайн ва мажмай баҳрайн. Форс-тожик тилидан таржима, кириш сўз ва изоҳли тарзима тарих фанлари кандидати А. Үринбоевники. Тошкент, 1969. 344-506.

<sup>2</sup> *Абдураззоқ Самарқандий*. Матлаи Саъдайн... 343-б.

<sup>3</sup> *Абдураззоқ Самарқандий*. Матлаи Саъдайн... 344-б.

<sup>4</sup> Қаранг. Уша Зори. Уша бет.

Довюрак паҳлавонлар ҳарбларда кўрсатган жасоратлари учун баланд даражага эришиб, баобрў кишилар қаторидан ўрин олган. Улар турзи, олачук (чодир), *мурассаъ камар*, қилич ва саман от каби паҳлавонлик нишонлари билан эъзозланган. Ботирларнинг кўпчилиги кеинчалик ўнлик, юзлик, мингликларга қўмондонлик қилишдек масъулиятли вазифаларга қўйилган<sup>1</sup>.

Юқорида тилга олинган ўн икки амирдан ҳар бир ўз довул (табл) ва байробига эга бўлган. Боп қўмондон ногора ҳамда аламдан ташқари шунингдек, *бурғу*, *тумантуг* ва *чортуғ* билан нишонланган.

Мингбеги туг ва карнай, яъни кўрагага эга бўлган. Юзбеги ва ўнбегига ногора берилган. Турли қўшун, яъни қисм қўмондонлари тегишли нишонлар билан таъминланган. Бекларбети ёки амирул-умаро байроқ, ногора чортуғ ва бурғу сингари нишонларга сазовор бўлган<sup>2</sup>.

Бирор лашкарбошининг ҳаёти хавф остида қолган вазиятда уни ғаним ўқидан асраб қолиш йўлида ўз қўксини қалқон қилган жангчилар Соҳибқироннинг ҳурматэътиборига ва олқишига сазовор бўлган, маҳсус иноятлар билан тақдирланган.

Фиёсуддин Али ёzádi:<sup>3</sup> 1398 йилнинг 11 нояброда амирлар Шайх Нуруддин ва Аллоҳдод Ҳиндистоннинг мустаҳкам қалъаларидан бири — Битнирга берилган омонлик учун тўланадиган мол ва хирожларни қабул қилиш мақсадида келади. Бироқ, қалъя аркоилари Соҳибқирон билан тузилган сулҳ шартларини бажаришдан бош тортиб оммапи амирларга қарши хуруж қилишга даъват ётади. Тенгсиз олишув чогида ярадор бўлган амир Шайх Нуруддинни битнирликлар асир олиш найтида бўладилар. Аммо Афзун Мазид, Фируз Сейстоний сингари баҳодир жангчиларнинг ҳамда бир неча ичклиарнинг ўзларини йўқотмасдан кўрсатган жасоратлари туфайли амир Шайх Нуруддин эсон-омон қуршовдан қутилиб чиқади. Соҳибқирон амир жонига қасд қилмоқчи бўлган дўшманга қирғин келтирган диловарлар жасоратига таҳсинлар айтиб, инъому икромлар кўрсатади.

Испания элчиси Руи Гонсалес де Клавихонинг таърифига кўра, темурий лашкарбоши тинчлик чогида зар-

<sup>1</sup> Қаранг: Уложение Тимура... б. 51.

<sup>2</sup> Қаранг: Уложение Тимура... б. 51—52.

<sup>3</sup> Қаранг: *Гийасаддин Али. Дневник похода Тимура в Индию.* Перевод с персидского, предисловие и примечания А. А. Семекова. М., 1958 б. 97—98.

ҳал ип билан тикилган ҳаворанг сатин кўйлак кийган. Унинг бошида дур ҳамда бошқа қимматбаҳо тошлиар қадалган бўрк бўлган. Бўркнинг остидан уч қатор қилиб ўрилган икки кокил елкага тушиб турган. Элчи бу йўсина ўрилган соchlар Темурбек аскарларининг нишони эканлигини алоҳида қайд этади<sup>1</sup>.

Соҳибқирон юришга жўнашдан анча аввал ёғининг қуролли кучлари, мудофаа иншоотлари, у ердаги ички вазият кабилар ҳақида аниқ ва тўла маълумотга эга бўлиш мақсадида унинг юрти ёки қароргоҳига ўз айгоҳчи (хабаргир, жосус) ларини пешма-пеш юбориб турган. Ғаним тўғрисида зарур маълумотларга эга бўлингандан сўнгина юришга тараффуд кўрилган. Бу хусусда Ибн Арабиоҳ ёзди: «Темур тенги йўқ феъл-атворли, чуқур мулоҳазали киши бўлиб, унинг тафаккур денгизининг қаъри йўқ ва (унинг) тадбири тогига на текислигу, на ғадир-будир орқали йўл топиларди. У ерларнинг барча томонларида ўз айгоҳчиларини тарқатиб, қолган мулклаврида эса жосуслар қўйган эди. Улар (жосуслар) жўмласидан, унинг амалдорларидан бири Амир Отламиш бўлса, яна бири фақиҳ Масъуд ал-Қуҳоний-у Темур девони асҳобларининг кўзи эди. Жосусларнинг буниси Қоҳира-да, Муизияда бўлса, униси Дамашқда, Шамийсониядаги сўфийлардан бири эди. Уларнинг бири чаканафуруш бўлса, иккинчиси йирик савдогар, бадхулқ полвон ва ҳунарманд, мунажжим ва ўз табиатича иш қиладиганлар, гапчиноз қаландарлару саёқ дарвешлар, зарофатли мешкоблар, латофатли этикдўзлар, алвасти ва хийлакор Далла мисоли фирибгар кампирлар, тажрибаси бўлиб, илм талабида мағрибу машриқни кезган, пайига тушган мақсад йўлида макр-ҳийла маконида камолига етган, ўзининг нозик фириби ва даҳоси билан сув билан олов, тўғрилик билан эгрилик ўртасида униб-ўсан, макру ҳийлада Сосон ва Абу Зайддан ҳам ўтиб кетган, ўз ҳикмати ва баҳсида Ибн Синони ҳам мулзам қилган, қачонки ўйлаган ишлари ўзларига тескари натижа бергач, улар ўз сўзамолликлари билан юонликларни сукутга солган, икки муҳолифни бир-бирига бириклириб, икки душманни бир-бирига қўшган уддабурро кишилар эдилар. Натиҷада, улар чор атрофда бўлаётган ҳодисалар ва уларнинг хабарларини Темурга етказиб, ўзлари афзал кўрган ишларини унга баён этардилар. Улар вазнлар, нарх-наво-

<sup>1</sup> Қаранг: Руи Гонсалес де Клавихо. Дневник... б. 63.

лар тўғрисида унга зикр қилиб, манзилу шаҳарларни тав-  
сифлардилар. Уларнинг текис ва нотекис жойларининг  
сувратини келтириб, уйлари ва диёrlари ўринларини  
чизиб кўрсатардилар, шулар орасида у жойларнинг яқин  
ёки узоқ, тор ёки кенглигини, уларнинг қайси теварак-  
атрофда, гарб ёки шарқдами (экалигини), шаҳарлар  
ва қишлоқларнинг исмларини, манзил ва паноҳжойлар  
номларини, ҳар жойнинг аҳлию бошликлари, амирлари,  
улуглари, фозиллари, шарифлари, бойларию фақирлари-  
ни, уларнинг ҳар бирининг исми ва лақабини, шуҳрати  
ва насабини, уларнинг ҳунари ва (эга бўлган) воситала-  
рини (тўла-тўқис) баён қилардилар. Натижада, Темур  
ўз фикри билан шу (нарса)ларни яққол кўриб, тафакку-  
ри воситасида ўз ерларидан хориж жойлар устидан ҳам  
тасарруф юритарди<sup>1</sup>.

Соҳибқирон сафар чоги қўшинни қийин ва ўтиб бўл-  
мас жойлардан бошлаб борувчи йўлчи, яъни қажарчи-  
ларни маҳаллий халқ ичидаги ёллаб олиш масаласига  
жиддий ёндашган.

Сафар арафасида Темурбек анъанавий равишда ўз  
пирлари ва раҳнамолари ҳузурига соғ ишонч ҳамда пок  
иродат билан ташриф буюриб, зиёрат шартларини бажо  
келтирган. Муқаддас ва муборак мозорларни тавоғ қил-  
ган. Майиб-мажруҳларга, муҳтоҷ ва йўқилларга наз-  
ру садақалар улашган.

Етарли миқдордаги черик жам бўлгач, барча қўшин  
турлари — ёйчилар, наизаварлар, қорураандозлар, сан-  
гандозлар, тахшандозлар, майжаниқ, аррода ва тири-  
чарх отувчилар ҳамда бошқа аскарий қисмлар кўрикдан  
ўтказилган. Темурбек армиясида ичига ёнувчи модда-  
нафт солинган кўзачалар иргитувчи ўт сочиш қуроли —  
раъдининг узлиksiz ишлаб туришини таъминловчи маҳ-  
сус тўпчилар — раъдандозлар мавжуд бўлган<sup>2</sup>. Мустаҳ-  
кам қалъя ва қўрғонларни қамал қилишда, душман куч-  
ларига қирғин келтиришда самарали қурол ҳисобланган  
раъдни бошқарувчи тўпчиларнинг сони, Низомуддин  
Шомийнинг фикрича, 10 минг кишига етган. Раъдандоз-  
лар Темурбек томонидан илк марта 1379 йили Урганчни  
муҳосара қилиш вақтида жангга солинган.<sup>3</sup>

Кези келганда таъкидлаш лозимки, араб тилига хос

<sup>1</sup> Ибн Арабшоҳ. Ажойиб ал-мақдур... II китоб. 71—72-бетлар.

<sup>2</sup> Қаранг: Беленцкий А. М. О появлении... б. 7.

<sup>3</sup> Қаранг: Якубовский А. Ю. Тимур... б. 68.

раъд сўзи аслида «момақалдироқ» ни билдиради. Тўпни раъд термини билан аташларининг боиси шундаки, ундан ўқ-снаряд отилганда кучли гумбурлаган товуш чиққан.

Алишер Навоий «Садди Искандарий» достонида Искандарнинг раъд тўпи билан душман қалъасини ўққа тутиш манзарасини тасвирлар экан, тўндан ўқ-тош отилганда даҳшатли садо, ўт-аланга, қора тутун ва бадбўй ҳид ҳосил бўлишини ёзди:

Чу ерга тегиб руст гўйи тилсим,  
Неча пора бўлгай анга салб жисм.  
Ушалғач, садо чиққай андин ғариб,  
Яна шуълаву риҳи дуди ажиб (Хамса, 1390)

Раъд тўрининг қандай усул билан қўйилиши ушбу достонда ўта қизиқарли баён этилган. Аввало қалай, симоб ва мис қотишмалари темир билан аралаштирилиб, дамли ўчоқ ва қўрада эритилган. Эритмадан ичи бўш, контокка ўҳшаш, думалоқ шаклдаги снаряд — раъд тоши ясалган. Бу снаряд ичи порох — *дору* (адовий) билан тўлдирилган. Снаряд сиртида иккита тешик бўлиб, уларга ўт пилиги — *фатила* ўрнатилган. Сўнгра снаряд тўп камони — *раъд ёйига жойлаштирилган*. Ўт пиликлари ёқилғач, снаряд душман қалъаси ёки қўргони томон отиб юборилган. Снаряд ерга тушиб портлаши билав даҳшатли садо чиққан. Албатта, бундай тўплар қамалдагиларни қаттиқ ваҳимага соглан ва аксар уларни таслим бўлишга мажбур қилган<sup>1</sup>.

Раъднинг Темурбек томонидан қуролланишга киритилиши XV—XVI асрларда Мовароунаҳр, Хурсон ва Эронда артиллериянинг бошқа турларининг пайдо бўлишида туртки вазифасини ўтади. Шулардан бири туркийча *қозон* термини билан номланган тўп бўлиб, у ёвнинг жонли кучларини ва техникасини яксон қилиш, унинг ҳалъя ва истеҳкомларини тўпга тутиш, мудофаа иншотларини вайроп қилиш каби ҳарбий операцияларни амалга оширишда фаол қўлланган.

Темурий Захириддин Бобурнинг қайд этишича, қозондан бир кунда анчагина ҳошлар отилган: «Бир неча кун кўпприк боғлагунча Устоз Алиқули яхшилар тош ота-

<sup>1</sup> Қаранг: Дадабов Ҳ. «Бобурнома»даги батъзи бир терминларга доир мулоҳазалар. Адабий мерос. 1988 № 1 (43), 38—39-бетлар.

ди. Аввалги кун саккиз тош отти, иккинчи кун ўн олти тош отти»<sup>1</sup> «Бобурнома» да таъкидланишича, тўпдан отилган тош анча масофага бориб тушган: «Якшанба куни ойнинг саккизида Устоз Алиқули ўшул улуқ қозони билаким тош отти, минг олти юз қадам борди»<sup>2</sup>.

Бобурнинг қозон тўпини қўйиш жараёнинг тасвирлашига эътибор берамиз:

Душанба куни муҳаррам ойининг ўн бепида Устод Алиқулининг қозон қуярининг тафарружига бордуқ. Қозон қуяр ернинг гирдида саккиз кўра қилиб, олотни эришибдур. Ҳар кўранинг тубидин бир ариғе бу қозоннинг қолибиға рост қилибтур. Биз борғач кўраларнинг тешукларини очти, ҳар ариқдан эриган олот сувдек шарилдаб қолибга кирап эрди. Бир-икки кун қолиб совуғанидин сўнг очтилар. Устоз Алиқули кўн башибашат била киши йибариботурким, қозоннинг тош уйи бекусурдур. Дорухонасиини қўймоқ осондур»<sup>3</sup>.

Мазкур матний парчада қўлланган тош уй бирикмаси қозон тўпининг снаряд-тош қўйиладиган қисмини билдируса, *дорухона* термини эса порох — дору солинадиган қисмини англатади.

Фармони олийга мувоғиқ аскарлар бошдин-оёқ темир совутлар кийиб, зарур қурол-яргларни олиб отга минганлар, кўрик учун сафларни ростлаганлар. Майдонда ҳар бир қисмга тааллукли кўк, сариқ, бинафша, қизил, қора рангдаги байроқ ва яловлар хилпираб турган. Ҳарбий мусиқачилар ижро этаётган жанговар мусиқалар остида олий бош қўмондон қўшин қисмларини бирин-кетин кўздан кечириб чиққан. Саф тортиб турган жангчилар найзаларини баланд кўтариб, ҳаммалари бир маромда кучли наъра тортиб, сурон солиб, юришга шай эканликларини изҳор қўлганлар<sup>4</sup>.

Таъкидлаш лозимки, темурийлар даврида юриш ёки размдан олдин қўинини кўрикдан ўтказиб, унинг жанговар руҳи ва ҳолатини аниқлаш анъана тусига кирган. Кўрикдан нафақат асосий жанговар қисмлар, шунингдек, улар ортидан борувчи оғир карвон ўғруқ (овоз) ҳам ўтказилган.<sup>5</sup>

<sup>1</sup> Бобурнома. Тошкент, 1960, 408- бет.

<sup>2</sup> Кўрсатилган асар. 379- бет.

<sup>3</sup> Бобурнома. Тошкент, 1960, 379-бет.

<sup>4</sup> Қараанг: *Абдураззоқ Самарқандий*. Матлаи саъдайн... 91—92-бетлар.

<sup>5</sup> *Абдураззоқ Самарқандий*. Кўрсатилган асар. 68- бет.

Мирхонднинг «Равзат ус-сафо» асарида Темурбек армиясининг Боязид Илдирим билан бўлажак жанг олдиндан кўрикдан ўтказилиши, ярг-аслаҳанинг кўздан кечирилиши ўта жонли қилиб тасвиранади. Фармони олийга кўра бор қўшин қисмлари Сивос даштида қаторларни ростлаб, кўрикка тайёр бўлиб туради. Соҳибқироннинг осмон авжига етувчи зафарнишон саропардаси баланд бир пушта устига ўрнатилади. Мансур аскарлар бўлим-бўлим, гуруҳ-гуруҳ, фавж-фавж бўлиб, дарёмисол мавж уради. Бошдан-оёқ темир совутга бурканган жангчилар фавжи Соҳибқирон қаршисига етганда унинг сардори илгари юрар ва тиз чўқкан ҳолда Темурбек шаънига дуо ва синолар айтар эди. Соҳибқирон ҳар бир туман, минглик ва қўшин жангчиларини мақтовлар билан олқишилар, уларнинг шахдам қадамлар ташлаб боришига мамнуният кўзи билан назар ташлар эди.

Соҳибқиронга кўрикдан ўтаётган черик қисмлари ичида ՚абираси Муҳаммад Султон мирзо қўмондонлигидаги навкарлар айниқса, катта таассурот қолдиради. Амирзода лашкарнинг ҳар бир фавжи унинг буйруғига биноан алоҳида рангдаги кийим билан орастга қилинади. Бир фавжнинг қурол-яроги, алам ва байроги, кийим-кечаги, жибаси қизил, иккинчи гуруҳнинг ранги кўк, учинчи гуруҳнинг ранги оқ, тўртинчи фавжнинг ранги бинафша, бешинчи гуруҳнинг ранги сариқ ва ҳоказо бўлиб, барчаси Соҳибқироннинг таҳсинига сазовор бўлади. Шу алфозда тонг саҳарида бошланган кўриқ пешин охирига-ча давом этади<sup>1</sup>.

Темурбек душманига қўққисдан қақшатқич зарба бериш усули билан шуҳрат қозонган эди. Ганим ўрдугоҳи аниқлангач, аксарият ҳолларда Соҳибқирон унга махфий ёки ўтиш ўта машаққатли бўлган, ҳеч бир кимсанинг оёғи етмаган довонлар, даралар, сўқмоқлар, тоғу тошлар орқали тунда уловларни жиловидан тутган тарада яқинлашар, қуёш ўзининг заррин нурларини бепоён замин узра соча бошлиши билан гафлат уйқусида ётган ёғига қуюндеқ ёпирилар эди. Ибн Арабшоҳ ҳикоя қилади: Темурбекнинг дорус-салтана Самарқандда иморатлар қуриш, боғ-бўстонлар барпо этиш, ариқлар қазиб, сув чиқариш сингари ободончилик юмушлари билан банд бўлиб турганилигидан *мужда* топган қўшни мамлакатлар

<sup>1</sup> Қаранг Мирхонд. Равзат ус-сафо. X. Сулаймон номидаги қўл-ёзмалар институти қўл-ёзмалар фонди. № 4141. 174a.

унинг ҳужумини кутмасдан, мудофаага тайёргарлик кўрмаган ҳолда хотиржам ҳаёт кечирад эди. Соҳибқирон пойтахтдаги ишларни ниҳоясига етказгач, тавачиларга қўшинни тез фурсат ичида Самарқандда тўплап ҳақида амр қиласди. Аскарлар учун ўзи ўйлаб топиб, ихтиро қилган йўсинда тайёрланган дубулгаларни жангчилар кийиб, юришга чиқишиларини буоради. Темурбек сафарнинг йўналишини сир тутади.

Соҳибқирон армияси Самарқандни тарқ этгач, Темурбек: «Хўжанд, Турк ерлари ва Туркистоннинг азим шаҳри Жандга юруш қилишга бел боғладим», — деб овога тарқатади. Шундан кейин Темурбек қўшин гирдобига шўнғиб кетади, унинг отлар бошини қаёқка буришини, қайси томонга ҳамла ёки ҳужум қилишини бирор киши англаб етолмайди. Жаҳонгирнинг қўшини кечани кеча демай, кундузни кундуз демай, иссиқ-совуққа, ташналик ва ҷарчоққа қарамай тинимсиз йўл босар, қўшин қўнгган ҳар бир манзилда кўплаб ҳолдан тойган отлар қолиб кетар эди. Ниҳоят, Темурбек унинг яшинмонанд пайдо бўлишини хаёлига ҳам келтирмаган. Озарбайжон ҳамда Араб Ироқига тулаш, Эроннинг ҳарбий сарҳадида жойлашган кўркам Ҳамадон шаҳрига қўшини бўлмиш Лурристон чегараларида ҳозир бўлади ва Малик Изуддин ал-Аббосий ҳокимлик қилаётган Баружард қалъасини камал қилишга киришади. Қалъа ҳокими қўргонни ҳимоя қилишга мутлақо тайёргарлик кўрмаган, етарли қурол-аслаҳа, озиқ-овқат, ем-хашак жамламаган эди. Унга мадад берувин куч ҳам аниқ эмас эди. Беҳосдан устига улкан қўшиннинг бостириб келишидан ноchor аҳволга тушиб қолган бечора ҳокимнинг Соҳибқиронга итоат билдириб, буйсуниш ва ғуқароларига омонлик сўрашдан ўзга чораси қолмайди<sup>1</sup>.

Темурбек шатранж ўйнашга жуда моҳир бўлиб, бу борада ман-ман деган рақибларини ҳам доғда қолдирад эди<sup>2</sup>.

Шатранж тахтаси устида рақибини шиддатли юришлар билан довдиратиб, танг вазиятга туширишга устамон жаҳонгир маъракагоҳда ҳам ҳар бир қадамини ўйлаб қўяр, қисмларнинг ҳарақатини синчиклаб кузатар,

<sup>1</sup> Қаранг: *Ибн Арабиоҳ*. Ажойиб ал-мақдур... I китоб, 128—129 б.

<sup>2</sup> Қаранг: *Руи Гонсалес де Клавихо*. Дневник... б. 115, *Бартольд В. В.* Улугбек и его время. Сочинения. I, II, часть 2, М., Наука, 1964, б. 60.

жанг тақдири ҳал бўлиши кутилаётган жойларга мадад кучларни вақтида ажратишни олдиндан режалаштирас эди.

Темурбекнинг Ҳиндга юриш қилиб, Деҳлига яқинлашиб қолганлигидан таҳликага тушган ҳиндлар шаҳзода Султон Маҳмуд, Маллухон ва ўзга номдор ҳинд саркардалари раҳнамолигидаги ўн минг суворийлар, йигирма минг сара пиёдалар ва бир юз йигирма жанговар филлардан иборат қўшин билан унга рўбарў бўлади. Соҳибқирон биринчи галда жангчиларнинг каналагини учириб, уларни даҳшатга солган филларни даф қилиш борасида бош қотиради. Зудликда филларга оғат келтирувчи ўткір тиғли учбуручак шаклдаги санчиқ — мўндулардан минглаб ясалади ва филлар келиши кутилаётган ерларга жойлаштирилади. Иккала қўшин жанг ҳаракатларини бошлигач, Темурбек ўз аскарий қисмларини чекинишга буяради. Темурий жангчиларнинг тисарилганини кўриб, душман қочди хәёл қилган ҳиндлар олға ташланади.

Филлар, уларнинг кетидан отлиқ ва пиёдалар жунбушга келади. Мўнду тикилган ерга етган филларнинг оёқларига ўткір санчиқлар тикоғ янглиғ қадалади. Оғриқ зўрлигидан қутирган филлар жон аччиғида филбонларни улоқтириб, орқага тум-тарақай қоча бошлиайди. Улар ортда келаётган ҳинд суворий ва пиёдаларини поймол қилиб, янчиб ўтади<sup>1</sup>.

Соҳибқирон ўта таҳликали онларда ҳам саросимага тушибмас, ҳиссиётта берилмас, метиндан мустаҳкам иродаси иккиланишга, қатъиятсизлик кўрсатишга асло йўл қўймас эди. Бирор марта ҳам мағлубият («Лой жанг» бундан истисно) аламини тоғиб кўрмаган музaffer қўшин олий бош қўмондоннинг ҳар қандай оғир ва чигал вазиятдан ҳам тадбиркорлик билан чиқиб кетишига бутун вужуди билан ишонар, шунинг учун ғаним билан фақат галабани кўзлаган ҳолда жон-жаҳди билан саваш қилар эди.

Фикримизни тасдиқлаш тариқасида 1392 йили Шероз ҳокими, музafferийлар сулоласидан бўлмиш Шоҳ Мансур билан Темурбек қўшинлари ўртасида бўлган жанг саҳнасини келтирамиз.

Отлиқлар гуруҳидан иборат разведка — қаравул Соҳибқиронга Шоҳ Мансурнинг оз кишига бош бўлиб қо-

<sup>1</sup> Қаранг: *Ибн Арабшоҳ. Ажойиб ал-мақдур...* I китоб. 173-174-бетлар.

чиб кетаётганлиги ҳақида хабар келтиради<sup>1</sup>. Шу сабабли Темурбек қўшинининг зарбдор қисмини Шуштар атрофида қолдириб, кичик бир аскарий гуруҳ билан Шероз томон йўлга чиқади. Ганим қаравуллари келаётган отряд — фавж қорасини кўргач, Шоҳ Мансурга маълум қилади ва у албатта, фирор йўлини тутади, деган мўлжал билан Темурбек бамайлихотир от ўйнатиб келмоқда эди. Шерозга уч фарсанг<sup>2</sup> қолганда фавж қўққисдан бошдан-оёқ темир совутларга бурканган тахминан уч минг отлик наизадорларнинг жанговар тартиб-ясолига дуч кеълади.

Соҳибқирон ўзи билан келаётган кучларни ўша заҳоти сафга тизади. Тахт вориси Муҳаммад Султон мирзо сўл қанот — *жувангарга*, Пир Муҳаммад баҳодир мирзо ўнг қанот — *барангарга* бош қилинади. Темурбекнинг ўзи хос гвардиясига қўмондоилик қилади ва Яратгандан мадад ҳамда зафар тилаб, ганимга қарши мардонавор жангга киради. Шоҳ Мансур ҳам қарши тарафдан *муҳорба* бошлайди. Хужумни *шиба* — қалин ўқ ёмғири ёғдириш билан бошлаган Темурбекнинг жуванғари Шоҳ Мансур қўшинининг ўнг қанотини марказ — қўл ортига чекинишга мажбур этади. Ёвнинг чап қаноти ҳам кучли зарбага учрайди. Мағлубиятнинг шубҳасизлигига қарамай Шоҳ Мансур олишишни давом эттираберади ва қолган кучлари билан Соҳибқирон раҳбарлигидаги гуруҳга кескин ҳамла қилади. Жанг жуда даҳшатли тус олади. Темурбек атрофида бештacha хослар тирик қолади. Беш юз зириҳли, шамшир, найза ва гурзи тутган суворийлар бошчилигидаги Шоҳ Мансур Темурбекнинг жонига қасд қилиб, унга яқинлаша боради. Унинг ўзи уч карра Соҳибқиронга қилич солишга чоғланади. Дастлабки икки зарбани Ҳумори *ясавул* ва Таваккал *бавурчи* қайтаришга муваффақ бўлади. Учинчи зарба Ҳуморини ярадор қиласди. Соҳибқироннинг ҳаёти ўта хавф остида қолганига қарамай, унга зарар етмайди. Жувангардан етиб келган кўмак Шоҳ Мансурии чекинишга мажбур қилади. Ўзини бироз ўнглаб олгач Шоҳ Мансур яна Темурбекнинг байроби қадалган марказга хуруж қиласди. Бироқ, марказни ёриб ўтишнинг уддасидан чиқолмайди, аксинча, Соҳибқирон кучларининг маркази ва жуванғари қуршовига тушиб қолади. Бор аскаридан маҳрум бўлган

<sup>1</sup> Қаранг: *Гийасаддин'Али*. Дневник... б. 50—53.

<sup>2</sup> Фарсанг (фарсах) 6—7 км. га тенг масофа ўлчови.

Шоҳ Мансурни аргумоғидан йиқитишга улгирган Темурбек навкарлари унинг виқор билан: «Мен сиз ахтараётган зафарёр Шоҳ Мансурман. Ичишга сув беринг ва мени Темур ҳузурига олиб боринг», — дейишига қарамай, унинг бошини танидан жудо қилишади.

Ибн Арабшоҳнинг мана бу қайдлари ҳам Темурбекка хос бўлган саркардалик салоҳиятининг нақадар ҳадсизлигидан далолат беради.<sup>1</sup>

Ҳиндистонда туялар бўлмаганлиги сабабли, филлар бу маҳлуқларни кўргач, улардан узоқроқ юришини маъқул ҳисоблар экан. Бундан хабардор бўлган Темурбек беш юзга яқин саркаш, ҳурконгич туяларни тўплашни, туякашларга пилик тақилган қамишлар ва ёғланган той пахталар улашиб, қўшинилар бир-бирига яқин келиб, жанг бошлиганда туяларни суворийлар олдига қўйишни буюради. Икки тарафдан сафлар тизилиб, жанг ҳаракатлари боштаниши билан туяларга ортилган ёғли пахталарга ўт қўйилади. Олов ҳароратидан жонсарак бўлган туялар филлар томонга елдек учеб кета бошлайди. Қаршисидан бўкириб, чопиб келаётган туяларни ва ловуллаб ёнаётган алангани кўрган филлар устиларида ўтирган филбону ёйандозларни ағдариб, отлиқларни янчиб, пиёдаларни ер билан яксон қилиб, орқаларига тирақайлаб қочишига тушади. Натижада филлардан фойдаланмоқчи бўлган душман улардан манфаат қўриш ўрнига катта талоғат беради.

Мўгулларга қарши қилинган сафарларнинг бирида Темурбек қисмлари ғаним лашкари билан кутилмагандан юзма-юз келиб қолади. Аскарларда довдираш ва иккиласиши кайфияти пайдо бўлганлигини пайқаган Соҳибқирон уларга душман лашкаргоҳига қараб юришини давом эттиришини ва ёвга қўринарли жойда отлардан тушиб, уларни ўтлоққа қўйиб юборишни ҳамда ўзларига дам олиб, ҳордиқ чиқариши амр қиласиди. Мухолиф томон буларни ўз аскарлари хаёл қилиб, бепарволик билан Темурбек ёнидан ўтабошлайди. Ҳордиқ чиқариб олган Соҳибқирон аскарлари тезлик билан отларга минади ва сурон согтан ҳолда ғанимнинг орқасидан зарба беради<sup>2</sup>.

Ов — ҷарганинг уруш мактаби эканлигини яхши тушунган Темурбек саҳро, дашт ва яйловларда қўшинининг

<sup>1</sup> Ибн Арабшоҳ. Ажойиб ал-мақдур... I-китоб, 174—175-бетлар; Яна қаранг: Руи Гонсалес де Клавихо. Дневник... б. 124.

<sup>2</sup> Қаранг: Ибн Арабшоҳ. Ажойиб ал-мақдур... I китоб, 80-бет.

жанговар ҳолатини назардан ўтказар, имтиҳон қиласр эди. Тавачилар қўшиң қисмларига ов яргини ҳозирлаш, саҳро ва чўлларни ўраш, йиртқич ва бошқа ҳайвонларни камурга — ширкоргоҳга қувлаш тўғрисида фармони олий эълон қиласр, аскарлар ов ҳайвонларини овлоқла тўплашга киришар эди. Аркони давлат, беклар, амирлар, нўёнлар, мирзолар, сипоҳийлар ҳам ширкорда иштирок этишини хуш кўрар эдилар. Ов изидан елдай учиб бораётган отларнинг дўпирни, чавандозларнинг ур ҳа ури, ҳаё-ҳайи, *кўсу* ноғораларнинг тарақ-туруқи, карнайу сурнай ва бургуларнинг кўкни ларзага келтирувчи садоси айни жанг майдонини эслатар эди.

Ширкорга лочину шуниқорлар, қиргийлару чопқир този итлар солинар, сўнгра бир неча кун ов гашти сурилар эди<sup>1</sup>.

Темурбек ҳарбий юришларга кўпроқ кўклам, ёз ва куз ойларида отланишни маъқул кўрар, қишининг қаҳратон кунларини аскар қишлоғ учун мўлжалланган қишлиқларда ўтказарди. Жангу жадал олатлари ва муҳораба асбоблари тартибга солиниб, *жибахона*, яъни қуроляроғ омборидаги *жибалар* сипоҳийларга улашилиб, юриш муҳлати етиб келгач, қўшин отларга минганд. Айни пайтда ўгруқобоз ҳам йўлга чиққан.

Шарафуддин Али Яздийнинг таъкидлашича, мурчил — сафар тартибига кўра ҳар бир туманбеги, мингбени, юзбеги, ўнбеги ўз даражаси, мавқеи ва сафда әгаллаган ўрни — будалга қараб қисм ва бўлинмалари билан жанговар тартибда ҳаракат қилган. Олий бош қўмондон томонидан ясолни бузган шахс қаттиқ жазоланганд, яъни *ясоққа етказилган*<sup>2</sup>.

Қўшин дам олиш, тўхтапи ёки жанггоҳга тушганда лашқаргоҳ атрофи бир-бирига занжирбанд қилинган аравалар билан маҳкам ўралган, шоҳ-шаббалар билан тўсилган, гирдига четан — *чапар* қўйилган, ичига мўнду ўрнатилган хандақлар билан иҳота қилинган. Истеҳком кундузги — *язак* ва тунги — *талоя* соқчи бўлинмалар ёрдамида қўриқлаб турилган. Ганимнинг қораси кўриниши билан ғолиб лашқар хандақдан чиққан ҳамда жанговар саф тузган ҳолда унга қарши юзланган. Юриш ёки му-

<sup>1</sup> Қаранг: *Абдурассоғ Самарқандий*. Матлаи саъдийн... 94-бет; *Ибн Арабшоҳ*. Ажойиб ал-мақдур... II китоб, 80—81-бетлар.

<sup>2</sup> Қаранг: *Тизенгаузен В. Г. Сборник...* т. II, б. 159; *Якубовский А. Ю. Тимур...* б. 69.

ҳораба чоғида бошбошдоқлик ҳамда парокандалилкка йўл қўймаслик мақсадида ҳар бир бўлинма, турӯҳ, қисмнинг ўз ўрон — пароли белгиланган.

Темурбек армияси сафар пайтида қўйидаги жанговар тартибда ҳаракат қилган. Бош кучлардан анча илгарида қаравул — аванпост, ундан кейин манғлай (ҳираўл) — авангард, *барангар*, *жувангар*, *қўл*, *чагдавул* — (форсий адабиётларда — *соқа*) — аръергард юрган. Қўшин ортидан ўғруқ пешма-пеш келган.

Қўшинда сувли тўсиқларни кечиб ўтишга алоҳида эътибор қаратилган. Дарёларнинг саёз өрлари *гузар* — кечикка айлантирилган ва соқчи отлиқ гуруҳлар томонидан эҳтиёт қилингани. Дарё ёқасига етиб келган қўшин *бўлук* — *бўлук*, *фавж* — *фавж*, қисм-қисм бўлиб кечикдан ўта бошлаган. Қўклам ва куз фаслиниң серёмғир кунларида дарё сувининг кўпайиши натижасида гузардан ўтиш анча мушкуллашган. Теран дарёлар устида қайиқлар ёрдамида боғланган кўпик орқали оғир техника ҳамда ўғруқ ўтказилган. Суворийлар кўпинча тезоқар дарёлардан отниң югани ва ёлига осилган тарзда, пиёдалар эса мешлар кўмагида осонлик билан талофатсиз кечиб ўтган<sup>1</sup>.

Соҳибқирон жанг майдонини ташлашда бевосита иштирок этган. Жанггоҳнинг текис, кенг ва қўшин қисмларини жойлаштиришга қуладай бўлиши талаб қилинган. Айниқса, *маъракагоҳнинг* ичимлик сув манбаъига яқин бўлиши ҳамда разм вақтида қуёш нуриниң жангчилар кўзига тушмаслиги мақсадга мувофиқ ҳисобланган<sup>2</sup>.

Ирик мұҳрабалар пайтида дастаси учига *маҳча* — ярим ой шакли қадалган жанговар байроқ ва түглар билан безатилган олий бош қўмондоннинг боргоҳи баландликка тикилган. У ердан қисм ва бўлинмаларнинг майдондаги ҳаракати, жангнинг бориши Темурбек томонидан кузатиб турилган. Одатга кўра боргоҳ олдида ҳарбий оркестр аскарларни мардликка рағбатлантирувчи, уларнинг жанговар руҳини кўтарувчи қуйларни тинимизиз чалиб турган.

Соҳибқирон тўқиш бошланишидан аввал, одатича

<sup>1</sup> Қаранг: *Ибн Арабшоҳ. Ажойиб ал-мақдур...* I китоб, 76-бет; *Руи Гонсалес де Клавихо. Дневник...* б. 99.

<sup>2</sup> Қаранг: *Уложение Тимура...* б. 80—81; *Шарафиддин Али Яздий. Зафарнома...* 53-бет.

фатҳ намозини адо этган. Тангридан мададу нажот ти-лаган. Сўнгра чақмоқмонанд саман отига виқор билан миниб, савашга бевосита қўмондонлик қилган. Жанг кўп ҳолларда, қарама-қарши тарафларнинг яккама-якка олишуви билан бошланган. Баҳодирларнинг жасорати ва шахсий тайёргарлиги жангнинг қандай якунланишига маълум даражада таъсир кўрсатган. Паҳлавонларнинг сони айтарли даражада катта бўлмаган. Баҳодирлар қўшиннинг зарбдор кучини ташкил этган ва уларнинг ҳалокати одатда маглубиятга олиб келган<sup>1</sup>.

Муборизлар кежим — ўқ ўтмас ёпинчили жанговар отда майдонга тушиб, бошларига худ — дубулға, юзга бурқа — ниқоб, устайларига жиба — зириҳ кийиб, бир қўлда қалқон, бир қўлда қилич билан жанг қилган. Отнинг эгарида садоқ-ўқ ёй, тиркаш ва табарзин, яъни ойболта боғлоглик турган.

Ҳар икки томон баҳодирларининг яккама-якка олишувларидан сўнг таблу ногора овози, кўсу бурғу наъраси, карнай-сурнай садоси худди момақалдириқдай жўш урап, хуружга келар эди.

Ботирлар мардонаворлик намуналарини намойиш этиб, жонларини жанг майдонида ҳалокат чоҳига отилига шай турган. Даставвал пиёда новакандозлар, яъни, ўқ-ёйчи-лар ганим аскари устига шиба ёғдира бошлаган. Сафлар бир-бирига қўшилгач, навбат — тиф ва найзаларга, қилич ҳамда қалқонларга келган.

Қаҳрамонлик, жуванмардлик ва айниқса, шахсий матонат йигитлик авонида маълум сабабга кўра жисмонан шикаст тонган Темурбек учун ҳам бегона хислат эмас эди. Қатор савапларда жаҳонгир кўрсаатгац ботирлик ва жасурлик, сабот ва матонат намуналари омма қалб тўридан ўрин олган, тилларда достон бўлган, турли ағсона ва ривоятларнинг тугилишига сабаб бўлган эди.

1379 йили Ҳрганичи муҳосара қилиш чогида Хоразм ҳукмдори Юсуф Сўфи Темурбекни яккама-якка олишувга чақиради. Соҳибқирон рақиб даъватини ҳеч иккилан-масдан қабул қиласди. Олишув учун зарур бўлган қурол-яроғ билан ороста - бўлган Темурбек ўйноқи тулпорида ҳандак ёқасига келади ва қалъа бурж ҳамда борулари паноҳида бўлган Юсуф сўғини кураш майдонига чорлайди. Бироқ, Темурбекнинг жалодат билан маъра-


<sup>1</sup> Қаранг: Гўмилев Л. Н. Древние тюрки. М., 1967. 33; Гордеевский В. А. Государство сельджукидов в Малой Азии, М., 1960-б.

кагоҳда раҳш суришини кўриб, ўз сўзидан қайтган Юсуф Сўфи Соҳибқирон билан юзма-юз жанг қилишдан қўрғонда қолишни маъқул кўради.

Ушбу воқеадан оз фурсат ўтмай, Термиздан келтирилган, эндиғина дум бериб етилган, тилни ёрувчи тарвузларни Темурбек дастурхонига тортишади.

Соҳибқирон тарвузларни ўз ғаними билан баҳам қўрмоққа қарор қиласди ва уларнинг бир қисмини олтин лаганларда Юсуф Сўфига юборади. Темурбекнинг зоҳир этган олижаноблиги ва тантлигини ўзи учун ҳақорат ёки камситиш деб тушунган Урганч ҳокими тарвузларни сувга ирғитади, лаганларни эса, дарвозабонга инъом қиласди<sup>1</sup>.

Тарихий манбалар<sup>2</sup> Темурбекнинг ўн икки минг кишилик қўшини жангга мана бундай тартибда киришини қўрсатади. Муҳолифатчи лашкар билан дасталабки тўқи нашувни разведка вазифалари билан машғул бўлган енгил суворийлар, яъни *каравул* бошлиб берган. Шундан сўнг, ўнг ва чап қанот илғор қисмлари — *барангар ҳираувули* ва *жувангар ҳираувули* мададида асосий илғор қисм *манглай* жангга қадам қўйган. Манглай ортдан барангар



<sup>1</sup> Қаранг: Бартольд В. В. Улугбек и его время... б. 52.

<sup>2</sup> Қаранг: Уложение Тимура... б. 80—83. Иванин М. И. О военном искусстве.: Разин Е. А. История военного искусства. т. II., М., 1957. Ўзбек совет энциклопедияси. I жилд, Тошкент, 1971, 462—465-бетлар.

ҳамда жуванғарниң қолган икки бўлаги, яъни *чапавул* ва *шақавул* пешма-пеш ҳаракат қилган. Мабодо ушбу куч душманни мағлуб этишга кифоя қилмаса, у ҳолда бош қўймондон — амирул-умаро боғчилигидаги етакчи кучлар — қўл (ғул) ҳал қилувчи ҳукумга ташланган.

### Ун икки минг отлиқ қўшин ясоли


«Темур тузуклари» ва бошқа тарихга оид асарларда Темурбек армияси қатнашган шафқатсиз жангларниң тактиқ бориш манзараси қўйидагича тасвиранади:



Каравул



Хиравул ҳиравули



Каравул



Хиравули бузург (манглай)



Жувангар ҳиравули



Жувангар

1-қатор



Барангар ҳиравули  
Барангар



Жувангар ҳиравули




Жувангар


2-қатор



Барангар ҳиравули



Иттифоқчилар



Мирзолар



Кўл (ғул)



Темурбек армиясининг ясоли

Қўшин маркази 40 бўлук — полкка тақсимланган ва бевосита Соҳибқирон қўмондонлигига бўлган. Ушбу бўлукларнинг сараланган аскарлардан ташкил этилган ўн икки бўлуки сағнинг биринчи қаторида, қолган 28 бўлуки эса иккинчи ва учинчи қаторларида жойлашган. Қирқ бўлукнинг ўнг тарафи олдида Темурбек ўғлонлари ҳамда набиралари қисмлари, сўл тарафи олдида эса олий бош қўмондон қариндошлари ва иттифоқчилари қисмлари сағ тортган. Бу қисмлар қўшинга истаган пайтда кўмак беришга шай турган. Иккинчи қаторнинг баранғарда олти бўлук ўз илғори — ҳираувул билан ўрин олган. Айни шунча бўлук ва ҳираувулга жуванғар ҳам эгалик қилган.

Иккинчи қатор баранғари ва жуванғари олдида юқоридаги тартибда биринчи қатор қисмлари жойлашган. Биринчи қатор олдида бош илғор — ҳираувули бузург ёки манғлай ҳаракат қилган. Енгил суворийлардан иборат икки бўлук — қаравул қўшинни қўққисдан бўладиган ҳамладан сақлаш, душман кучларининг ҳаракатини кузатиш билан банд бўлган<sup>1</sup>.

Муҳолиф лашкарда қочиш белгилари ва мағлубият аломати зоҳир бўлиб қолгач, уни таъқиб этиш учун чапдаст суворийлардан тузилган қувғунчи тайин қилинган. Қувғунчилар шикаст топганларга шундай шиддат билан ҳамла қилганки, душман отлиқларида от суришга маҷол, пиёдалар учун қочишга паноҳ қолмаган.

Қалъа ёки қўргонга чекиниб, мустаҳкамланишга ултирган ғаним мұҳосара қилинган.

Қалъа деворлари яқинида манжаниқлар қурилиб, галтаклар устига ўрнатилган appodalар тикланиб, қамалдагиларга қаратса ҳар тарафдан тошлар иргитилган, Раъдлар ишга солинган. *Борулар* остидан нақблар кавланган. Деворлarda очилган раҳналар орқали аскарлар селдай ичкарига ёпирилиб кирабошлигаган. Қалъага чор тарафдан мур — малаҳдай ёпирилиб келаётган аскарлар қамал аҳли томонидан отилаётган ўқ, найза, тош бальзан ёнаётган моддалардан сақланиш учун бошларига қалқон ёки тура тутиб, деворларга қўйилган шотулар, ё бўлмаса ташланган каманд ва ҳалқалар ёрдамида юқорига кўтарилган.

<sup>1</sup> Қаранг: Уложение Тимура... б. 83-90.

Темурбек Дамашқ шаҳри яқинидаги бир қалъани қамал қиласиди. Қалъа мустаҳкам бўлиб, у узоқ муддатли мудофаа учун зарур қурол-ярог, озиқ-овқат, ем-хашак билан таъминланган, мудофаачиларга Яздар номли саркарда бошчилик қиласиди. Аввалига Соҳибқирон бу қалъага унча эътибор бермайди. Бошқа зарурроқ юмушлар, яъни Дамашқ шаҳри аҳлидан берилган омонлик учун тўланадиган товоғ-мол дунё, от-улов, жория ва хизматкорлар йигиш билан машгул бўлади. Ушбу иш дўйндирилгач, Темурбек юқорида зикр қилинган қалъа сари юзланади. Қалъа баланд, буржे ва борулари мустаҳкам эди. Уни бир ҳамла билан қўлга киритиш мумкин эмаслигини сезган Соҳибқирон муҳосара қурол-яроларини ҳозирлашни амр қиласиди. Жаҳонгир ишни қалъа дёворлари ёнида уидан баланд бўладиган тупроқ уюми — *саркўб тиклашдан бошлайди*. Минглаб черик аҳли амир Жаҳоншоҳ раҳбарлигида теварак-атрофдан ўтиш, ёғоч, шоҳ-шабба тўплаб, устидан тош ва тупроқ тўкиб, саркўб барпо этади. Қад ростлаган саркўбга кўтарилигантемурий аскарлар қалъа ичидаги турли қуроллардан ўт ёғдиради. Қалъа рўпарасига ўрнатилган манжаниқлардан иргитилган тошлар билан деворларда раҳналар очилади, унинг остидан нақб — ерости йўллари қазилиб, боруларга илгаклар ташланади, зич қўйилган нарвоқлардан жангчилар қўргонга ёпирилади. Бундай зўр ҳужумни кутмаган мудофаачилар сафида саросима бошланади ва улар қаршилик кўрсатиш бефойдалигини англаб етгач, муҳосаранинг йигирма тўққизинчи куни Темурбекдан омонлик тилаб, унга қалъани топширади.<sup>1</sup>

Темурбек қўшини забт этилган қалъа, шаҳар ва вилоятларни ўзбошимчалик билан ғорат қилиш ҳуқуқидан бутунлай маҳрум эди. Агарда бирор шахс, Соҳибқиронга «ота ёки бола ўрнида бўлса ҳам, ёки заррача бўлса ҳам ноҳақлик кўрсатса, ёки наҳбу — ғорат тўғрисида сўз очса, зинҳор унинг мол-мулкию қони (бехудага) оқизилар, унинг ҳурмати ва ҳарами таҳқир қилинар эди. На надомат, на шафоат тилаш унга најот қилмас, аҳли ва хизматкорлари унга наф қилмасди ва бирор кимса томонидан «у билмасдан шундай (иш) қилиб қўйди», —

<sup>1</sup> Қаранг: *Ибн Арабшоҳ. Ажойиб ал-мақдур...* I китоб, 232—234-бетлар.

дэйилмасди. Бу, гёй бузилмас (қатъий) қоидаю емирилмас (мустаҳкам) бино эди»<sup>1</sup>.

Фақат оммавий талон-тарожга рухсат берилгандан сўнггина юришда иштирок этаётган ҳар бир киши, ҳоҳ у номдор лашкарбоши бўлсин, хоҳ оддий аскар бўлсин, бундан қатъий назар тенг ғанимат олиш ҳуқуқига әга бўлар, кимки бирор ўлжани биринчи бўлиб қўлга киритса, ўшангэ әга бўлар эди.<sup>2</sup>

Темурбек ўз ҭасарруғига киритилган мамлакат ва юртлардан ўлжа олинган мол-дунё, ярг-аслаҳа, қимматбаҳо буюмлар, зебу зийнатларни салтанат хазинасига бекаму қўст келиб тушишини қаттиқ назорат қиласар, асир олинган олимлар, фозиллар, меъморлар, шариат аҳли, наққошлар, тўқувчилар, тоштарошлар, тиқувчилар, дурадгорлар, жибачилар, ахтацилар, чодир тиқувчилар, сирчилар, қушчилар, ёйчилар ва ҳ, аҳли пешани иложи борича заҳмат ва зарарсиз бир ерга тўплар эди. Жам қилинган фазилат соҳиблари, аҳли хунар ва бошқа турли касб эгалари номдор бек ёки амирлар кузатувида Самарқандга етказилар эди.

Кўп ҳолларда Соҳибқирон обод ва кўркам, маданияти гуркираб яшнаган, маъмур шаҳар ва кентларни, вилоятларни горат қилишдан ўзини тияр, у ерлардаги муборак қабристонлар, машойих ва акобирларни зиёрат қиласар эди.

Унинг бундай феълу хўйидан боҳбар бўлган юрт аркенилари унга пешвоз чиқиб, пешкашлар қилиб, ўз халқига омонлик тилар эди. Икки орада сулҳ тузилиб, Темурбек қўшини илгарилаб кетар эди.

Соҳибқирон жангларда мардлик ва қаҳрамонлик на муналари кўрсатган ҳар қандай рақибини ҳурмат қиласар, жангчиларини ундан ўрнак олишга ундар эди. Бунга тарих шоҳид.

Эрондаги Кермон вилояти ҳукмдори Султон Аҳмадга қарашли Алинжак номли қалъя бошлиги Алтун қўй остидаги уч юз чоглик кишиси билан Темурбекка қаттиқ қаршилик кўрсатади<sup>3</sup>. Соҳибқироннинг саркардларидан Темур Қутлуг Алтун томонидан қилинган шабиҳун — тунги ҳужум пайтида ўлдирилади. Вақти вақти билан қалъадан ташқари чиқиб, Темурбек аскарлари устига қилинган хуружлар мовароуниҳрликларни танг аҳволга солиб қўяди.

<sup>1</sup> Ибн Арабшоҳ. Ажойиб ал-мақдур... I китоб, 247-б.

<sup>2-3</sup> Қаранг: Ибн Арабшоҳ. Ажойиб ал-мақдур... I китоб. 131-бет.

Ибн Арабшоҳнинг таъкидлашича, Темурбек қалъани ўн икки йиллик қамалдан сўнг фатҳ этади<sup>1</sup>. Навбатдаги торатларнинг биридан қайтган Алтун қалъа дарвозаси нинг ўзи учун беркитиб қўйилганлигини кўради. Бўлак бошпаноҳи бўлмаган Алтун тақдирга тан бериб, Темурбек ҳукми остида турган, ҳозирги Эрон Озарбайжонига тааллуқли Маранд шаҳри томон ноилож йўл олади.

Алтуннинг қурол-яргосиз ва аскарсиз ёлғиз ўзи келганлигидан воқиф бўлган Маранд доругаси дарҳол унинг бошини танидан жудо қиласди. Бу нохуш воқеадан изтиробга тушган Соҳибқирон афсус-надоматлар чекади. Сўнгра ўз яқин кишиларидан бирини Марандга юбориб, Алтун жонига қасд қилган доруганинг мол-мулкини мусодара қиласди ва унинг ўзини қатл этишга буйруқ беради.

Соҳибқирон бирор ҳисор, шаҳар ёки вилоятни қанча вақт ичида забт этиш мумкинлигини олдиндан яхшилаб ҳисоблаб чиқар ва саркардалардан белгиланган муддатда ҳарбий ҳаракатларни ниҳоясига етказишни қатъий талаб қиласар эди.

Ибн Арабшоҳнинг ҳикоя қилишига кўра, 1400 йилнинг 9 августида Темурбек улкан черик билан Сивосга этиб келади. Тарихчиларнинг ёзишича, Сивос Туркиянинг ажойиб ва чиройли шаҳарларидан бири бўлиб, гоят гўзал манзилда жойлашган эди. Шаҳар мустаҳкам қўргони, маҳобатли иморатлари, тарихий обидалари, кўркам мақбаралари билан маълум ва машҳур эди. Ҳавоси мўътадил, суви зилол, халқи ўта ҳимматли ҳамда ҳамиятли бўлиб, одамшинавацдлик, такаллуф, тавозеъ ва иззатхурмат қоидаларида стуку баркамол эди. Сивос Қораденгиз ва Арманистонга туташ бўлиб, унга Туркия сultonи Боязид 1 Илдиirimнинг тўнгич ўғли Сулаймон ҳоким эди.

Сивоснинг осонгина таслим бўлмаслигини пайқаган Темурбек шаҳарни ўн саккиз кунлик муҳосарадан сўнг фатҳ этишга аҳд қилганлигини баён этади. Ҳақиқатдан ҳам Сивос ўн саккиз кун давом этган жангу жадалдан сўнг 1400 йилнинг 26 августида забт этилади.<sup>2</sup>

Темурбек ўз тасарруфига олмоқчи бўлган улус ёки

<sup>1</sup> Қаранг: *Ибн Арабшоҳ*, Ажойиб ал-мақдур... I китоб. 134—135-бетлар.

<sup>2</sup> Қаранг: *Ибн Арабшоҳ*, Ажойиб ал-мақдур... I китоб. 194—195-бетлар, II китоб, 72-бет.

юртнинг ҳукмдорларига, лашкарбошиларига мактуб ва ёлчилар йўллаб унинг амрларига бўйин эгіб, *муқотала* ва *муқобаласиз* Суюргатмишхон (1370—1388) ҳамда Маҳмудхон (1388—1402) ёки Соҳибқирон Темурбек кўрагон исми билан хутба ўқитиш, шу тартибу расмга кўра пул зарб қилиш, тобе ва итоатда бўлиш, у ўтказаётган сиёсанни сўзсиз тан олиш каби талабларни қўяр эди. Қўйилган шартларга майллик кўрсатганинг ҳурматлар, уларга иззат-икромлар кўрсатар, совға-саломлар тортиқ қиласар, халқига омонлик берар эди.

Темурбекнинг талабларини назар-писанд қилмай, у юборган ёлчиларни қатл этишга ботинган баъзи жойларнинг раҳбарлари аёвсиз жазоланаар, мамлакати ғоратга дучор қилинар эди.

1400 йилнинг сентябр-октябр ойларида Ҳалабга етиб келган Шом ҳокими Сайди Судун Темурбек жўнатган, юқорида қайд этилган мазмунга яқин фармонни қўзга илмай, дипломатия қоидаларини оёқости қилиб, мактуб келтирган ёлчига ҳамла қиласди ва унинг бошини кесади. Элчининг ноҳақ қурбон қилиниши Соҳибқирон ғазабини қўзғайди ва Ҳалаб аҳлининг қирғин-барот қилинишига олиб келади<sup>1</sup>.

Одатга биноан ғалаба ҳақидаги фатҳномалар мамлакатнинг ҳар бир чеккаси томон чопарлар орқали етказилган. Бу ҳумоюн фатҳ овозаси рубъи маскуннинг барча ўлкаю вилоятларига тарқалган, хутба ва пул зарби Соҳибқирон номи ва лақаби билан шарафли қилинган.

Юришдан фатҳу зафар қучиб қайтган музaffer кўшини Мовароуннаҳр халқи томонидан жуда катта хурсандчилик, шоду хуррамлик ва тантаналар билан қарши олинган. Сочқи сочиш, пешкашлар келтириш шарти амалга оширилган. Олий бош қўмондоннинг шаънига ҳамду санолар, саломатлигига шукрлар айтилиб, мухтожларга хайру садақалар улашилган. Дорус-салтана Самарқандда бир неча кун мобайнида дастурхонлар ёзилиб, тўю шодиёналар авжига чиққан. Хосу омга тухфалар қилинган, оплар тортилган<sup>2</sup>.

Темурбекнинг саркардалиқ салоҳияти шунингдек, унинг бир неча бор кам сонли черик билан қўрқув билмасдан кўп сонли ганим лашкарига қарши жанг олиб

<sup>1</sup> Қаранг: *Иbn Арабиоғ*. Ажойиб ал-мақдур... I китоб, 199—205-бетлар.

<sup>2</sup> Қаранг: *Гийасаддин Али*. Дневник похода... б. 185—188.

борган чогларида яққол күзга ташланади. «Қанчадан қанча кичкина гуруҳлар Аллоҳнинг изни билан катта гуруҳлар устидан галаба қилган»<sup>1</sup> лигини, оз ўт кўп ўтигини куйдиришга қодир эканлигини яхши билган Соҳибқирон кўшинча сон жиҳатдан зиёд бўлган ёв кучларига юзма-юз чиқиб, ўзига хос бўлган чора-тадбирлар кўмагида нусрат қозонар эди.

Шарафуддин Али Яздийнинг мана бу сатрларига диққат қиласми: Мовароуниҳар вилоятлари бошдан оёқ муҳолифлар ва душманлар таъсири доирасида бўлганлигидан ҳар бир жойда душман лашкарининг қандайдир бир катта тўпи ўришиб олиб, ҳар ким ўз ўрнини бор кучи билан муҳофаза қиласди. Шунга қарамай осмондай қудратли Соҳибқирон ул диёрга бормоққа азм айлади ва Парвардигор кўмагидан умид қилган ҳолда, олти юз киши йўлга отланиб, шабғир қилиб, таваккал юзини йўлга қаратди. Жайхун сувидан ўтганларидан сўнг, шабғир қилиб, тонгга яқин Найистонга етдилар. Ўша куни бир чорбогда бекиниб турдилар ва отлар йўл чарчогидан тин олди. Сўнгра Жуйбори мавзесидан шабғир қилиб, Хузор томондан юриб Қаршини ўраб олдилар. Амир Муне навкарларидан бир тўпи ўша ерда эди, барчасини банди қилдилар. Қайсарнинг қариндошлари — Анонжак, Кўдаҳ ва Ўрдушоҳ ўз қавмлари билан қочиб қолдилар. Дувваррака ва Шайх Али баҳодир эса савдогарларни душманлар деб ўйлаб, улар билан жанг қилдилар ва ғолиб чиқиб, тўрт боғлам кимхоб ўлжа олиб, Ҳазрат Соҳибқирон олдига олиб келдилар. Ул Ҳазратнинг буйруги билан уларнинг ҳаммасини, кам-кўстсиз эгаларига қайтардилар. Қаравунас<sup>2</sup> лашкаридан беш минг киши Кўзи — мундоқ<sup>3</sup> мавзеида турардилар. Амир Сулаймон Ясавурий уларга бориб қўшилди. Баротхожа ва Ҳиндушоҳ ҳам ўз лашкари билан уларга бириқди. Анонжак ва Кўдаҳ Хузор яқинидан ўтиб, уларнинг қошига кетдилар.

Ҳазрат Соҳибқироннинг бу аҳволдан хабари йўқ эди. У кун ботиш олдидан Қаршидан отланиб, ярим кечада Навқатга<sup>4</sup> етиб борди. Ўша ерда қаравунас лашкари ва улар ёнига тўплланган кўп (қўшин) ҳақида хабар топди.

<sup>1</sup> Қуръон, 2-сурा, 249-оят.

<sup>2</sup> Қаравунас—Чигатой улуси гарбий қисмida жойлашган туркмўғул қабилалари.

<sup>3</sup> Қамаши туманидаги Қизилтепа қишлоғи.

<sup>4</sup> Қамаши туманидаги Йорабог қишлоғи.

Эҳтиёткорлик шартига амал қилган ҳолда, ўша заҳоти ҳовли-жойлар орасидан чиқишига буюрди ва ўша кечада Навқатниң ташқарисида чўлда тунади... Шу пайт амир Жаку отдан йиқилиб, шундай қаттиқ лат едики, мизожи яшаш йўлидан четга бурилди. Ҳазрат Соҳибқирон ўттизиста мукаммал отлиқни унга қўшиб. Моҳонга юборди. Ўзи эса ҳиммат юзини қатъий равишда қаравунас лашкари билан жангга қаратди. Амирлар ва баҳодирлар барча ул ниятга қўшилиб, рози бўлди. Фақат Али Ясавурыйгина ул фикрни маъқул топмади ва маслаҳатдан деб билмади. Қариндошлари бу ҳақда Ҳазрат Соҳибқиронга арз қилдилар. Ул Ҳазрат уни зўрлик билан чақиртириб отлантириди.

Шайх Али баҳодир ва Оқбўға баҳодирни олтмишта аскар билан манглай тарзида жўнатди. Душманлар томондан Ҳиндушоҳ уч юз киши билан лашкар олдида келарди. Ҳар иккала томон манглайи бир-бирларига етиб жангга киришдилар. Осмоний қўллов Ҳазрат Соҳибқирон сипоҳига оз бўлишига қарамай, галаба ва ферузлик каромат қилди ва душман манглайнини қувиб, уларнинг қўлигача етказдилар.

Бу ғалаба содир бўлгач, ул Ҳазрат тўхтаб, отларга дам бердилар. Ўша куни пешин чоги саодат ила яна отланиб, олти юз сипоҳни етти қўшинга бўлди. Зафарпаноҳ сипоҳ душманлардан сон жиҳатдан жуда оз бўлганиклари учун Соҳибқирон жангчиларнинг қўнглини кўтариб, яхши сўзлар айтди. Уларни рағбаатлантириш учун тиришмоқ ва жанг қилмоққа ундан, гавҳар сочувчи сўзлар билан, бугун мардлар учун базм ва ишрат (куни) дир деди. Амир Довуд, амир Сарифбўға, Ҳусайн барлос, амир Сайфуддин, Аббос баҳодир, Оқбўға баҳодир, Ҳинду, Элчи баҳодир, Дуваррака, Шайх Али баҳодир, Али Ясавурый, Чўбин ва Махмудшоҳларни ҳар бирини ўз жойларига қўйиб чиқди. Ўзи эса, қаравул тарзида олдинга юрди. Ёв яқин келгач, жуванғар ва буранғарни тартибга келтириб, қўлни ўзининг ярқираб турган шон-шукуҳи билан безади. Жанг чоги уч чўқ (тўп) бўлиб ҳужум қилсинлар, деб буюрди. Иккита томон сипоҳи бир-бираига ташланган чогда мавлоно Бадруддин ва унинг ўғли қочдилар. Али Ясавурий ҳам иккита навкар билан қочмоққа юз тутди. Ҳазрат Соҳибқирон Тангри кўмаги ила ҳуҷумга ўтди...

Ўшандай кўп сонли ва шон-шавкатли лашкар бир соат ҳам туриб жанг қилолмадилар ва жаҳонгир Соҳиб-

қироннинг бир ҳамласидан орқа ўгириб, қочмоққа юз тутдилар<sup>1</sup>.

Темурбекнинг қўшин қисмлари тогли ҳудудларда ҳам муваффақият билан жанг ҳаракатлари олиб бориш, мустаҳкам қалъа ва ҳисорларда ўриашиб олган душманни мағлуб этиш қобилиятига эга эди. Фикримизни Низомуддин Шомийнинг қуидаги қайдлари билан мустаҳкамлаймиз.

Соҳибқирон қўл остидаги ҳарбий кучлар Андароба мавзеига етганда у ернинг мусулмон аҳолиси Темурбекдан ўзларини мажусийлар зулмидан ҳалос этишни илтимос қиласди. Соҳибқирон гайридинийлар ўтказаётган азоб-уқубатга чек қўйип мақсадида тезлик билан қўшин сафларини ростлайди ва мажусийларга қарши юради. Рустам баҳодир мирзо ва Бурҳон ўғлон бошлиқ қисмларни Катур қалъаси томон йўллаган Соҳибқирон ўз навбатида катта ҳарбий қисм билан қалин қор ичидан йўл очиб, оғир сўқмоқ ва довонлар орқали баланд бир чўққига кўтарилади. Барангтар ва жуванғар аскарлари қор билан қопланган жар ва дараларга учиб тушмаслик мақсадида белларига арқон боғлаб, чўққидан пастга тушидилар. Темурбек қўшинининг кутилмаганда тўсатдан пайдо бўлганлигидан боҳабар бўлган мажусийлар кўчкўронини тоғ устига олиб чиқипади. Темурбек қўшини ганимларнинг кўпдан-кўп қўй-қўзиларини ўлжа қиласди, уй-жойларини қўлга киритади. Асосий кучлар етиб келгач, тоғ тепасига чекинишга улғирган душманни бартараф этиш учун қисмларга тоққа кўтарилишга ижозат берилади.

Қўшин қисмлари фармонни адo этишга киришади. Шайх Арслон ёвнинг кўп тўдаларини жуванғар қисмлари қароргоҳи томон қувлаб боради ва уларни мағлуб этиб аксарини асир қиласди. Али Султон кофириларга бошқа тарафдан қирон келтиради ва уларнинг қўнимгоҳини эгаллайди. Мислсиз матонат ва қаҳрамонлик на муналари намойиш этган амир Фиёсуддин Шоҳмалик ёғининг кучли зарбаларини қайтаради.

Мубашир Тўра ҳам ўзга жангчилар қатори тўқнашувда жасорат кўрсатади. Мингли хожа бир гуруҳ сара баҳодирлар бошчилигига олга ташланади ва тоғ тепасига чиқиб олади. Суюнчак баҳодир ўз жангчиларини жанговар сафга тизиб душман билан шиддатли жанг қиласди. Шайх

<sup>1</sup> Шарафиддин Али Яздий. Зафарнома... 157—160-бетлар.

Арслон аскарлари ва мулозимлари ҳамроҳлигига тоғ төп пасига чиқади ва у ерда жойлашиб олган мажусийларни қиличдан ўтказади.

Мусо, Ҳусайн Малик ва амир Ҳусайнлар ҳам оғир жанг олиб боришади.

Ўзга минглик ва туман сардорлари душман гуруҳларини, уларнинг истеҳкомларини қуршовга олади.

Уч кун давом этган саваш чоғида мажусийларнинг қўўпчилиги қурбон бўлади. Тўртингчи куни коғирларнинг ақобирлари чорасиз аҳвол ҳамда заифлик сабабли Темурбекка итоаткорлик кўрсатади ва аҳли учун омонлик тилайди. Соҳибқирон мажусийлар исломни қабул қилган тақдирдагина омонликка сазовор бўлишилари, бешлари амал сиртмоғидан ҳалос қилиниши мумкинлигини баён этади. Мажусийлар жонларини сақлаб қолиш, ўғил-қизва хотин-халажини тутқунликдан сақлаб қолиш ниятида ўз динларидан воз кечиб, иймон келтиришади.

Соҳибқирон уларнинг ҳаммасига инъомлар бериб ва иззат икром кўрсатиб, ўз уй ва юртлари томон қайтишларига ижозат беради.

Аммо бахти қаро мажусийлар ўз маконларига эсономон етиб олгач, исломдан юз ўгирадилар ва амир Шоҳмалик аскарларига тунда шабихун қиласидилар. Мажусийлар томонидан зоҳир этилган бу ҳаракат уларнинг Соҳибқирон қўшинлари томонидан тор-мор этилишига, хотин-халаж ва ўғил-қизларининг банди қилинишига, мол-мулкларининг талон-тарож бўлишига олиб келади.<sup>1</sup>

## ҚАРОР ҚАТЪИЙ, ШИКОЯТГА ЎРИН ЙЎҚ

Маълумки, Жўёжихон авлодидан бўлган Тўхтамишхон отаси Тўйхўжа ўғлон Ўрисхон томонидан қатл қилингандан сўнг Оқ Ўрдадан қочиб, 1376 иили Самарқандга, Темурбек ҳузурига мадад ва паноҳ излаб келади.<sup>2</sup>

Узоқни кўрабилувчи, ақли теран ва тезфаҳм Соҳибқирон ёш, ғайратли ҳамда истеъодди хонзоданинг кўнглини кўтариш, қўллаб-қувватлаш, лозим топса тўс-тўпalonдан боши чиқмай қолган Оқ Ўрда сиёсий-ижти-

<sup>1</sup> Қаранг: Гийасаддин Али. Дневник похода... б. 192—195.

<sup>2</sup> Қаранг: Греков Б. Д., Якубовский А. Ю. Олтин Ўрта... 287—288-бетлар; Якубовский А. Ю. Тимур... б. 61—62.

моий ҳаётига ўз таъсирини ўтказиб, у ерга ўзининг ишончли кишисини ҳукмдор қилиб қўйиш мақсадида Тўхтамишхонни жеракли қурмат-эҳтиром билан қаршилайди, совға-саломлар, тортиқлар инъом қиласди. Зарур қурол-аслаҳа, асбоб-анжом, от-улов ва қўшин билан таъминлаб, Тўхтамишхоннинг Оқ Ўрда таҳтига эга бўлиш йўлида қилган барча юришларида кўмак беради.<sup>1</sup>

Яқиндан берилган мадад туфайли Тўхтамишхон 1378 йили Оқ Ўрдани қўлга киритади, 1380 йили Калка дарёси бўйида Мамайнин маглуб этган Тўхтамишхон Сарой ал-Жадид, Сарой Боту, Саройчик, Ҳожитархон сингари шаҳарларни забт этади ва ўзини Олтин Ўрданинг мутлақ ҳокими деб эълон қиласди.<sup>2</sup> Жўжи улуси раҳбарлигини куч билан қўлга олган Тўхтамишхон олиб борган сиёsat ва ҳарбий ҳаракатларнинг асосий йўналиши жанубга, яъни қачонлардир Чигатойхон ва Хулагуҳон улуслари ҳисобланган Мовароунаҳр ҳамда Хуросонга қаратилган эди. Бу улуслар XIV асрнинг ўрталарида келиб, таназзулга юз тутган, ерлари Темурбек ва унинг фарзандлари томонидан эгалланмоқда эди. Ўз хатти-ҳаракатларини яқин ўтмишда жуда катта ҳудудда ҳукмронлик қилган буюк, эндиликда ўзаро уруш ва низолар туфайли майда бўлакларга ажралиб кетган, ўз умрини тугатаётган чингизийлар салтанатини қисмав бўлса-да, қайта тиклашдек аниқ мақсадга қаратган ёш, гайратли, шу билан бирга ўта баджаҳл Тўхтамишхон бир умр миннатдор бўлиши лозим топилган ҳомийси ва мададкори Темурбек билан очиқдан-очиқ муносабатларни ёмонлаштириш, муҳолифатчилик қилиш кўчасига қадам қўяди. Соҳибқирон билан бўлган алоқаларни бутунлай узган Тўхтамишхон унинг тасарруфига кирган мулкаларга тажовуз қилиш ниятида 1382—1384 йиллар давомида катта қўшин тузиш, уни керакли қурол-яроғ билан таъминлаш каби зарур чора-тадбир билан машғул бўлади. 1384 йилнинг ниҳоясида Тўхтамишхоннинг юз минг кишилик қўшини Дарбанд ва Ширвон орқали Кура дарёсидан ўтиб, Соҳибқирон мулки ҳисобланган Табриз остонасида пайдо бўлади. 1385 йил бошида шаҳар хон

<sup>1</sup> Қаранг: Греков Б. Д., Якубовский А. Ю. Олтин Ўрта... 288-бет. Егоров В. Л. Историческая география. Золотой Орды в XIII—XIV вв. М., Наука, 1885, б. 64—65.

томонидан забт этилгач, унинг чериги Марагага қараб юради. Бу ердан ортига қайтган Тўхтамишхон лашкари йўл-йўлакай Озарбайжоннинг Маранд ва Нахичеван вилоятларини яксон қилади. Юришни шу йўсинда якунлаган хон қўшини Қорабогдада тўпланади ва у ердан Олтин Ўрда сари жўнайди.<sup>1</sup>

Келаси, 1386 йили Темурбекнинг айнан Аррон даштида қишлов учун тушганлигидан бехабар Тўхтамишхон Озарбайжонга қайта юриш бошлиди. Олтин Ўрдаликлар лашкари Дарбанднинг жанубидаги Самур дарёси бўйларида Темурбек аскарларига дуч келади. Бўлиб ўтган кисқа жангдан сўнг Тўхтамиш қўшини шимол томон бурилиб кетади.<sup>2</sup>

1387 йили Тўхтамишхон Темурбекнинг Эрондалигидан фойдаланиб, Соҳибқирон салтанатининг марказий қисмларига ҳужум қилиши қарорига келади. Дастребки зарба Оқ Ўрданинг маркази Сигноқ томонидан берилади. Сабронни эгаллай олмаган қўшин Ўтрорга йўл олади ва у ерда унча катта бўлмаган Темурбекка тегишли аскарий гуруҳини маглуб этиб, Самарқанд ва Бухоро вилоятлари ҳудудига бостириб киради. Тўхтамишхон иккинчи йўналишдаги зарбани Хоразм орқали амалга оширади. Самарқанд ва Бухоро қуршовда қолишига қарамай, Тўхтамишхон бу шаҳарларни олишини уддасидан чиқолмайди. Асосий қуролли кучлар билан Широзда турган Темурбек қамалда қолганларга 30 минг кишилик мадад жўнатади. 1388 йилнинг февралида Соҳибқирон бор армиясини бошлаб, душманга қарши йўлга чиқади. Тўхтамиш Темурбек билан юзма-юз тўқнашишдан воз кечиб, зудлик билан Дашти Қипчоққа қайтиб кетади.

Тўхтамишнинг Олтин Ўрдадан бир неча чақирим ма-софада жойлашган Самарқанд ва Бухоро вилоятларига қилган ҳужуми, унинг муайян бир ҳудуд учун эмас, балки умуман Темурбекка қарши олиб бораётган сиёсатининг натижаси әканлигини Соҳибқирон англаб етган эди.

1383 йилнинг сўнггида ўз қўшинини рус, булгор, бошқирд ва бошқа халқлар ҳисобига мустаҳкамлаган Тўхтамиш яна Темурбекка қарши отланади. Қозоғистон чўллари ва Сирдарё бўйлаб ҳаракат қилган улкан қўшин-

<sup>1</sup> Қаранг: В. Г. Тизенгаузен. Сборник материалов... Т. 2. б. 157; В. Л. Егоров. Историческая география... б. 218—219.

<sup>2</sup> В. Л. Егоров. Историческая география... б. 219.

нинг илгор қисми 1389 йил бошида Арис дарёсининг этагида жойлашган Зарнүқ шахри яқинида Темурбек томонидан исканжага олиниб, тор-мор этилади. Бу вақтда Тўхтамиш қўшининг асосий қисмлари билан Сирънинг ўнг соҳилидаги Саброн шаҳрини әгаллашга беҳуда уринмоқда эди.<sup>1</sup>

Темурбек Тўхтамишхон томонидан амалга оширилаётган ганимлик ва гаразгўйлик сати ҳаракатларга чек қўйишга ҳамда Соҳибқироннинг Эрон заминидаги мавқеининг кучайиб кетаётганилигини олдини олиш учун Олтин Ўрда ва Миср ўртасида тузилиши режалаштирилаётган иттифоққа барҳам беришга мажбур бўлади. Натижада Темурбек 1391 йилнинг қиши фаслида Тўхтамишхонга қарши юришга азм қиласиди<sup>2</sup>. Салтанатнинг турли вилоятларига тавачи ва чопарлар юборилиб, оммавий сафарбарлик ҳақида фармони олий эълон қилинади. Бир йилга етадиган озиқ-овқат, ем-хашак йиғиши ва ҳозирлаш чоралари кўрилади. Ҳар бир жангчи бир ёй ва ўттиз дона ўқ, тиркаш ўқдони билан, бир қалқон, битта қўшимча от, ҳар ўн аскарда бир чодир, икки бел, бир кетмон, бир ўроқ, бир арра, бир теша, юз игна, ярим ботмон арқон, бир тери ва қозон бўлиш шарти қўйилади. Темур буйругига биноан улови бўлмаган навкарларга отлар берилади. Давлат хазинасининг эшиклари очилиб, амирлар, беклар, лашкарбошиларга сафар олдидан тортиқлар қилинади. Лашкарнинг жанговар руҳини қўтариш мақсадида аскарларга совғалар улашилади.

Жам бўлган қўшин Самарқанддан йўлга чиқади ва Сирдарёдан кўпrik орқали ўтиб, Тошкентга қараб юради. Қишининг маълум қисмини Тошкентда ўтказишга қарор қилган Темурбек одатиша шайх Маслаҳатнинг мақбрасини зиёрат этиш учун Хўжандга боради. Тошкентга қайтиб келган Соҳибқирон безгак касали билан оғриб, қирқ қунгача ётиб қолади. Аркони давлат, беку умарова аҳли лашкарнинг кўнгиллари ғамгин ва паришон бўлади. Дард аригач, Темурбек Даشتி Қипчоқ юришига жиддий тайёргарлик кўра бошлайди. Бек ва нўёнларга

<sup>1</sup> Қаранг: В. Г. Тизенгаузен. Сборник материалов... Т. 2. б. 157; В. Л. Егоров. Историческая география... б. 219—220; Б. Д. Греков, А. Ю. Якубовский. Олтин Ўрда... 288—289-бетлар.

<sup>2</sup> Қаранг: Греков Б.Д., Якубовский А. Ю. Олтин Ўрда. 302 б; Егоров В. Л. Историческая география... б. 220. Тизенгаузен В. Г. Сборник материалов. т. 2. б. 160—171.

туҳфалар қилади, сипоҳга ош бериб, барчанинг кўнглини хушиуд айлайди. Қўшинга қийин ва ўтиб бўлмас жойлардан бошлаб борувчи йўл бошловчилар — қажарчилар белгилайди. Бу гал қулавузлик, яъни, йўлбошловчилик қилиш вазифаси чингизий шаҳзода Темур қутлуғ ўғлонҳамда Идигуй ўзбек, яъни, Едигей зиммасига юклатилади. Шу аснода Мироншоҳ кўрагон мирзо Хуросон лашкари билан келиб, ҳумоюн ўрдуга қўшилади.

Мамлакат ишларини идора қилиш вазифаси вақтингачалик Шоҳруҳ мирзо ва Жаҳонгир мирзоларга тоширилади. Амир Лаъл билан амир Милкат амирзодаларга ноиб этуб тайинланади.

Барча ташкилий юмушлар ниҳоясига етгач, Тошкентдан 1391 йилнинг 22 январида қўзгалган Темурбек армияси Ўтрор томон йўлга чиқади. Рақибининг улкан қўшин билан келаётганлигидан чўчиган Тўхтамишхон у билан бўлажак тўқиашувни иложи борича кейинга суриш максадида Темурбек ҳузурига ўз элчиларини тўққизта чопқир от ва бир қанча шунқорлардан иборат совфа-саломлар билан юборади.

Хоннинг элчилари орқали йўллаган узр-маъзур, тавба-тазарру ҳамда содиқ бўлиш ҳақидаги ваъдаларини дикқат билан тинглаган Темурбек айтилган сўзларнинг барчаси сохта ва найрангдан ортиқ нарса эмаслигини яхши пайқайди. Лашкарошилар, аркони давлат, амирзодалар, нўёнлар иштирокида ўтиказилган ҳарбий кенгаш — машвараатда Тўхтамишхонга қарши юришни давом эттиришга қарор қилинади.

1391 йил хут ойи охирларида икки юз минг кишилик қўшин Яса, Қораҷуқ, Саброн орқали Сариқ ўзан (Сари сув) мавзеига чиқади. Кучли сел келиши туфайли қўшин бир неча кун шу ерда макон топади. Сел камайгандан сўнг Соҳибқирон қўшини дарёдан гузар орқали ўтади. Бир кун кечаси Идигуй ўзбекнинг икки навкари қочиб, Тўхтамишхон урдugoҳига кетганлиги маълум бўлади. Қочоқларни тутиш максадида юборилган таъқибчилар уларни тополмай, қайтиб келади. Соҳибқирон икки кечакундуз йўл юриб толиқсан қўшинни Улуғ тог (ҳозирги Қозоғистондаги Қарсақпай кони яқинидаги Олтин чўку номли тог) ёнбағрига ҳордиқ олиш учун туширади. Ўзи эса хослари ҳамроҳлигига тог бошига чиқиб, теварак-атрофга, ястаниб ётган даштга назар ташлайди ва бу ерда мазкур юриш ҳақида хотира қолдиришга қарор

қилади<sup>1</sup>. Фармони олийга кўра жангчилар атроф жавонибдан харсанг тошлар ташиб келиб, белгиланган жойга тўплайдилар. Уста тоштарошлар ишга тушиб, Соҳибқироннинг Тўхтамишхонга қарши қўшин тортиб, ушбу мавзега етганлиги тарихини тошга битадилар.

Туркӣ ёзувда нақш қилинган хотиранинг матни қуидагичадир: Тарих ети юз тўқсон учта, қўй йил ёзнинг ора ой Туроннинг султони Темурбек икки юз минг<sup>2</sup> черилик била ислом учун Тўхтамишхонни(нг) хонига йуриди. Бу ерга етиб, белгу бўлсун теб бу йўбани қўнгарди. Тангри нисфат бергай, Ишаоллоҳ. Тангри эл кишига раҳмат қилғай, Ўзизни дуо била ёд қилғай».

Ёдгорлик битгач, қўшин янга йўлга чиқади: Илончуқ, дарёсини убур қилғач, саккиз кеча ва кундуз тинимсиз от суриб томиққаш Темурбек синоҳни Анақарғуй (Қозогистондаги ҳозирги Анақарқуюн) мавзеига туширади.

Беш-олти ойдан бери ганим кетидан изма-из келаётган қўшиннинг озиқ-овқати деярли тугаш арафасида эди. Соҳибқирон қўшин бекларига иложи борича ун, буғдой, арпа каби озиқ-овқат маҳсулотларини тежашни буюради. Аскарлар биёбондаги қушларнинг тухумларини пишириб ейиш ҳамда атала — булатумуқ ичиш билан қаноатланади.

Оғир вазиятдан чиқиши, яъни қаҳатдан халос бўлишнинг бирдён-бир иложи чарга ови қилишга амр қилинади. Ов жуда муваффақиятли бўлади, кўплаб жайрон, ёввойи эчки, кийик ва бошқа саҳро жониворлари ўлжа қилинади. Емиш муаммосини ҳал қилган Темурбек сафарни давом эттиради. Лашкар денигизмонанд жўш ва хурушга келиб, тартиб ва қоида билан фавж-фавж, гуруҳ-гурӯҳ бўлиб ёғи томон мутаважжиҳ бўлади. Тобол, Ейиқ (Урал), Самар дарёларидан кечиб ўтган қўшин Ийк дарёси яқинида қўнишга қарор қилади. Амирзода Муҳаммад Султон баҳодир тутиб келтирган тилдан душманнинг яқиндалиги тўғрисида маълумотга эга бўлган Соҳибқирон ражаб ойининг душанба куни қўшинни зудлик билан Ийкни кечиб ўтишга боплайди. Кўприкдан дастлаб манғлай, сўнг қўл-марказ ўтади. Барангар ва жувангар лашкарига сувдан сузиб ўтишга буйруқ берилади.

<sup>1</sup> Қараинг: Греков Б. Д., Якубовский А. Ю. Олтип Ўрда... 303—304-бетлар; Якубовский А. Ю. Тимур... б. 63.

<sup>2</sup> Содиқов Қ. Амир Темурнинг уйғур ёзувли битиги //Соғлом авлод учун 1995 йил № 1.//

Бу орада душман қароргоҳини аниқлаш мақсадида жўнатилган разведкачи гуруҳ-қаравулнинг сардори амир Ику Темур қарши томон қаравулари, билан бўлган тенгиз тўқнашув пайтида қатлга етади. Икки тарафнинг соқчи бўлинмалари тез-тез юзма-юз кела бошлиди. Бироқ, ёвнинг асосий кучлари ҳа деганда кўзга ташланабермайди.

Озиқ-овқатнинг соат сайин камайиб бориши, узоқ йўл босган аскарларнинг ҳолдан тойиши ҳисобига Темурбек армиясининг тинкасини қуришиб, унинг жанговар руҳини сусайтириш тактикасини усталик билан қўллаётган Тўхтамишхонни Умаршайх мирзо, амир Суюнчак, Султон Санжар, амир Ҳожи Сайфуддин ва амир Аббоснинг ўғли Усмон қўмондонлигидаги йигирма минг жаррор отлиқ аскарлардан иборат илғор қисм — манглай, охир оқибат тўхташга ва жангга киришга мажбур этади.

1391 йилнинг 18 июня Самара вилоятининг Кундузча мавзеида Темурбек ва Тўхтамишхон ўртасида, икки томондан тахминан 400 минг аскар иштирок этган, ўша даврдаги энг даҳшатли ва йириқ масоф — жанглардан бири бўлади.


Ушбу жанг саҳнаси, Темурбек қўшинининг жанговар тартиби Низомуддин Шомий ва Шарафуддин Али Яздий асарларида муфассал тасвирланган.

Ясолни тузишга бевосита Соҳибқироннинг ўзи раҳбарлик қиласи. У қўшинининг қисмларини жанг майдонига жойлаштиришда янги усулни қўллайди ва уларни *етти қўлга ажратади*. Султон Маҳмуддинг номи билан ораста қилинган ва марказга қўйилган қўлга бевосита амир Сулаймоншоҳ қўмондонлик қиласи. Бу қўлнинг кетидан Темурбекнинг иккипчи қўли туради, унга бошчилик қилиш Муҳаммад Султон мирзога буюрилади. Унинг ортидан бевосита Темурбек ихтиёрида бўлган 20 қўшун эҳтиёт қисм қилиб жойлаштирилади. Барангарга Амцроншоҳ мирzonинг қўли қўйилади, амир Ҳожи Сайфуддиннинг қўли қунбул-қанот қўриқчиси вазифасини ўтайди. Жувангарга Умар Шайх мирzonинг қўли жойлаштирилади. Унга қунбул тарзда Бердик, Саригуға раҳбарлигидаги қўл туради. Бу қисмга ҳам жувангар, ҳам қўлни қўриқлаш вазифаси юклатилади. Марказ — қўл манглай — авангард билан таъминланади. Қўлнинг орқа томонида олий бош қўмондон, яъни, Темурбек қароргоҳи ўрнатилган чағдавул жойлаштирилади. Шу ерда бўлган эҳтиёт кучлар жангнинг тақдирини Темурбек фойдасига ҳал бўлишида катта роль ўйнайди.

Ул тарафда Тўхтамишхон ҳам ўз сипоҳини беш қўлга бўлиб, уларга хонзодалардан Тош Темур ўғлон, Бек Бориқ ўғлон, Элтиқмиш ўғлон, Али ўғлон, Жўжихон улуси умаросидан Алибек, Сулаймон, Қўнгиrot Наврўз, Оқ бўта, бийлардан Айсаек, Ҳасанбек, Кўка ва Ёғли сингари Даشتни Қипчоқнинг номдор саркардаларини бошлиқ Қилиб, саф чекиб туради.

Айтилганлардан келиб чиққан ҳолда Темурбек ва Тўхтамишхон қўшинларининг жанговар тартиби — ясонлини қўйидагича схемалаштириш мумкин.

### Тўхтамиш армияси



### Темурбек армияси

Темурбек жанг олдидан аскарий қисмларга чодирлар тикиб, овқат пиширишни, емак билан машғул бўлишни буюради. Жангчилар ўт ёқиши ва емак пиширишга тутинади. Нусратпаноҳ қўшиннинг бу дараҷадаги виқор ва саботи Тўхтамишхон лашкарини нафақат таажжубга, балки ғулғулага солади.

Соҳибқирон жидол ва қитолга шуру қилмасдан аввал отидан ерга тушади. Сидқ ва ниёз юзидан икки ракъят намоз ўқиб, Тангридан нусрат ҳамда зафар тилайди. Шундан сўнг ҳар икки қўшиннинг диловарлари ва икки мамлакатнинг сафдорлари жалодат майдонига қадам қўйиб, тўқиши бошлайдилар. Даствавал амир Ҳожи Сайфуддин ўз рўпарасида турган ғанимнинг жуванғарига ҳамла қиласди ва уни синдиришга муяссар бўлади.

Душман қисмнинг сафи бир-биридан айрилиб қочмоқча юз тутади. Шу пайт душманнинг бир неча бўлимлари амир Ҳожи Сайфуддин аскарларига ҳужум қилиш ниятида унинг изига тушади. Душман режасини ўз пайтида англаб етган амир Жаҳоншоҳ ўзининг лашкари билан тебраб, бу ғуруҳнинг йўлини тўсади.

Амирзода Умаршайх баҳодир журъат шамширин ги-лоғидан суғириб, ўз аскарлари билан хасм баранғарига ташланади.

Тўхтамишхон Соҳибқирон қўли билан жанг қилишга ботинолмай, у ердан юз ўгиради ва амирзода Умаршайх қисмларига қараб юзланади. Бироқ амирзода унга қаттиқ қаршилик кўрсатади ва у ердан тебранмакни хаёлига ҳам келтирмайди. Иш чиқмаганини кўрган Тўхтамишхон Шайх Темур ва Салдуз қўмондонлигидаги қисмларга ҳужум қиласди. Темурийларнинг кучли тирборонига дуч келишига қарамай Тўхтамишхон Салдуз фавжини яксон қилиб, ўртасидан ёриб ўтади. Шундан сўнг мирзо Умаршайх ўз одамлари билан хон қаршисига чиқиб, уруш бошлайди. Матъракагоҳнинг бошқа жойларида ҳам Темурбек аскарларининг қўли баланд келабошлайди. Охир оқибат Даشتி Қипчоқ лашкари фирор йўлини тутади.

Жанг Темурбекнинг тўла устунлигига ўтади. Бутунлай тор-мор этилган Тўхтамишхон қўшини қолдиқлари Волгага қадар таъқиб қилинади. Катта миқдордаги ғаниматни қўлга кириғтан музaffer қўшин жангдан кеъйнги йигирма олти кунлик ҳордиқдан сўнг келган

йўли билан юртига қайтади. Ўн бир ой давом этган ҳарбий сафар ниҳоясига етади.<sup>1</sup>

Олтин Ўрданинг ушбу мағлубияти унинг иқтисодиятига, ижтимоий ва сиёсий ҳаётига уччалик зарар етказмади, салтанатнинг тақдирини узил-кесил ҳал қилмади. Тўхтамишон Соҳибқирон билан олиб бораётган сиёсий курашини давом эттириш учун ҳали етарли куч-қувватга эди.<sup>2</sup>

## ТЎФОН

1394 йилнинг кузида Темурбек қўшиларининг Шимолий Озарбайжонда турғанилигидан фойдаланган Тўхтамишон Дарбанддан ўтиб, Ширвоннинг қент ва туманларини горат қилишга киришади. Бундан хабар топган Соҳибқирон хон билан қайта тўқнашишдан ўзга чора йўқлигини англаб, юришга тайёргарлик кўришга фармон беради. Қўшиннинг юриш яроги, озиқ-овқати, кийим-кечаги назардан ўтказилиб, хосу омга маош-улуфа улапшилади.<sup>3</sup>

Қиши фаслини Қура дарёси ёқасидаги қишлоқ, яъни қишловда ўтказган Темурбек қўшини баҳорнинг дастлабки илиқ кунларида Дарбанд томон йўлга тушади.<sup>4</sup> Шарафуддин Али Яздийнинг таъкидлашича, туркий халқлар одатига биноан, жуванғар қўшиннинг олдида ҳаракат қилган. Ўрни келганда шуни қайд этиш лозимки, туркий ва мўғул халқларининг урғ-одатича қўшин қанотларининг ўнг ва сўлга тақсимланиши бу халқларнинг дунё томонлари ва қисмлари орасидаги нисбатни аниқлашдаги анъанавий тушунчаси билан бевосита боғлиқ бўлган.<sup>4</sup>

Темурбек юриш чогида, уруш ҳаракатлари вақтидаги қонун ҳамда қоидаларга сўзсиз амал қилишни уқдирган ҳолда Тўхтамишга Шамсуддин Олмалиқни элчи қилиб

<sup>1</sup> Қаранг: Егоров В. Л. Историческая география... б. 220; Греков Б. Д., Якубовский А. Ю. Олтин Ўрда... 302-бет; Тизенгаузен В. Г. Сборник материалов... т. 2. б. 172—173.

<sup>2</sup> Қаранг: Егоров В. Л. Историческая география... б. 220; Греков Б. Д., Якубовский А. Ю. Олтин Ўрда... 308-бет; Якубовский А. Ю. Тимур... б. 63.

<sup>3</sup> Қаранг: Греков Б. Д., Якубовский А. Ю. Олтин Ўрда... 309-бет; Хизриев Х. А. Нашествие Тимура на Северный Кавказ //Вопросы истории. 1982, № 4, б. 47.

<sup>4</sup> Қаранг: Тизенгаузен В. Г. Сборник материалов... Т. II., б. 174.

юборади.<sup>1</sup> Тўхтамиш ўрдусига келган элчи хонга Соҳибқирон мактубини топширади ҳамда у айтган гапларни баён қиласди. Тўхтамиш, Али Яздийнинг ёзишича, Темурбек билан сулҳ тузиш тарааддудига тушган, аммо, баъзи бир саркарда ва нўёнларнинг таъсирида ўз фикридан қайтган ва дагал мазмунда битилган жавоб хатини элчига топширган. Элчи Албуруз тоғининг этакларидағи Самур водийсида вақтинча қурилган Темурбек қароргоҳига қайтиб келади ва Соҳибқиронни музокара натижаларидан боҳабар қиласди.

Дашти Қипчоқ хони билан сулҳ тузиш нияти рўёбга чиқмаган Темурбек қўшинни жанговар тартибга тизиб, Дарбанд довонидан ошибб, Догистоннинг Тарки (ҳозирги Маҳачқала яқинидаги) шаҳри атрофида дам олиш учун тушади. Шу чөгда Тўхтамишон Соҳибқирон ҳузурига ўз айғоқчиси Ўтроқни элчи сифатида жўнатади. Соҳибқирон лашқаргоҳига яқин келган элчининг у ердаги аскарларнинг кўплигидан қути ўчиб, зудликда хон қошига қайтади ва Тўхтамишонга бу ҳақда хабар беради. Тўхтамишон иккilanmasdan Қўйису дарёсидаги кечикнинг муҳофазасига Қазанчи нўён бошчилигидаги ўз армиясининг ҳиравулини ажратади.<sup>2</sup> Темурбекка қарашли қаравул — разведка бу ҳақда Соҳибқиронни хабардор қиласди. Соҳибқирон катта бир суворий гуруҳга саркардалик қилиб, ганим ҳиравулига қарши юради ва уни биринчи ҳамладаёт мағлуб әтади.<sup>3</sup>

Шундан кейин Темурбек қўшини Чечен — Ингушия ҳудудларига қадам қўяди. Сунжи дарёсининг Терекка қўйилиши ўнг қирғоғида лашқаргоҳ учун жой тайинланади. Соҳибқирон Терек дарёсидаги мавжуд кечикларни кечикмасдан эгаллаш ниятида Сунжининг этагига қараб, унинг ўнг ва сўл қирғоқлари бўйлаб тез ҳаракат қиласди.<sup>4</sup>

Тўхтамишон Темурбек келгунга қадар Терекдан ўтиб, мудофаа иншоотлари қуришга, дарёning чап қирғонини арава, дарахт, чапар ва туралар ёрдамида мустаҳкамлашга улгирган эди.<sup>5</sup> Шунга қарамай, Темурбек Тўхта-

<sup>1</sup> Қаранг: Егоров В. Л. Историческая география... б. 160.

<sup>2</sup> Қаранг: Тизенгаузен В. Г. Сборник материалов... т. II б. 119, 174; Хизриев Х. А. Нашествие... б. 47.

<sup>3</sup> Қаранг: Греков Б. Д., Якубовский А. Ю. Олтии Үрда... 310-бет; Тизенгаузен В. Г. Сборник материалов... Т., II, б. 119, 175; Хизриев Х. А. Нашествие... б. 47.

<sup>4</sup> Қаранг: Хизриев Х. А. Нашествие... б. 47.

<sup>5</sup> Қаранг: Хизриев Х. А. Кўрсатилган асар. Ўша бет.

мишхоннинг қиравулини янчиб, Сунжи дарёсини жанг билан кечиб ўтади. Эртаси кечик топиш шунингдек, озиқ-овқат ва ем-ҳашак тайёрлаш мақсадида Соҳибқирон Терекнинг ўнг соҳили бўйлаб Жулат томонга юра бошлади. Тўхтамишхон ўз рақибининг дарёдан ўтишига йўл қўй-маслик учун қаравул ажратади ва бу соқчи қисм дарёнинг чап қирғоти ёқалаб мовоаруниҳарликларни тинимсиз кузатиб боради.<sup>1</sup> Иккала қўшини уч кун давомида шу алфозда аста-секин ҳарақат қилиб боради. Учинчи куни Темурбек лашкаргоҳда бўлган аёлларга дубулғалар қишишни, эркакларга эса иккитадан от олиб лашкаргоҳни тезда тарқ этишини амр қиласди. Қароргоҳда эрлар шаклига кирган аёллар, улар назоратидаги гуломлар ва асиirlардан ўзга жонзор қолмади. Тунни бедорликда ўтказган Темурбек Тўхтамишхон соқчи гуруҳининг кўзини шамгалатиб, Терекдан кечиб ўтишга муяссар бўлади.<sup>2</sup>

1395 йилнинг 14 апрель сесланба куни Тўхтамишхоннинг армиясини жанговар сағта қизиб, жанг қилиш мақсадида келаётганлигидан хабар топган Темурбек қўшиннинг манғлай (ҳиравул), барангар ва жуванғар қисмларини олға юритиб, душманга қарши боради. Шу куни ҳар бири 300 минг атрофидаги икки армия бир-бирига яқин масофага келиб, ўз қароргоҳларини ўрнатади ва тунни эртанги куни бўлажак ҳал қилувчи тўқцашув хаёлида ўтказди. Ўзининг жанг олиб бориш тамойилларига содиқ Темурбек қўшин тавачиларига ўрдugoҳning гирд айланасини мустаҳкамлаш ва ҳифзлаш, ённинг эҳтимолдан ҳоли бўлмаган тунги ҳамласини бардараф этиш чораларини кўришга амр қиласди. Қароргоҳ атрофида хандақлар қазилиб, ичига мўндулар ўрнатилади, чапарлардан тўсиқ ҳамда ғовлар бунёд этилади. Бош хандақлар олд томондан қазилган ташки хандақлар билан муҳофазаланади. Ўрдugoҳда бемақсад у ёқдан бу ёққа юриш ман қилинади.<sup>3</sup>

Жанг майдони сифатида иккала лашкарбоши ҳам ҳозирги Шчедринский ва Шелковский қишлоқлари, орасидаги, отлиқлар бемалол ҳарақат қилаоладиган кенг даштни танлайди.<sup>4</sup>

<sup>1</sup> Қаранг: *Тизенгаузен В. Г. Сборник материалов... Т. II. б. 170; Хизриев X. А. Кўрсатилган асар. Ўша бет.*

<sup>2</sup> Қаранг: *Клавихо Руи Гонсалес. Дневник... б. 143—144; Хизриев X. А. Нашествие... б. 48.*

<sup>3</sup> Қаранг: *Греков Б. Д., Якубовский А. Ю. Олтин Ўрда... 310-бет;*

<sup>4</sup> Қаранг: *Хизриев X. А. Нашествие... б. 48.*

1395 йилнинг 15 апрель чоршанба куни Темурбек ва Тўхтамишхон қўшинлари ўртасида иккинчи марта ўша даврнинг энг катта ва даҳшатли жангни бўлиб ўтади.

Соҳибқирон бу гал ҳам ўз аскарларини 1391 йилдаги жанг чогидаги жанговар тартибга тизиб, етти қўлга бўлади. Марказда қўл, унинг олдида асосий ҳиравул (манглай), ортида эса чағдавул жойлашган. Қўшиннинг ўнг қанотида барангар ва жуванғар ҳиравуллари билан ўрин олган.<sup>1</sup> Асосий ҳиравул бошқа қўлларга нисбатан олдинда юрган ва душман сафларини ёриб ўтиш вазифасини ўтаган. Чағдавул бошқа қўлларга мадад жўнатиши ҳамда қўлининг кет қисмida жойлашган олий бош қўмандоннинг кузатув таянчини муҳофаза қилиши керак бўлган. Шундай қилиб, асосий кучларни ҳимоя қилувчи қисмларни янчib ўтган қарши томон албатта, бошқа қисмларнинг зарбасига дуч келар эди<sup>2</sup>.

Биринчи қатор енгил қуролли жангчилардан ташкил-тоған бўлиб, асосан жангни бошлаб бериш, душман сафларини пароканда қилиш ва саросимага солиш билан банд бўлар эди. Оғир қуроллар билан қуролланган иккинчи қатор душманинг асосий зарбасини даф этишга мўлжалланган эди. Марказда жойлашган қисм, яъни қўл (гул) қўшиннинг ўзагини ташкил этар ва жангнинг тақдирини кўп ҳолларда ҳал қиласр эди. Қалъя ва қўргонларни қамал қилишда, мудофаа жанглари олиб бориша қўл қилувчи пиёда аскарлар бош ҳиравул (манглай), қўл, барангар ва жуванғар олдидан ўрин олади. Ўнг ва сўл қанотларнинг илгор қисмлари ҳамда чағдавул фақат суворийлардан иборат эди.

Тактик назардан бу ҳарбий қўшилмалар мустақил равишда ҳаракат қиласр ва фақат олий бош қўмандонгагина бўйсунар эди.<sup>3</sup>

Ясолнинг бу тартибда тузилиши бир қатор афзалликларга эга эди. Биринчидан, у отлиқ ва пиёдаларнинг ёвга ёпирилиб, кучли зарба бериш, тинимсиз ҳужум учун қулай вазият яратиш, иккинчидан, ҳиравул ҳамда чағдавул паноҳида қўшиннинг икки қаторга тизилиши айланна мудофаанинг мустаҳкам бўлиши имкониятини турған.

<sup>1</sup> Қаранг: Греков Б. Д., Якубовский А. Ю. Олтин Ўрда... 311-бет; Хизриев X. А. Нашествие... б. 49.

<sup>2</sup> Қаранг: Заходер В. И. Империя Тимура //Исторический журнал. 1941, № 6. б. 86. Хизриев X. А. Нашествие... б. 49.

<sup>3</sup> Қаранг: История Узбекской ССР. В 4-х т. Т.1., Ташкент, 1967. б. 455. Хизриев X. А. Нашествие... б. 49.

дирад, душманнинг қанотдан ёки айланиб ўтиб, орқа томондан зўр беришига тўсқинлик қиласар эди.<sup>1</sup>

Темурбек қўллаётган ҳарбий усульнинг устун томонларини 1391 йилги жанг чоғида пайқаб олган Тўхтамишхон ҳам ўз армиясини жанггоҳда худди рақибидек жойлаштиради.


Чоршанба куни қуёш ўз заррин нурларини ер юзига сочиши билан маърака майдони жунбушга келади. Қашрама-қарши томон қўшинлари жанговар байроқларни қўтариб, такбир нидосини айтиб, бир-бирига юзланади. Жанг муқаддимаси Олтии Ўрдаликларнинг Кунча ўғлон, Бек Ёрлиқ ўғлон, Оқтау, Довуд Суфи ва Уదуркү қўмондонлигидаги қўшилмаларининг Соҳибқирон қўшинининг жувангарига қаттиқ ҳужуми билан бошланади.<sup>2</sup> Сўл қанотнип қўқисдан берилган зарба натижасида оғир аҳволга тушиб қолганлигидан воқиф бўлган Темурбек ўз ихтиёрида олишувга шай турган йигирма етти сараланган қисмдан кўмак ажратади. Мададга ўз вақтида етиб келган аскарлар душман шиддатини қайтариб, қарши ҳужумга ўтади ва ёвни қочишга мажбур этади. Қочаётганларни таъқиб қилишга қизиқиб кетган анчагина суворийлар жанггоҳдан узоқлашади. Рақиб жангчиларининг йўл қўйган тактиқ хатоси натижасида вужудга келган вазиятдан фойдаланган Тўхтамишхон ўз сарфларини қайта тартибга солиб, таъқибчиларга зўр беради ва уларни тарқатиб юборади. Қутилмагандага Темурбек қўл остида турган қисмлар душман исканжасига тушиб, Соҳибқироннинг ҳаёти хавф остида қолади. Шарафуддин Али Яздийнинг тасвирилашича, Темурбекка биринчи бўлиб кўмакка етиб келган амир Шайх Нуруддин бошчилигидаги отлиқлар зудлик билан отдан тушиб, ёпирилиб келаётган хон аскарларини ёйлардан отилаётган шиба ўқи билан тўхтатади. Муҳаммад Озод, унинг биродари Алишоҳ ва Тўкал бавурчи каби амирлар араваларни бир-бирига боғлаб, *куран* ясадилар.<sup>3</sup> Темурбек шу аравалар, улар устига қўйилган ҳура ва чопарлар паноҳида бўлади. Айлана мудофаада қолган Темурбекка Аллоҳдод, Зирбек Жаку, Хусайн Малик қавчий бошлиқ аскарлар бўлим-бўлим, фавж-фавж бўлиб ёрдамга кела-

<sup>1</sup> Қаранг: *Хизриев X. A. Нашествие...* б. 50.

<sup>2</sup> Қаранг: *Хизриев X. A. Нашествие...* б. 51.

<sup>3</sup> Қаранг: *Тизенгаузен В. Г. Сборник материалов...* т. II. б. 176; *Хизриев X. A. Нашествие...* б. 51.

## Тўхтамиш армиясининг жанговар тартиби



## Темурбек армиясининг ясоли

бошлайди. Бироқ, Тўхтамишхон қўшинининг ҳамласи борган сари кучая боради. Қўлдан кўмакка ташланган Муҳаммад Султон баҳодир мирзо ҳамда Устайбек қўмон-донлигидаги кучли қисмларнинг жангга кириши ва айниқса, амир Жаҳоншоҳ ва амир Ҳожи Сайфуддин қўл остидаги аскарларнинг пистирмадан туриб Тўхтамишхон

армиясининг жуванғарига кучли зарба бериши вазиятнинг маълум даражада яхшиланишига сабаб бўлади.<sup>1</sup>

Жангнинг иккинчи куни яна Тўҳтамишхон қўшинининг ҳужуми билан бошланади. Хон Исабий ва Бахши Ҳожи қисмларидан ташкил топган жуванғарини муҳорабага ташлайди. Темурбекнинг ҳиравулини улоқтириб ташлашга муваффақ бўлган бу қўшин қаноти Соҳибқирон барангарида жойлашган амир Ҳожи Сайфуддин туманини *кўриб* олади ва тўзитиб юборади. Бир қанча жангчиларнинг тарқалиб кетганилигидан саросимага тушмаган амир Ҳожи Сайфуддин туманинг қолган қисми билан қаршилик кўрсатишда давом этади.

Ўз сафдошларининг отлардан сакраб тушиб, тиз чўккан ҳолда ғаним устига ўқ ёғдираётганлигини кўрган аскарлар орқага қайтиб, улар сафига қўшилади. Жангнинг кескин пайтида қийин аҳволда қолган бу туманга амир Жаҳоншоҳ баҳодир, Темур Ҳожа Оқбуға ва Рустам баҳодир мирзолар мадад қўлини чўзади. Кечгача давом этган жанг ҳеч бир томоннинг устунлигисиз тўхтайди.

Жангнинг сўнгги учинчи куни яна Олтин Ўрдаликларининг кучли ҳужуми билан бошланади. Тўҳтамишхон отлиқ ва пиёданси сафга тизиб, марказ ва қанотларни қўшимча кучлар билан мустаҳкамлаб, ташаббусни ўз қўлига олиш илинжида жасур ва сараланган аскарларни рўпарадан ҳужумга ташлайди.<sup>2</sup> Айни пайтда хоннинг ишончли саркардаларидан бири Яғлибой ҳам жуванғар билан жангга киради. Темурбек бу жуванғарнинг анча заифланиб қолганини сезган ҳолда асосий зарбани унга қаратади. Темурбек жангчиларининг шиддатли ҳужумларига бардош беролмай пароканда бўлган хон аскарлари қочишга тушади.<sup>3</sup> Тўҳтамишхоннинг жуванғари Усмон баҳодир бошчилигидаги Темурбек барангари томонидан яксон қилиниб, улоқтириб ташланади. Яғлибой Усмон баҳодир билан бўлган яккама-якка олишувда ҳалок бўлади.<sup>4</sup> Жанггоҳнинг бошқа жойларида ҳам Соҳибқирон кучларининг қўли баланд кела бошлайди.

Нихоят, Темурбек бутун жанг майдони бўйлаб ҳал қилувчи ҳужумга ўтади. Уч кун давом этган шафқатсиз

<sup>1</sup> Қаранг: *Хизриев* X. A. Нашествие... б. 51—52.

<sup>2</sup> Қаранг: *Тизенгаузен* В. Г. Сборник материалов... т. II. б. 465, 466; *Хизриев* X. A. Нашествие... б. 58.

<sup>3</sup> Қаранг: *Тизенгаузен* В. Г. Сборник материалов... т. II. б. 208; *Хизриев* X. A. Нашествие б. 53.

<sup>4</sup> Қаранг: *Хизриев* X. A. Кўрсатилган асар. Ўша бет.

кураш натижасида тинкаси қуриган Олтин Ўрда армиязи қаршилик кўрсатишга мадори қолмайди ва узил-кесил мағлубиятга учрайди.<sup>1</sup> Тўхтамишхон жанг майдонини хослари паноҳида ташлаб қочишига ултиради.<sup>2</sup> Темурбекнинг ушибу даҳшатли тўқишаув чоғида жуда танг аҳволга тушиб ундан фақат бор истеъдод, гайрат ҳамда кучни шуга солиб шараф билан чиқиб кетиши унинг құдратли ҳарбий күчга эга бўлган, салоҳиятли саркарда билан қарама-қарши келганилигидан далолатdir.

Ибн Арабшоҳнинг ёзишича, Тўхтамишхон армиясининг мағлубиятга учрашига унинг сафидағи баъзи бир лашкарбошилар ўртасидаги ихтилоф ва ниғоқ маълум даражада сабабчи бўлади. Жангнинг учинчи куни иккала қўшин бир-бирига юзма-юз келиб, жанг бошланиш олдида Даشتி Қипчоқ қўшини баранғари қўймондонларидан Оқтау бошқа бир қисм сардорида бор бўлган хунини ташлаб қилиб, хондан ўша нўённи ўлдириш учун ижозат сўрайди. Бироқ, Тўхтамишхондан рад жавобини олган Оқтау жizzакилик қилиб, жанггоҳни ўз аскарлари ва қабиладошлари билан ташлаб кетади. Бу қабила Рум ерлари томон йўл олади ҳамда Андрианопол атрофидағи музофотларга ўрнашади. Бу хиёнат Олтин Ўрда хонининг кучини заифлаштириб, қолган қисм аскарларини саросима ва ваҳимага солади.<sup>3</sup>

Темурбек хоннинг ўрдugoҳида ташлаб кетилган жуда катта хазина ва бойликка эга бўлади. Соҳибқирон жангда алоҳида ўрнақ кўрсаған саркардалар, баҳодирлар ва жангчиларга ўлжани тақсимлаб, ўзи итилнинг қуи тоғонларига қараб чекинган Тўхтамишхонни қўлга тушириш ҳамда унинг Дон (Тан), Днепр (Узи) Қrim ва Марказий Кавказ тоғларидан паноҳ тонган қолган-қутган гуруҳларини йўқ қилиш ниятида душманининг кетидан тушади.

Бу гал Темурбек жанг натижаси билан киғояланиб қолмасдан Олтин Ўрда давлатининг асосий ҳудудлари бўйлаб ҳаракат қилишни режалаштиради. Шимолий Кавказдан тезлик билан йўлга чиққан Соҳибқирон Итил ва Дон дарёлари оралиғида юриб, ҳозирги Волгоград

<sup>1</sup> Қаранг: *Тизенгаузен В. Г.* Сборник материалов... Т. II. б; 121, 178.

<sup>2</sup> Қаранг: *Тизенгаузен В. Г.* Сборник материалов... Т. II. б; 465, Греков Б. Д., Якубовский А. Ю. Олтин ўрда... З12-бет.

<sup>3</sup> *Ибн Арабшоҳ.* Ажойиб ал-мақдур... I китоб. 155-бет.

шаҳри яқинидаги Туратур кечуви орқали Итилдан ўтиб, Олтин Ўрданинг XIII аср ўрталарида қурилган Ўқак шаҳри томон юзланади. Шаҳарни эгаллаб, торат қилган Темурбек қўшини хонни Итилнинг юқори оқими бўйлаб таъқиб қилишда давом этади<sup>1</sup>.

Булғория орқали Лицва қироли Витовт ҳузурига кетишга улгирган Тўхтамишхон<sup>2</sup> изини йўқотиб қўйган таъқибчилар Самара кечигидан бошланувчи йўл бўйлаб гарбга бурилади.

Маълум масоғадан сўнг жануби-гарб тарафга қараб от жиловини бурган Соҳибқирон қўшини Днепрнинг чап соҳилида жойлашган шаҳарлардан ўтиб, Қrim яриморли сарҳадларида пайдо бўлади<sup>3</sup>.

Шундан сўнг Темурбек Рус ерларига қадам қўяди. Йўл-йўлакай Олтин Ўрда зодагонларидан бирининг ҳарбий кучларини қуршовга олиб, тор-мор этган қўшин Дон дарёсининг юқори оқимида жойлашган Елец шаҳрини эгаллайди<sup>4</sup>. Доннинг сўл қирғоғига кечиб ўтган Темурбек сафар давомида улкан ўлжаларни қўлга киритиб, қўйи Повольже бўйидаги Балжаман шаҳрига, у ердан Дон ёқалаб Азов (Азақ)га келади. Қўшин юришда давом этиб, Азовдан Кубан чўлларига қараб жўнайди.

Шарафуддин Али Яздийнинг қайд этишича, Темурбекнинг елдай учиб келишидан таҳликага тушган черкаслар Азов билан Кубан ўртасидаги яйловга ўт қўйиб юборади. Бир неча кун давомида мовароуннаҳрликларнинг ем-ҳашак йўқлигидан қаттиқ азият чеккан от-уловлари ҳолсизланади, юриш сурати сусаяди. Бундан даргазаб бўлган Соҳибқирон черкасларнинг адабини бериб қўйиш мақсадида уларнинг юртларини хонавайрон қиласди.<sup>5</sup>

Манбаларнинг хабар беришича, Олтин Ўрда шаҳар ва қишлоқлари бўйлаб Темурбек қўмондонлигидаги бош кучлар билан бир қаторда бопиқа нисбатан кичик ҳарбий қисмлар ҳам ҳаракат қилган<sup>6</sup>.

1395 йилнинг қаҳрамон қишида Соҳибқирон армияси Олтин Ўрданинг йирик шаҳарлари Ҳожитархон ҳамда

<sup>1</sup> Қаранг: Греков Ҷ. Д., Якубовский А. Ю. Олтин Ўрда... 313-бет; Хизриев Х. А. Нашествие... б. 54.

<sup>2</sup> Қаранг: Хизриев Х. А. Нашествие... б. 53.

<sup>3</sup> Қаранг: Тизенгаузен В. Г. Сборник материалов... Т. II. б. 185.

<sup>4</sup> Қаранг: Греков Ҷ. Д., Якубовский А. Ю. Олтин Ўрда... 315-бет.

<sup>5</sup> Қаранг: Тизенгаузен В. Г. Сборник материалов... Т. II. б. 180.

<sup>6</sup> Қаранг: Греков Ҷ. Д., Якубовский А. Ю. Олтин Ўрда... 313-бет.

Сарой ал-жадид тарафига қараб сафарга отланади. Иккала шаҳар ҳам айтарли қаршиликсиз таслим бўлишига қарамай батамом таланади ва ёкиб юборилади.<sup>1</sup>

1396 йилнинг баҳорида Темурбекниг ғолиб армияси Дарбанддан ўтиб Озарбайжонга қараб юзланади.

Шундай қилиб, бир йил, яъни 1395 йилнинг кўклинидан 1396 йилнинг баҳоригача ўтган вақт ичидаги Соҳиб-қирон томонидан «Олтин Ўрданинг қудратини ва унинг улуғ давлатчилик сиёсатини қайта тиклаш»<sup>2</sup> мақсадида сиёсий майдонга чиққан Тўхтамишхоннинг мавжуд иқтисодий, ижтимоий ва ҳарбий имкониятлари барбод этилди. Темурбек берган бу кучли зарбадан сўнг Олтин Ўрданинг аввалги қудратини қайта тиклашга қурби етмади.

## ҲИНДИСТОН ФАТҲИ

Низомуддин Шомийнинг «Зафарнома», Гиёсуддин Алининг Темурбекнинг Ҳиндистонга юришига багишланган тарихий асарида битилишича, 1395 йили Тўхтамишхонни мағлуб этган Темурбек Самарқандга қайтади ва қипп фаслини Оҳангаронда ўtkазади. Шаҳзода Пир Мұхаммадни Мўғилистонга ҳоким этиб тайинлаб, чегараолди ҳудудларни мустаҳкамлашни, Хитой ва Хўтанга қилинажак юриш учун озиқ-овқат ва ем-хашак жамғаришни буюради. Шу орада унга Ҳиндистонда исломнинг мавжудлиги, бироқ у ердаги аҳолининг асосий қисмини маъжусийлар ташкил қилиши, мусулмон ҳокимлар будпраст оммадан фақат ўлпон йигиш билан кифояланаётгани ҳақида бирии-кетин хабарлар кела бошлади. Маъжусий қароқчиларнинг ёвуз ниятларига чек қўйиш, мўминларни улар ўтказаётган зулмдан озод қилиш, савдогар ва сайёҳларнинг хавф-хатарсиз келиб-кетишини таъминлаш каби мақсадларда Темурбек Хитой ва Хўтанга қилиниши лозим бўлган юриш ўрнига Ҳиндистон томони қўшин торгради.

1398 йилнинг 15 августида Темурбек қўшини билан

<sup>1</sup> Қаранг: *Тизенгаузен В. Г. Сборник материалов... Т. II. б. 184—185; Греков Б. Д., Якубовский А. Ю. Олтин Ўрда... 317-бет; Егоров В. Л. Историческая география... б. 119. Ртвеладзе Э. В. О походе Тимура на Северный Кавказ. Археолого-этнографический сборник. т. VI. Грозный, 1976, б. 103—128.*

<sup>2</sup> Б. Д. Греков, А. Ю. Якубовский. Олтин Ўрда... 288-бет.

Қобул бўсағасида тўхтайди. Сафарда Соҳибқиронга Сарой Мулк хоним, Улугбек мирзо ва бошқа шаҳзодалар ҳамроҳлик қиласиди, йўл мاشаққатининг оғирлиги, айниқса Ҳиндистоннинг жазирама иссиқ ва гармсельнинг аёллар ҳамда ёш болалар соғлигига ёмон таъсир қилишидан хавотирга тушган Темурбек Маҳди улё Сарой Мулк хоним ва Улуғбекни доруссалтана Самарқандга қайта-ришга қарор қиласиди. Шу кунлари Чигатой улусининг хони Маҳмудхон ибн Суюргатмишон Султон Ҳусайн баҳодир, Рустам баҳодир, Жаҳоншоҳ баҳодир, Ғиёсуддин тархон, Хамза Тоғайбўға барлос, амир Шайх Арслон, амир Суюнжак баҳодирлар ҳамкорлигига Темурбек қароргоҳига келади ва Ҳиндистон сафарида иштирок этишга жазм қилганлигини билдиради.

1398 йилнинг 23 августида Темурбек қароргоҳига Темур Қутлуг, Идику ҳамда Хизр Ҳожаларнинг элчилари ташриф буюради. Элчилар ҳурмат-эҳтиром билан қарши олинади. Элчиларга зарбоғ тўйлар кийдирилиб, уларнинг шарафиға базм берилади. Ўша куни Темурбекнини эътиборли амирларидан Сариқбўғанинг ўғли, фаросатли, мардлиги ва садоқати туфайли Форс вилоятининг друғаси лавозимиға тайинланган Шайх Нуруддин Муҳаммад ўрдugoҳга келади. Соҳибқирон лашкари тушган юртга тортиқ сифатида олиб келинган ов қушлари, олтин билан безатилган этгар-жабдуқлар, ажойиб қурол-яроглар, кийим-кечаклар, қимматбаҳо тошлилар, тилла ҳамда кумуш буюмлар йигилганларни лол қолдиради Девон муншийлари — дафтардорлар уч кун давомида келтирилган тұхфаларни рўйхатга олиб дафтарга битадилар. Шайх Нуруддин Темурбекнинг олқишига сазовор бўлиб, шоҳона совғалар билан сарафroz этилади.

Ағонлар томонидан вайрон этилган Эрёб қалъасини ўн тўрт кун ичида қайта тиклашга улгирган Темурбек у ердаги жомеъ масжидни таъмирлаш ва жиҳозлаш ишларни ниҳоясига етказиш вазифасини амир Шоҳмалин зиммасига юклаб, юришни давом эттиради.

20 сентябр куни Темурбекнинг қўшини Синд дарёси қирғигига етиб келади. Дарёга мўгулча кўприк солиши ҳақида олий фармон берилади ва кўприк зудликда битирилади. Шу куни қўшини ва йироқ давлатлардан келгав элчилар, жумладан Макка ҳамда Мадинадан ташриф буюрган элчи Муҳаммад Маданийга ўз ватанларига қайтишига ижозат берилади. 24 сентябрда музaffer қўшин Синдан кечиб ўтади ва Чўли Хусрав мавзеида тўхтайди.

Қисқа муддатли дамдан сўнг йўлга чиққан қўшин б оқтабрда жуда кенг ва чуқур Чинора дарёси ёқасига тушиди.

Уч кун мобайнида қайиқлар ёрдамида боғланган қўприк орқали қўшин қарши қирғоққа ўтади. Октябрнинг 13 куни Талмин шаҳри атрофлари Темурбек қўшинининг ранг-баранг байроқ ва яловлари билан безалади. Омонлик тилаган шаҳар халқига икки юз минг бош қорамол ҳисобида солиқ солинади. Итоатдан бўйин товлаган баъзи талминлик фуқароларни қаттиқ жазолаган Темурбек 19 октябр куни Баёқ дарёси қирғогида жойлашган Жол мавзеида қўнади. Ушбу манзилда Темурбекка томимийлик Нусрат исмли шахс бир неча минглик аскарлари билан истеҳкомда турганлиги тўғрисида маълумот келади. Соҳибқирон шу ондаёқ қўшинни сафга тизади ва ғанимга қарши юради. Барангарда амир Шайх Нуруддин ва амир Аллоҳдод, жувангарда амир Шоҳмалик ва амир Шайх Муҳаммад Ику Темур, қўлда Султон Али тавачи хурросонлик пиёдалар билан ҳаракат қиласиди. Иккала қўшин орасида даҳшатли жанг содир бўлади. Нусрат қисмлари айниқса, қўлга кучли зарба беради. Қўлнинг қўмондони Султон Али ва қатор амирлар яраланади. Жанг Шайх Нуруддин ва Аллоҳдод бошчилигидаги ўнг қанот аскарларининг душманни ён томондан айланиб ўтиб, қуршовга олгунига қадар давом этади.

Қайсар ёвни мағлуб этган Темурбек аскарлари 21 октябрда Жол кўлидан кўп машаққат ва қийинчиликлар билан ўтиб, Шоҳнавоз номли манзилда тўхтайди. Бир неча беклар раҳбарлигидаги қувгунчи гуруҳлар жангдан қочган Нусрат тарафдорларини таъқиб этиши учун жўнатилиади. 1398 йилнинг 24 октябрида Шоҳнавоздан кўчилиб, Жанжон қишлоғи қаршисида оқувчи Баёҳ дарёси қирғогида тушилади. Қўшин икки кун давомида бу дарёдан кемада ўтади. Баъзи бир шижоатли аскарлар тўлқинлари жўш уриб турган Баёҳдан эсон-омон сузиб ўтишга муваффақ бўлади. 25 октябр куни Мултондан Пир Муҳаммад баҳодир мирзо Жанжондаги Темурбек лашкаргоҳига ташриф буюради. Орадан тўрт кун ўтгач, амирзода катта зиёфат беради ва бобоси Темурбекка арабий аргумоқ отлар, тилла камарлар, идиш-товоқлар, эгар-жабдуқлар, аёқлар, кийим-кечаклардан анъана га кўра тўққиз-тўққиз тарзда *пешкашлар* қиласиди. Пешкашларнинг сони икки кун давомида мунцийлар ва дафтардорлар қомонидан ҳисобга олиниб, рўйхатга битилади.

Соҳибқирон набираси келтирган тортиқларнинг барчасини амирларга, вазирларга, хосларга унвонига ва тутган мавқеига қараб бўлиб беришни буюради.

Мултон қалъаси ва унинг атрофидаги мавзеларни забт этиш чорида Пир Муҳаммад баҳодир мирзо бошлигидаги лашкар оғир қийинчиликларга дуч келади. Сурункали давом этувчи ёмғир мавсуми натижасида юзага келган лойгарчилик қўптина от-уловларни ишдан чиқаради. Қўшиннинг ҳаракати чекланиб қолади. Вазиятдан фойдаланган ёғи ҳам тез-тез ҳамла қила бошлиайди. Бироқ, Соҳибқирон сардорлигидаги улкан қўшиннинг ўз вақтида етиб келиши мирзо Пир Муҳаммад баҳодирнинг мушкилини осонлаштиради. Темурбекнинг фармонига кўра Пир Муҳаммадга ўтиз минг от берилади. Натижада уловсиз қолган суворийлар қайтадан отга эга бўлади.

Ноябр ойининг иккинчи куни Темурбек қўшини Ҳимивол мавзеида қўнади ва бу ердан Темурбек бир тумаң отлиқ аскарлари билан Ажудан шаҳри томон илгаб юради. Амир Шоҳмалик ва Давлат Темур тавачи Диболбурга йўналиш учун лашкаргоҳда қолдирилади. 4 ноябрда Ажудан шаҳри жангсиз қўлга киритилади. Шариат пешволаридан мавлоно Носируддин Умар шаҳарга доруга этиб тайинланади. Шу куни Темурбек Ҳиндистоннинг йирик дарёларидан ҳисобланмиш Ажудандан ўтиб, Холисгири қалъасига етиб келади. Пешин намозини адо этган Соҳибқирон 100 км. узоқликда жойлашган Битнир қалъаси сари равона бўлади. Режалаштирилган мақсадга иложи борича тезлик билан эришип йўлида Темурбек бир дақиқа бўлса ҳам ором билмайди. Кунни тунга улган Соҳибқирон қайд этилган масофани тўхтамасдан босиб ўтади ва мўлжалдаги жой, яъни Битнирга 6 ноябр куни икки минг суворийдан иборат қисм билан етиб келади.

Битнир қалъаси Ҳиндистоннинг энг мустаҳкам қўргонларидан бири бўлиб, унга рожа Дулжин ҳокимлик ва қўмандонлик қиласар эди. Рожанинг қўл остида катта миқдордаги лашкар жам бўлиб, ҳар қандай ташқи ҳужумни бартараф этишга шай турад эди. Қалъанинг мустаҳкамлигидан, қўшиннинг қўп сонлилигидан бамайлихотир бўлган рожа Темурбекка қарши жанг қилишга қарор беради. Соҳибқирон қўшини ҳам сағ тортиб, жангроҳга қараб йўл олади. Барангарга Сулаймоншоҳ, Шайх Нуриддин ва Аллоҳдод, жувангарга Ҳалил Султон мир-

зо, Шайх Мұҳаммад Иқу Темур ва ўзга амирлар раҳбарлық қилади. Дастребки ҳамладаёқ қалъа останасидаги истеҳкомлар қўлга олинади. Аммо, биринчи куни ҳиндуларнинг жон-жаҳди билан қаршилик кўрсатуви сабабли қалъани забт этишга мусассар бўлинмайди.

Қамалдагиларни осонгина бўйсундириб бўлмаслигини фаҳмлаган Темурбек, қалъани қамал қилишни, ҳар амир ўз қисми жойлашган позиция — *бўлжардан* истеҳком сари ер ости йўли — *нақб* қазишни амр қилади. Темурбек аскарлари амалга ошираётган ишни қалъа деворлари устидан ва буржу борулаидан кузатиб турган ҳиндулар қаршилик кўрсатиш бефойда эканлигини тушуниб етадилар, уларнинг улуглари Соҳибқирон қошига бўйин эгиб келиб, омонлик беришни илтимос қиладилар. Темурбек уларнинг илтимосини қондиради. Рожа Дулжин қалъадан ўз муовини ва ўғлини турли-туман тухфалар — лочинлар, арабий аргумоқлар, зебу зийнатлар билан Темурбек қароргоҳига жўнатади. Соҳибқирон уларнинг иккаласига зарбоғ тўйлар, олтин билан безатилган шамширлар ҳадя этади ва қалъага қайтиб кетишига ижозат беради.

8 ноябр куни қалъадан Шайх Саъдуддин Ажудоний ҳамроҳлигида чиққан рожа Дулжин Темурбек қароргоҳига келади. Соҳибқиронга ов қушлари, олтин билан безатилган эгар-жабдуқлар, тубучоқлар пешкаш қилинади. Барча беклар, амирлар ва амирзодаларга саман отлар ҳадя этилади. Ўз навбатида рожа ҳам зарбоғ тўн, мурассаъ қамар ва тоҷ билан тақдирланади. Битнир қалъасидан 13 ноябряда йўлга чиққан Темурбек қўшини бир қанча манзилларни босиб ўтиб, аҳолиси тум-тарақай қочиб кетган Фатҳобод қўргони атрофида тўхтайди. Қочоқлар ортидан қувгинчилар тайин қилингач, 17 ноябряда бу ердан отларга минилиб, Раҳтиур истеҳкомидан ўтилиб, Аҳруний қалъасига етилади ва шу манзилда қўшин бўлжари белгиланади. Эртасига сафар ҳаракатлари давом эттирилади. Тухна мавзеи зафарли қўшин туғлари билан безалади. Бу ерниг аҳолиси ҳам Темурбекнинг келаётганлигидан хабар топиб яшаш жойларини тарқ этган, атрофдаги дашт, ўрмон, ва тогу тошлардан паноҳ тонган эди. Мавлоно Носируддин Умар ва Таваккал Қарқара қўмандонлигидаги таъқиб учун жўнатилган отлиқ гуруҳ қочоқларнинг бир қисмини қиличдан ўтказиб, бир қисмини асир олиб, анчагина қорамолни ўлика қилиб келади. Орадан икки кун ўтгандан сўнг Соҳибқирон Тух-

нани тарк этди. Сулаймоншоҳ баҳодир бошчилигидаги ўғруқни Сомона шаҳри томон жўнатган Темурбек яширинингга улгирган життонларни жазосини бериш мақсадида от суради.

24 ноябрь куни Темурбек қўшини Сомона шаҳри яқинидан оқувчи Кўҳгар дарёси бўйида ўғруқ билан қўшилади ва тўрт кун давомида шу ерда муқим туради. 25 ноябрда Темурбек отлапиб Пули Кўйлагага етиб келади ва илгор учун тўрт томонга юриш қилган Султон Маҳмудхон, Султон Ҳусайн баҳодир мирзо, Рустам баҳодир, Фиёсуддин тархон, Жаҳоншоҳ мирзо, Шайх Арслон, Ҳамза Тоғайбўға, амир Мубашир Сунжиқ баҳодир раҳбарлигидаги қўшин билан қўшилади. Тонгласи Пули Кўйладан эсон-омон ўтилиб, Шоҳмалик раҳбарлигига етиб келган ўғруқ билан дийдор кўришилади. Шундан сўнг Соҳибқирон қўшинни жанговар тартибга тизиб, Деҳли шаҳри сари равона бўлади. Барангарда Пир Муҳаммад баҳодир мирзо, Рустам баҳодир мирзо, Ҳалил Султон мирзо, Сулаймоншоҳ баҳодир мирзо,, амир Шайх Нуруддин баҳодир, Мизроб мирзо, Ёдгор барлос ва ҳоказо амирлар, жувангарда Султон Маҳмудхон, Султон Ҳусайн баҳодир, Жаҳоншоҳ баҳодир мирзо, амир Шоҳмалик, Шайх Арслон, Шайх Муҳаммад Йку Темур, Суюнжак баҳодир, қўлда ўнг минг аскардан иборат гвардия — *соңсиз*, Аллоҳдод, Али Султон тавачи ва бошқа туманларнинг саркардалари йигирма қуруҳ (40 км) масофада ҳаракат қилиб боради.

Қалъаи Асинди ва Туглуқпур ҳисорини йўл-йўлакай забт этган улкан қўшин 2 декабр куни кимсасиз қолган Панипатга етиб келади. Шаҳар омборларида сақланаётган катта миқдордаги ғалла сипоҳга ва муловзимларга олий фармонга биноан тақсим қилинади. Орадан икки кун ўтгач, барангар ва жувангар қўмандонлари биргаликда қисмларнинг қурол-яргларини, кийим-кечакларини назардан ўтказадилар. 6 декабр куни барангар беклари Деҳли шаҳридан 2 фарсанг масоғадаги Жаҳонумой мавзеигача бўлган жойларга ҳужум қилиш ҳақида Темурбек буйругини бажаришга киришади. Ҳужум чоғида кўплаб мажусийлар талон-тарож қилинади, асир олинади. Улкан ғаниматни қўлга киритган аскарлар ғолибона ва шодиёна аскаргоҳга қайтиб келади.

9 декабрда Соҳибқирон Жаун дарёсидан кечиб ўтиб, теварак-атрофи ям-япил ўтлоқ билан қопланган

Луни қалъаси яқинида тушади. Аввалроқ қалъа-га жангү жадалсиз таслим бўлишни таклиф этиш мақсадида Жаҳоншоҳ, Шоҳмалик ва Аллоҳдод юборилган эди. Лекин, бу ердаги Маллухоннинг тарафдорлари таклифни қабул қилмай қаршилик кўрсатишни маъқул кўради. Қалъа аҳлиниңг бундай қароридан бохабар бўлган Темурбек зудлик билан қалъагирлик асбларини шайлашни, тўш-тўшдан нақблар қазишни амр қилади. Хуфтон намози вақтида қалъа таслим бўлади. Ичкаридаги мажусийларнинг аксарияти ўз хотин-халажи, бола-чақаси ва уй-жойини ёқиб юборади. Темурбек қўшини тунни қалъа ташқарисида ўтказади. Эртасига қўргонда уруш ҳаракатларини давом эттираётган Маллухоннинг содиқ навкарлари Соҳибқирон аскарларининг шиддатли ҳамласига бардош беролмай яксон бўлади. Қалъа горат қилинади.

Декабрнинг 11 куни Темурбек Луни қалъасини тарк этиб, Жаҳоннумой яқинидаги Жаун дарёси қирғоғи бўйлаб юришини давом эттиради. Дарёдан гузар топилгач, орқага қайтишга ва ўрдугоҳга тушишга буйруқ берилади. Бу ерда қўшин икки кун ором олади.

Рабиул — охир ойининг биринчи куни, яъни 11 декабрда Соҳибқирон амир Сулаймоншоҳ баҳодир ва амир Жаҳоншоҳ баҳодирларни Деҳли шаҳрининг жанубида жойлашган юртларни горат қилиш учун жўнатади. Ўзи эса етти юзтacha зириҳпўшлар ҳамроҳлигида Жаҳоннумой атрофларини синчиклаб кўздан кечиради, жойнинг тузилишига, у ердаги обьектларнинг мавжудлигига дикқат-эътиборни қарағади. Кузатув ниҳоясига етгач, Темурбек бўлажак жанг майдонининг ўрникини белгилайди. Шу орада Маллухон таҳминан тўрт минг отлиқ ва беш минг ииёда аскарлар ҳамда йигирмата фил билан қалъадан ташқари чиқиб, Темурбек қўшинига қарши кела бошлияди. Жаун дарёси ёқасида турган Суюнжак баҳодир ва Сайийд Хожа мубашишр бошчилигидаги уч юз кишидан иборат турӯхни ҳиндлар ўққа тутади. Кўмак учун етиб келган икки катта мададкор қисм Маллухон лашкарига селдай ёширилиб, дастлабки ҳужумдаёқ ғанимни Деҳли томон юз ўгиришга мажбур этади. Тартибсиз чекинаётган рақибини тезкорлик билан таъқиб этган Соҳибқирон ўзининг осмонўпар саропардасини 1398 йилнинг 11 декабрида Деҳли шаҳри бўсағасидаги мавзеда тикиди.

13 декабр куни Темурбек Луни қалъасининг шарқро-

ғида лашкаргоҳ қуришни ҳукм қилади. Соҳибқироннинг баргоҳида машварат бўлиб ўтади.

Ҳарбий кенгашда юришда иштирок этаётган амирзодалар, улуг амирлар, қўшун, туман сардорлари, аркони давлат ҳамда гуломлардан ташкил қилинган, ўн минг кишидан иборат олий бош кўмандоннинг шахсий гвардияси ҳисобланмиш соңсиз иштирок этиш шарафига муяссар бўлади. Темурбек машваратда кутилаётган даҳшатли жангни олиб бориш, ғаним билан жангга кириш, унинг сарғларини орқа томондан айланаб ўтиб бузиш, саваш гирдобидан қандай чиқиш тартиб ва қоидаларини бамайлихотир аниқ ва равшан ҳамда тушунарли ифода этади. Ҳарбий ҳаракатларнинг муқаддимаси ва якунининг қай маромда бориши ишонч билан таърифланади. Ҳираувул, барангар, жувангар қўл, чағдавулнинг ва соңсизнинг жанггоҳдаги ўрни аниқ кўрсатилади. Бу қисмларнинг жанг чоғида амалга оширадиган вазифалари, дushman ҳамласини қайтариш ва қайта хужумга ўтиш усуллари белгиланади. Соҳибқирон баён этаётган фикр — мулоҳазалардан унинг бўлажак жангда ғалаба қозонишига имони комиллигини сезиб турган машварат аҳли ҳарб ишидаги бор билим ва тажрибаларини ишга солиб, зафар байрогининг янада маҳбобатлироқ ҳилпирашига ўз ҳиссаларини қўшишга якжиҳатлик билан аҳд қиладилар.

Ушбу кун тарих машъум бир воқеанинг шоҳиди бўлади. Йирик лашкарбошилар ва мирзоларнинг Синд дарёси қирғоқларидан Деҳли остонасигача бўлган сафар пайтида асир қилинган юз мингдан ортиқ мажусий ҳиндудларнинг Султон Маҳмудхон билан кутилаётган жангда ўз юртдошлири томон оғиб, Соҳибқирон сипоҳига ортдан хавф солиши эҳтимолдан ҳоли әмаслиги, шу сабабли уларнинг бағридан ўтиш мақсадга мувофиқ, деган фикрлари Темурбек томонидан инобатга олинади.

Натижада ўрдугоҳга жам бўлган тутқунлар ёппасига қиличдан ўтказилади<sup>1</sup>.

15 декабрда Темурбек бошчилигидаги Мовароунинаҳр қўшини Жаун дарёси ёқалаб ҳаракатни бошлайди. Даҳрени кечиб ўтиб қарши қирғоқдаги Пуштаи Баҳоли тепалигига туташган жарлик ичига хавф-хатардан ҳоли бўлиш мақсадида жойлашади. Икки кун дам олган қўшиннинг илғор, ўнг қанот, сўл қанот, марказини жангот

<sup>1</sup> Қаранг. Гийасаддин Али... Дневник... б. 111.

вар тартибга тизган Соҳибқирон 17 декабр куни маърака майдонига қараб юради.

Барангардан Пир Мұхаммад баҳодир мирзо, Сулаймоншоҳ баҳодир ва ўзга амирлар, жувангардан Султон Ҳусайн баҳодир мирзо, Ҳалил Султон баҳодир Мирзо, Жаҳоншоҳ баҳодир ва бошқа саркардалар, ҳира-вулдан Рустам баҳодир мирзо, Шайх Нуруддин, Шоҳ-Малиқ, Аллоҳдод синғари амир ва беклар ўрин олган эди. Соҳибқирон ўз шахсий гвардияси — *сонсиз*, кўмак учун мўлжалланган қисмлар билан кўлда жойлашади.

Рўпарада шаҳзода Султон Маҳмуд, Маллухон ва бошқа бир қанча ҳинд саркардалари раҳнамолигидаги ўн минг кишилик суворийлар, йигирма минг сара пиёдалар ва бир юз йигирма жанговар филлардан таркиб топган қўшин ҳам сафга тизилиб, осмоний кўмак ва раббоний мададга суянган ҳолда лашкар тортиш қоидаси ва қўшин безатиш услугига биноан асбоб — аслаҳаларини тартибга солиб уруш тўқушга шайланаади. Қўшин сафи олдида харакат қилувчи тогмонанд ҳайбатли филларнинг хартумлари бир-бирига боғланган, филлар устига думалоқ қажавалар ўрнатилган, уларда бир неча тирандозлар жойлаширилган эди. Филлар қатори ёнидан тўп отувчилар, яъни раъдандозлар ўрин олади.

Темурбекнинг ҳумоюн қўшини кўпдан-кўп жанг — жадалларда иштирок этган, ман-ман деган рақиб лашкарларини синдирган, унга ўша даврдаги ҳарбий санъатнинг барча сир-асрорлари, қонун-қоидалари маълум ва ойдин эди. Бироқ, музaffer мавқиб мана шу кунга қадар девларни ҳам қочишга ундайдиган, қўнгироқ ва занглар ҳақилган даҳшатли филлар ёрдамида жангга отланган душман билан юзма-юз келмаган эди. Айниқса, илгари филларни кўрмаган отларнинг ҳуркиб қочиши темурийларни анча қийин аҳволга солиб қўяди. Баъзи жангчилар ғулгулага тушади, уларни ваҳима босади. Иккала қўшин бир-бирига жуда яқин масофага келган чогда Темурбек ўз қароргоҳи ўрнатилган Баҳоли дўнглигидан атрофни кузата бошлайди. Дўмбира овози, ногора наъраси, карнай-сурнай садоси остида қаравул ҳамда илғор қисмларнинг тўқиши келиши жанг бошланганлигидан далолат беради. Ушбу лаҳзада Соҳибқирон сарой-мулозимларидан мавлоно Носируддин Умарга тош устига жойнамоз тўшашни буюради. Темурбек Яратганга ҳамду санолар айтиб, ундан кўмак ва шафоат тилаб, икки қатла саждага боради. Бу пайтда Шайх Нуруддин,

Шоҳмалик, Аллоҳдод ва бошқа номдор амирлар қўмон-донлигидаги ҳиравул қисмларнинг аҳволи оғирлашиб қолган, душман кучларининг асосий зарбасини қайтариш уларнинг зиммасига тушган эди. Анчагина талоғат кўрган илгорға ўз вақтида берилган кўмак унга ўзини ўнглаб олиш имкониятини яратар, ганим эса марказ қўлга суқилиб кириш имкониятидан маҳрум бўлар эди.

Вазиятнинг ўта хавфлилигини сезиб турган Темурбек қўлдан нафақат ҳиравулга, балки душманнинг шиддатли ҳужумларини даф этиш билан банд бўлган барангарга ҳам Али Султон тавачи қўмондонлигидаги отлиқ қисми-ни зудлик билан мадад сифатида ажратади. Ўз вақтида берилган ёрдамдан баҳраманд бўлган, жанговар руҳи кўтарилган ҳиравул ва барангар аҳли янги куч-гайрат билан ёвга ташланади ва ташаббусни ўз қўлига олишга муяссар бўлади. Илгор қисм ва ўнг қанот аскарларининг жанг чогидаги жасорати ва матонати бошқа қўшин қисмлари жангчилари кучига-куч, қувватига-қувват қўшади. Қуролдош дўстларининг мардлик ва қаҳрамонлиги уларни жасоратга ундаиди, галабага илҳомлантиради. Бу қисмлар баъзи бир аскарларни саросимага туширган баҳайбаৎ филларни писанд қилмай, уларга найза санчар, олов ва тутуни, ҳаммаёқни тутувчи гумбир-гумбири жанггоҳни ларзага келтирувчи тўп-раъдларни кўзга илмай, душман қишиларини қиличдан ўтказар эди. Филлар устидаги кажавадан ўрин олган ганим ўқчилари туркий мерганилар отган ўқлардан тутдай тўқилар, от ва фил оёқлари остида қолиб ҳалок бўлар эди. Айниқса, ярадор филларнинг филбонларни улоқтириб орқага қарамай қочиши ҳинд аскарларига катта қирон келтиради. Ўқ ва найза санчилишидан заҳм еган бу ҳайвонлар ҳинд суворий ва пиёдаларини поймол қиласди, қаторларни янчиди ўтади ва тўзитиб юборади. Ёв сағларида парокандалик ва бошбошдоқлик аломулари сезила бошлайди. Бундай ҳолатнинг вужудга келишига Пир Муҳаммад баҳодир ва Сулаймоншоҳ баҳодир қўмондонлигидаги барангар, Султон Ҳусайн баҳодир, Ҳалил Султон баҳодир, Жаҳоншоҳ баҳодир, Ғиёсуддин тархон саркардалагидаги жувангар, Рустам баҳодир, амирлар Шайх Нуруддин, Шоҳмалик, Аллоҳдод раҳбарлигидаги ҳиравул ва ниҳоят, Соҳибқирон бошчилигидаги қўл жангчилари ўзларининг улкан ҳиссаларини қўшади. Душман қўшини кўп қурбон кўришига қарамай, сабот ва матонат билан қаршилик кўрсатар, мардлик ва жасурлик намуналарини

намойиш этар эди. Бироқ, борган сари уларнинг сағлари сийраклашиб, қаршилик кўрсатиш имкониятлари чеклана боради. Ниҳоят, Темурбекнинг ҳиравул, қунбул ва қўл қисмлари рақиб қўшинини қуршовга олишга муваффақ бўлади.

Филлар қўлга киритилади. Жанггоҳ минглаб ғаним аскарларининг мурдалари билан тўлиб кетади. Кичик отлиқ гуруҳ ҳимоясида жанг майдонини ташлаб қочган Султон Маҳмуд ва Маллухон Деҳли шаҳрига нажот тошиш мақсадида беркинади. Жанг ниҳоясига етгач соҳибқирон барча мирзодалар, лашкаро бошилар, бек ва амирларни ўз қароргоҳига муҳорабанинг қай йўсинда борганилиги, баранғар, жуванғар, қўл, ҳиравул, қунбул, соңиз ва бошқа қисмларини жанг майдонида қандай ҳаракат қилинлиги, ғаним билан бўлган аёвсиз курашда алоҳида жасорат, матонат ва қаҳрамонлик намуналари кўрсатган аскарлар, қўмондонлар, ҳарбий бўлинмалар, қисмлар ҳақида ҳисобот беришга тўплайди.

Ўнг қўл, сўл қўл, марказ, илгор ва бошқа қисм сар+ кардалари, амирзодалар, номдор беклар ҳамда амирлар ўзлари бошқарган қисм ва бўлиймаларнинг, қолаберса, ҳар бир жангчининг кучли душман билан бўлган тўқнашувда Соҳибқирон белгилаган режа бўйича ҳаракат қилинлиги, ёвнинг кучли ҳужумлари мардонавор қайта-рилгач, унга қақшатқич зарба берилганлиги, галабани қўлга киритишда марказ — қўлдан ўзга қисмларга ўз вақтида бериб турилган мададнинг ҳал қилувчи аҳамият қасб этганлиги, галаба ёр қўшинининг ҳар бир аъзоси — жанг сафининг диловарлари, диловарлик маъракасининг паҳлавонлари, қаҳрамонлик жанггоҳининг баҳодирлари бўлмиш марду майдон кишилар душман қанчалик қасд қилмасин, ҳаммасини орқага қайтарганлиги, иш ўқу ёй отишдан тифу пайза санчиш ва яккама-якка олишишга етганлиги, ботирларнинг «ур, ҳа ур», ҳаё-ҳай», ---ҳайқириқ ва наъраларидан маъракагоҳ ларзага келганлиги, дўмбира, ногора, карнай, сурнайлар овозидан гардун қулоги кар бўлганлиги ҳақида тўлқинланиб ва жўшиб ҳикоя қиласидар. Айниқса, мирзода Халил Султон баҳодирнинг маъракада кўрсатган қаҳрамонлиги ва жасорати ҳаммани қойил қолдиради. Эндиғина ўн беш ёшга қадам қўйган мирзода жанг алансаси айни авжга чиқкан, икки муҳолиф ҳудди довул натижасида жунбушга келган икки дengiz тўлқинлариdek бир-бирига туташган маҳалда қаҳр-газаб шамширини баланд кўта-

риб ганим аскарларига ўз ўлжасига чапдастлик билан ташланган арслон мисол. ҳамла қилади. Темурий жанғчиларга хавф солаётган төгсифат филларга қарши далил ҳаракат қилиб, улардан бирини ўлжа олади ва бобоси Темурбек ҳузурига олиб келади. Тўла эъзозу икромлар билан Халил Султонни бағрига босган Темурбек навқирион мирзо кўрсатган шижаат, мардлик ва садоқат ҳар қандай тақсинга лойиқлигини аҳли лашқарга маълум қилади ҳамда ушбу қаҳрамонлик лавҳаларини тарих саҳифаларига зарҳал ҳарфлар билан битиб қўйишга ижозат беради. Сўнг шикаст топган душманини таъқиб қилиб борган Темурбек қўшини пешин намози вақтида Деҳли дарвозалари ёнида пайдо бўлади. Шаҳар халқига ҳеч қандай озор етказилмай Соҳибқирион от жиловлари ни орқага буришига ва Лаби ҳовузи хос номли жойда кун ботгунча тўхташга ҳукм қилади.

Чоршанба кўнига ўтар кечаси Султон Маҳмуд, Маллухон ва бошқа бир қатор ҳиндистонлик сардорлар Деҳлиниң жанубий дарвозалари орқали қочишига юз тутғанлиги ҳақида маълумот олинади. Темурбек ўша заҳотиёқ амирлар билан маслаҳатлашиб, қочоқларни таъқиб қилиш учун қувғунчи гуруҳ жўнатади.

Эртаси, яъни 18 декабр куни Соҳибқирионнинг зафар белгилари битилган байроқлар билан сарбасар бўлган осмонўпар саронардаси қабул учун майдон дарвозаси рўнарасидаги ийдоҳга тикилади. Деҳли шаҳрининг бузурглари, саййидлари, қозилари, аъёнлари тўпланишиб, ташқари чиқади. Маллухоннинг собиқ ноибларидан Фазлуллоҳ Балхий каби уламолар, девонхона хизматчилари, шайхлар ҳам булар билан биргаликда келиб Темурбек гиламини ўпиш шарафига муяссар бўладилар. Келганлар Соҳибқириондан деҳлиликларининг гуноҳидан ўтиб уларга омонлик беришни илтимос қилади. Пир Муҳаммад баҳодир мирзо, Сулаймоншоҳ баҳодир ва бошқа амиру беглар шу илтимосни қондириш маъқул деган фикри билдирадилар.

Жўума куни Мавлоно Носуруддин Умарға фозилу чузало, олиму уламо, шайху машойих, садру судур ва бошқа аркони давлат ҳамроҳлигига шаҳарга кириб, Темурбек кўрагон номига хутба ўқишига амр қилинади.

Темурбек эришилган зафарларнинг безаги бўла олувчи бу тарихий ғалабани осон қўлга киритишида мададкор бўлган Тангрига шукроналар айтиш ва миннатдорлик туйгуларини адо этишига киришади. Ҳумоюн қўшинининг

фатҳи хабаридан иборат фатҳномалар рубъи маскуннинг атроф — жавониб ерларига шамолдек тез учувчӣ чопарлар орқали юборилади.

1399 йилнинг биринчи январида Соҳибқирон музофар қўшинга Ҳиндистон юруши ниҳоясига етганлиги, иирик жангларда улкан ғалабалар қўлга киритилганлиги, кўпдан-кўп қалъа, ҳисор, шаҳар, вилоят ва юртлар забт этилганлиги, беҳисоб молу дунё, зебу зийнат, асиру тутқунлар ўлжа қилинганлиги, энди Ватанга, дорус — салтана Самарқандга қайтиш вақти кёлганлиги тўғрисида фармони олийни эълон қиласди.

## ЯШИННИНГ СЎНИШИ

Шимоли-тарбий Анатўлига Ўрта Осиёдан кўчиб келган қайи қабиласи асосида XIII асрнинг охирига келиб Европада бир қатор иирик ғалабаларни қўлга киритади. Булгория ва Сербиянинг ҳурматлар томонидан забт этилиши Венгриянинг мустақиллигига тўғридан-тўғри хавф сола бошлади. Венгрия қироли Сигизмунд қўймондонлигидаги Фарбий Европа рицарларидан ташкил топган юз минглик армиянинг 1396 йил 25 сентябр куни Дунайнинг ўнг қирғоғида жойлашган Никополь шаҳри бўсағасида сulton Боязид I Илдирим қўшини томонидан тор-мор қилиниши туркларга шарти кетиб парти қолган. Византия империясининг қаршилигини синдириб, унинг пойтакти Константинополни эгаллашига йўл очиб беради.<sup>1</sup> Бироқ, тез орада халқаро вазиятда кескин ўзгаришлар сўдир бўлади ва Усмонийлар салтанатининг ҳақдири қил уида осилиб қолади.

Шиддатли операциялар туфайли Европанинг катта қисмини бўйсундирганилиги учун Илдирим, яъни яшин, чақмоқ лақабини олишига мусассар бўлган сulton Боязид I ҳамда ўз ҳарбий қудратининг чўққисида бўлган жаҳонгир Темурбек мақсадлари кичик Осиёда тўқнаш келади.

<sup>1</sup> Қаранг: Умняков И. Из истории.. б. 3; Петросян Ю. А. Османская империя. Могущество и гибель. М., Наука, 1990. б. 10—36; Рансимен С. Падение Константиноополя в 1453 году. М., Наука. 1983. б. 32—54.

## РУМ СУЛТОНИ БОЯЗИД ИЛДИРИМ БИЛАН БҮЛГАН ЖАНГ

Тарихнинг далолат беришича, Темурбек ўз қўшини билан Шаркий Анатўлия сарҳадларига 1386 йили илк қадам қўйган ва Арзинжон шаҳри яқинида туркларниң катта ҳарбий қўшинларини мағлуб этган эди<sup>1</sup>. Орадан саккиз йил ўтгач, 1395 йили Соҳибқирон бу ўлкаларга иккинчи бор юруш қиласди. Усмонийларниң Сивосгача бўлган анчагина ерлари торожга дучор бўлади. Боязид Илдиримниң ўғли, Сивос вилоятининг ҳокими Эртўгрул Темурбекка қарши бўлган ҳаракатларниң бирида ҳалок бўлади.<sup>2</sup> Фатҳ этилган Сивосдан, кутилмаганда, Соҳибқирон Ҳалаб, Дамашқ ва Багдодга қараб от суради.

Ироқ, Шом, Дашиби Қипчоқ, Ҳиндистон сингари мамлакат ерларини хос ўзиники қилишга мұяссар бўлган Темурбек салтанатниң гарби-жанубий чегараларига яқин жойлашган Болқон ҳамда Кичик Осиёда барпо этилган қудратли Усмонийлар давлатининг кучайиб кетишдан, албатта, манфаатдор эмас эди.

1401 йилниң қиши кунларини Қорабоғдаги қишловда ўтказаётган Темурбек айни пайтда Византияниң пойтахти Константинополни ҳам қуруқлик, ҳам денгиздан муҳосара этиб, мустаҳкам ва кучли истеҳкоми бўлган бу шаҳарни қўлга киритиш баҳтига муваффақ бўлолмай турган Туркия Султони Боязид I Илдирим (1389—1402) қароргоҳига элчи юбориб, ундан византияликларниң турклар томонидан забт этилган барча ерларини эгаларига қайтариб беришининг қатъий талабини қўяди<sup>3</sup>, Темурбекниң масалани бундай алфозда кўндаланг қўйишидан дарғазаб бўлган, шунингдек, яқинлашиб келаётган хавфнинг нақадар даҳшатли эканлигини унчалик қўзга илмаган, маълум даражада манманлик ва мутакаббирликка йўл қўяётган шиҷоатли ҳамда қизиқон Боязид ўз павбатида дағал, ҳақоратомуз сўзлар билан битилган жавоб мактубини Соҳибқиронга йўллади.

Ибн Арабшоҳ Боязид мактубининг қуийидаги куракда турмайдиган жумлалар билан тугалланганлигини алоҳи-

<sup>1</sup> Петросян Ю. А. Османская империя... б. 26.

<sup>2</sup> Қаранг: Рансимен С. Падение... б. 49; Петросян Ю. А. Османская империя... б. 27.

<sup>3</sup> Қаранг: Умняков И. Из истории... б. 3.

да қайд этади: «Мен биламанки, бу сўзлар сени ҳеч тўх-тамасдан бизнинг мамлакатимизга томон отлантиради. Агар сен (биз томонга) келмасанг, сенинг хотинларинг уч талоқ бўлсин. Агар сен менинг юртимга келсан-гу, мен сенга қарши қатъий уруш қилмай қочсам, у вақтда менинг хотинларим узил-кесил уч талоқ бўлсин.»<sup>1</sup>

Айни замонда султон ўз кучларини Константинопол қамалидан олиб Темурбекка кучли зарба бериш ниятида Анатўлига жамлай бошлайди<sup>2</sup>.

Султон Боязид Бурса шаҳрида турган чоғда Темурбек жўнатган элчи иккичи бор ўша талаб билан унинг қароргоҳига келади. Соҳибқирон билан бўлажак жангда ўзининг ғалаба қозонишига тўла ишонган Боязид элчи-ни «Майли, Темур урушни бошлайберсин. Мен у билан сулҳ тузишдан жанг қилишни афзал кўраман», — деган жавоб билан қайтариб юборади.<sup>3</sup> Натижада, Темурбек Султонга қарши юришга жазм қилади. Руи Гонсалес де Клавихо Темурбекнинг Боязидга қарши қўшин тортиш сабабини мана бундай тушунтиради. Арзинжон ҳокими Таҳартанинг ерлари усмонийлар давлати мулклари билан чегарадош эди. Таҳартанга тааллукли ерларга, айниқса Камоҳ қалъасига эга бўлиш ниятида бўлган Боязид ундан қалъани топширишни ва бож тўлашни талаб қилади. Таҳартан султонга бож тўлаши мумкинлигини, аммо қалъани асло бермаслигини баён қилади. Боязид Таҳартанга элчи йўллаб, қалъани нима бўлса-да, бериши лозимлигини, акс ҳолда бор мулкларидан ажралишини билдиради. Таҳартан ушбу вақтларда Эронда ҳарбий ҳаракатлар олиб бораётган Темурбекка совга--саломлар билан мактуб жўнатади. Мактубда у Соҳибқироннинг тобеси эканлигини билдиради ва ундан мадад сўраб Боязиддан ҳимоя қилишни илтимос қилади. Темурбек Боязидга элчи юбориб, ундан Таҳартан ва унинг фуқароларига ҳеч қандай зарар етказмаслиги лозимлигини талаб қилади<sup>4</sup>.

«Равзат ус — сафо»да ўз манзилларига қайтишга ижозат берилган турк элчиси орқали султонга юборилган мактубнинг мазмуни қуйидагичадир:

<sup>1</sup> Қаранг: *Ибн Арабшоҳ*. Ажойиб ал-мақдур... II китоб, 258—259-бетлар.

<sup>2</sup> Қаранг: *Ибн Арабшоҳ*. Ажойиб ал-мақдур... I китоб, 258—259-бетлар. *Петросян Ю. А.* Османская империя... б. 26; *Ренсисмен С.* Падение... б. 49.

<sup>3</sup> Қаранг: *Петросян Ю. А.* Османская империя... б. 26.

<sup>4</sup> Қаранг: *Руи Гонсалес де Клавихо*. Дневник... б. 66

Чун жиҳод ва гизо ойини ул мамлакатда қойимдуур ва бизнинг мижозимизга мувофиқ эрмасдурким, ул диёрға мансур лашкар убуридин осиб етгай. Ва биз мунча ма-доро тариқин маслук тутадурмизким, агар Таҳартаннинг мутаалиқотин юбориб фарзандларниң бирин бизнинг қошимизга равона қилсанг, то ани ўз фарзандларимиздин киромийроқ тутадурмиз ва икки ародин мухолифат ғу-бори туруб Рум мамлакати санга тошириулғай. Ва ул диёрниң одамлари шул васила билан фориғбол ва осу-дааҳвол бўлуб қуфор иноди дафъиға ва фужжор фасоди раъиға машғур бўлғай. Ва ёвуқдуурким агар муҳим бу минвол била ўтса муниң баракоти дунё ва охиратда ҳамманиң рўзгорига восил ва мутавосил айланғай».

Рум ерларини мукаммал билувчи қулавуз — йўлбош-ловчилар тайин қилингач, Соҳибқирон қўшинни кўрик-дан ўтказишни ҳавачиларга буюради. Яқинлашиб кела-ётган жангнинг турклар учун ҳаёт-мамот жангни эканли-гини, шу сабабли уларнинг бир томчи қонлари қолгуунча саваш қилишлари табиий эканлигини жуда яхши пайқа-ган Темурбек Самарқандга чопар йўллаб, тахт вориси ҳамда валиаҳд Муҳаммад Султон мирзо ибн Жаҳонгир мирзони атоқли саркарда амир Ҳожи Сайфуддин ҳам-роҳлигидаги мадад кучлар билан тезликда ҳузурига етиб келишга амр қиласди. Ўзи эса Румга юзланади ва 1399 йили Боязид томонидан ғатҳ қилинган, Арзинжон шаҳ-ридан 38 км узоқлиқда, фронт дарёсининг гарбий соҳи-лида жойлашган Қамоҳ қалъаси олдида тушади. Қамоҳ қалъаси ғоят пишиқ, мустаҳкам ва баланд бўлиб, бир тарафидан унинг деворлари тагидан Фронт дарёси оқиб ўтса, иккинчи тарафдан буржу боруларини кенг бир водий ҳимоя қиласди. Водийга киришнинг асло имкони йўқ эди, чунки у жой фронт дарёсига қўйиладиган ирмоқ йўли эди. Қолган икки тарафда эса қир ва тепаликлар мавжуд бўлиб, у ердан қалъага яқинлашиш мумкин эмас эди. Мирзо Муҳаммад Султон ва амир Ҳожи Сайфуддин бошчилигидаги Мовароуннаҳр қўшини етиб келгач, Темурбек Қамоҳ қалъасини эгаллаш вазифасини вали-аҳд набираси зиммасига юклайди.

Қалъа муҳосараси 1402 йилнинг май-июн ойларида бўлади. Темурбек қалъага унинг орқа томонида жойлаш-ган эгри-бугри водий орқали яқинлашишга қарор қиласди. Соҳибқирон буйруғига биноан қўшин аҳли теварак-атрофда бор бўлган дарахтларни кесиб, ёғоч, хода ва шоҳ-шаббаларни водийга ташлайдилар, уни ер билан

баробар қилиб, водийнинг эни ва бўйини тўлгазадилар. Мұҳосарада қолганлар Темурбек тадбири амалга ошса бошига қандай қулфатлар тушишини фаҳмлаб қалъадан ўт, ёнаётган нафт ҳамда махсус туз, кўмир ва олтингу-гурт аралашмасидан тайёрланган ёнувчи мураккаб модда — боруд ташлаб ёғоч ва шох-шаббаларни ёқиб юборади. Муваффақиятсизликдан эсанкирамаган Соҳибқирон қалъани забт этишнинг бошқа бир тадбир-чорасини кўради. У лашкарга қалъа атрофидан бир халтадан тош йигиб келишни ва сойни тошлар билан тўлдиришни буюради. Водий тошлардан тўлгач, аскарлар тўда-тўда, гуруҳ-гуруҳ, фавж-фавж бўлиб, унинг устидан юриб ўтиб қалъага яқинлашади. Қалъагирлик асбоб-олатлари ишга солиниб, ҳисор деворларига шоту ва нарвонлар қўйилиб, аскарлар ташланган каманд ва арқонларга осилиб юқорига кўтарила бошлайди. Фаросат билан кўрилган тадбирга ҳар қандай қаршилик кўрсатишнинг беҳуда эканлигига шак-шубҳаси қолмаган мудофаачиларнинг таслим бўлиши ва омонлик тилашдан ўзга иложлари қолмайди. Қалъага кирган Темурбек водийга келтирилган тошларни аввали жойларига олиб бориб ташлашга амр қиласади. Шундан сўнг Соҳибқирон қалъага аёнларидан Аш-Шамс номли кишини доруга қилиб, у ерии тарк этади<sup>1</sup>.

Кўп фурсат ўтмай Темурбек Анқарани қамал қилишга киришади<sup>2</sup>. Соҳибқироннинг бу ҳаракати аслида тактик тадбир бўлиб, тажрибали саркарданинг асосий мақсади Боязидни ўзининг асосий кучларини шаҳар мудофаасига ташлашга мажбур этиб, сўнг унга қақшатқич зарба бериш әди. Темурбек ишлатган тактик хийла иш беради. Тўқат шаҳри яқинида асосий ҳарбий кучлари билан турган Боязид Соҳибқирон аскарларининг Анқарани мұҳосара қилиб, унинг деворлари ҳагидан нақблар қазиётганлигидан воқиф бўлади ва қамалдагиларга ёрдам беришга шошилади.

Қаравуллар Соҳибқиронга Рум қайсари катта сонли лашкари билан тўрт фарсаҳ масофада тушганлиги хабарини етказгач, Темурбек қамални бекор қиласади ва рақибини кутиб олиш тараддудини кўради. Қўшин қисмларини жанггоҳнинг жанг олиб боришга қулай ерларга

<sup>1</sup> Қаранг: *Ибн Арабшоҳ*. Ажойиб ал-мақдур... II китоб, 259—263-бетлар.

<sup>2</sup> Қаранг: *Петросян Ю. А.* Османская империя... б. 26—27; *Рансимён С.* Падение... с. 49.

жойлаштиради. Ўрдунинг теграсида хандақлар қазилиб, мазбут ва маҳкамлик чоралари кўрилади. Натижада Боязид армияси ўзи учун ўта ноқулай шарт-шароитда урушга киришга мажбур бўлади. Султон черики айниқса, сув танқислиги туфайли вужудга келган ташналиктан қаттиқ азият чекади. Рум черики жойлашган ердаги мавжуд ягона булоқ ҳам Темурбек аскарлари томонидан яроқсиз аҳволга келтирилади<sup>1</sup>.

Клавихо иккала армиянинг жанголди ҳаракат (маневр)ларини қўйидагича тасвиirlайди: Темурбекнинг Туркия сарҳадларига қадам қўйғанлигидан хабар топган Боязид ўз йўлини ўзгартиради. Анқара қалъасида ўгруқни қолдириб, қўшинни тезкорлик билан ўз рақиби томон бошлайди. Темурбек Боязиднинг айёrona ҳаракатларидан бохабар бўлгач, Арзинжон-Сивос йўлини тарқ этади ва сўлга бурилиб, баланд тоглар орқали юра бошлайди. Темурбекнинг бошқа томонга бурилганлигини Боязид душман қочди хаёл қилиб, жон-жаҳди билан Соҳибқирон кетига тушади. Соҳибқирон тахминан саккиз кун давомида тоғларда тин олади. Шундан сўнг текис йўл орқали Анқара томон равона бўлади ва у ерда қолдирилган Боязид ўгруқини қўлга киритади. Соҳибқироннинг Анқарада эканлигини билган султон у ҳомонга иложи борича тез ҳаракат билан жўнайди. У Анқарага етиб келганда қўшиннинг тинкаси қуриган, ҳолсизланган эди. Темурбек бу маневрларни рақибини алдаш мақсадида амалга оширган эди<sup>2</sup>.

Темурбек ва Боязид ўртасидаги ҳал қилувчи тўқнашув 1402 йилнинг 25 июлида бўлиб ўтади. Манбаларда таъкидланишича, Туркия Султонининг қўшини тахминан 160 минг жангчидан иборат бўлган.

Темурбекнинг ушбу жангда қанча миқдордаги аскар билан қатнашганлиги тўғрисида аниқ маълумот ўйқ. Лекин баъзи тарихнависларнинг Анқара бўсағасидаги жангда икки томондан салкам ярим миллион киши қатнашганлиги ҳақидаги мулоҳазаларидан келиб чиқиб, мовароуннаҳрикликларнинг сони ғаним кучларидан кам бўлмаганлигини илғаб олиш мумкин.

Саркаш Рум қайсари ҳарбий ҳаракатларнинг бошлинишидаётқ тактик жиҳатдан кўпол хатоликларга йўл қўяди. Қўшиннинг жанг майдонида ноқулай ўрнашиши,

<sup>1</sup> Карап: *Мирхонд. Равзат ус-сафо...* 176 а.

<sup>2</sup> Карап: *Руи Гонсалес де Клавихо. Дневник...* б. 69.

жангчилар ва лашкарбошилар орасидаги ҳарбий интизомнинг бўшлиги, бўлажак оғир тўқнашувдан олдин олиб борилган тайёргарликнинг жуда сустлиги, султоннинг хасислиги туфайли аскарлар оладиган маошнинг ҳар вақт ҳам ўз муддатида берилмаслиги сингари салбий омиллар туркларнинг Соҳибқирон билан бўладиган жангда муваффақиятсизликка учрашини маълум даражада олдиндан белгилаб қўйган эди.

Кун чиқиши билан жанг бошланади. Икки тарафдан табл ва ногоралар урилиб, карнай ва сурнайлар чалиниб, бутун маъракагоҳ аскарларнинг шовқин-сурон, дод-войига тўлиб кетади, еру кўк титраб, теварак ат-роф алғов-далғов бўла бошлайди.

Соҳибқирон армияси ўзининг анъанавий жанговар тартиби — ясолда ҳаракат қиласи<sup>1</sup>. Сипоҳнинг қирқ қўшун — қисмдан ташкил әтилган ҳумоюн маркази — қўйлга Соҳибқирон бевосита қўмонидонлик қиласи, жувангар лашкари Шоҳруҳ мирзо ва Ҳалил Султон мирзо иқболи билан зебу зийнат топади. Улуг беклардан амир Сулаймоншоҳ, амир Ёдгор Аидхудий, Рустам Тогайбуға, Суюнжак баҳодир ва ўзга марду майдонлар амирзодалар мулизиматида бўлади. Жувангар ҳиравулига мирзо Султон Ҳусайн, Али Султон тавачи ҳамда Мусо тайинланади. Барангар аскарларига Амиршоҳ мирзо етакчилик қиласи. Амир Шайх Нуруддин, амир Бурундуқ, Али Қавчин, амир Таҳартан, Мубашшир Ҳожи, Ҳожи Абдуллоҳ Аббос, Ҳожи Сайфуддиннинг ўғли Султон Санжар, Умар Тобон, амир Шайх Иброҳим Ширвонийлар амирзода қошибди туриб, хизмат камарини белларига маҳкам бояглайдидар. Барангар ҳиравулига Абду Бакр мирзо, амир Жаҳоншоҳ, амир Қаро Үсмон туркман, Таваккал барлос, Пир Али сулдуз сингари лашкарбошилар қўйилган эди.


Марказ — қўйлнинг ўнг тарафида Тоштемур ўғлон, Умаршайх мирзонинг фарзанди Аҳмар мирзо, Шоҳсувор, Жалол бавурчи, Тобтуқ, Юсуф мўғул, Ҳожи Бобо сувчи, Искандар, Ҳиндубуга ва Ҳожа Юсуф сингари аъён ва ашроғ ҳамда саркардалар жойлашади. Қўйлнинг чап томонидан Жалол Ислом, Таваккал қарқара, Али Муҳаммад, Шоҳвали, Жонибек, Тангрибермиш ҳожа, Муҳаммад Ҳалил, Шайх Ҳусайн каби баҳодирлар ўрин олади. Бу кучларга ўзга қисмларга мададкор бўлиш вазифаси юклатилиган эди. Марказ — қўйлда армиянинг асосий за-

<sup>1</sup> Қаранг: *Мирхонд. Равзат ус-сафо...* 176—179 б.

Фарпайкар байрого қадалган әди. Қўшиннинг сағлари олдида Ҳиндистон юриши чоғида ўлжা қилинган ўттизта жанговар филлар сағ тортаб турар, уларнинг устида ўтирган нафтандозлар ва камонкашлар ҳар дақиқа ганимга амал ўқини ёғдиришга тайёр әдлар.

Қарши тарафда Боязид Илдиirim Рўм ҳамда Фаранг мамлакатларидан жамланган ҳадсиз черикига тартиб бе-

### Боязид Илдиirim қўшинининг ясоли



### Темурбек қўшинининг ясоли

риб, уларга ўзининг энг ишончли кишиларини сардор қилиб, Соҳибқиронга зарба бериш ниятида турар эди. Рум қўшинининг олд қисмида сultonниng қайниси қора либос кийган йигирма минг кишилик фарангликлардан иборат лашкари билан саф тизиб туради. Бу лашкар жангчилари бошидан оёғигача темир совутга чулганган бўлиб, кўздан ўзга аъзолари кўриимас эди. Улар устидаги жавшан бандларига қулф солинган, то қулф очилмагунча совут ва дубулғани ечиб бўлмас эди.

Лашкарнинг жуванғарига княз Степан қўмондонлигидаги серб дружиначилари қўйилган эди. Черик қалби марказидан Боязиднинг ўзи ўрин олади. Ўғиллари Мусо, Исо ва Мустафони чагдавулга жойлаштиради. Рум умаросининг бошқа кўзга кўринган вакиллари ўзга амир ва пошиболар билан ўзларига муқаррар бўлган ерларга ўрнашади.

Жанг муқаддимаси Мироншоҳ мирзо қўйл остидаги баранғарнинг ганим жуванғарига берган кучли зарбаси билан бошланади. Серблардан ташкил этилган румликларнинг бу қаноти матонат билан мовароуннаҳриликларга қаршилик кўрсатади.

Боязиднинг қисм кўмондонларидан бири амир Жаҳоншоҳ ва амир Қора Усмон томонидан қилинган ҳамлага бардош беролмай, ўз одамлари билан маърака майдонидап юз ўгиради. Султон Ҳусайн мирзо байробги остида тўйланган баҳодир суворийлар ҳам душманга қирғин келтиради. Темурбекдан жаңгга киришга рухсаৎ олган Муҳаммад Султон мирзо сўл қанотга мадад беришга отланади ва румийларнинг барангарига кўмак бериш учун ошиқаётган турӯҳ билан рўбару келади. Икки тараф ўртасида уруп ангиз бўлади. Оқибат амирзода сипоҳи ғолиб келади.

Умаринайҳ мирзонинг ўғли Пир Муҳаммад мирзо, Искандар мирзо, Султон Аҳмад мирзо ва амир Шоҳмалик, мубориз аскарлар билан илгари юриб, Рум черикидан кўп кишини қиличдан ўtkазади. Шундан сўнг Соҳибқироннинг барча амирзодалар, умаролар, пўёпларнинг биргаликда жасорат ва мағданалик кўрсатиб, Боязидга ҳужум қилиш тўғрисидаги ҳукми қисмларга ёйилади. Қўшиннинг барангаридан Мироншоҳ мирзо, амир Жаҳоншоҳ, амир Шайх Иброҳим, Аббоснинг ўғли Ҳожи Абдуллоҳ, амир Ҳожи Сайфуддиннинг ўғли Султон Санжар, шунингдек, Шоҳруҳ мирзо, Ҳалил Султон мирзо, амир Сулаймоншоҳ, Рустам Тогайбуға ва ўзга номдор

амиру беклар, уруш майдонининг шершикор қаҳрамонлари иттифоқ бўлиб румликларга ташланади.

Мұхаммад Султон мирзо ганим барангари жойлашган ерни әгаллашга муваффақ бўлади. Боязид вазиятнинг бу тарзда жиддийлашганидан таҳликаға тушиб, ўз барангариға кўмакка келади ва мирзони әгаллаган жойидан суреб, ўзи у ерга жойлашиб олади. Черикнинг шикаст топган ўнг ва сўл қанот жингчилари султон атрофига тўплана бошлайди.

Кечачётган ҳолатни синчковлик билан кузатиб ва таҳлил этиб турган Соҳибқирон ҳамда падари бузрукворининг мулозими бўлиб турган Шоҳруҳ мирзо Боязид Илдирим томон равона бўлади. Мироншоҳ мирзо, Султон Ҳусайн мирзо, барангар ва жувангарнинг сардорлари ва улуғлари ҳам ўша ҳомон от сурадилар ва султон ҳамда унинг қисмларини ҳалқага оладилар. Моҳир мерғанлар томонидан ёғдирилган ўқ ёмгири румликларга катта талофат келтиради.

Шиддатли тўқнашув кескин ва узоқ давом этади. Ниҳоят, Темурбек қисмларининг қисувига бардоши қолмаган султон аскарлари чекина бошлайди. Боязид қўмондонлигидаги жангчилар сўнгти нафасгача қаршилик кўрсатишда давом этади. Яничарлар битта қолмай қириб ташлангандан сўнг Боязид ва унинг иккинчи ўғли Мусо Темурбек аскарлари, аниқроғи Соҳибқирон томонидан 1388 йили Чигатой улуси хонлигига кўтарилган Султон Маҳмудхон иби Суюргатмишхон тарағидан асир олиниади<sup>1</sup>.

Султоннинг тўнгич фарзанди Сулаймон серблар паноҳида жанггоҳдан қочишга муваффақ бўлади. Туркларнинг жанг майдонидан қочиб қутилган гуруҳлари Анадўлиҳисор қалъасига кириб яширинади...

Фотиҳ Темурбек музaffer армияси билан бутун Еарбий Анатўли бўйлаб зафарли юришини давом эттиради. Жиддий қаршиликка дуч келмаган Соҳибқирон қўшини Конъя вилоятини талон-тарож қиласди. Усмонийлар салтанатининг қадимий маркази Бурса ҳамда Даниэли ва Измир шаҳарлари ёқиб юборилади. Темурбекнинг Анатўлига қилган ҳарбий сафари чогида эришган ажойиб ютуқларидан яна бири унга кучли истеҳкомга эга бўлғав Измир қалъасининг таслим бўлишидир<sup>2</sup>. Измирни мудо-

<sup>1</sup> Қаранг: *Бартольд В. В. Улугбек и его время...* б. 48.

<sup>2</sup> Қаранг: *Петросян Ю. А. Османская империя...* б. 27.

фоа қилаётган родос рицарлари Соҳибқироннинг қалъани жанг-жадалсиз тошириш ҳақидаги ғалабини рад этади. Тинчлик йўли билан Измирга эга бўлиш режаси амалга ошмаган Темурбек уни раъдлардан тўпга тутишга амр қиласди. Қалъа деворларига бақамти саркўблар барпо этилиб, у ерга гилдиратиб чиқарилган манжаниқ ва арродалардан мудофаачиларга қарата тошлар отилаади. Қалъа деворлари тагидан нақблар қазилиб, улар шох-шаббалар билан тўлдирилади ва ёқиб юборилади. Истеҳкомнинг турли жойларидан раҳналар очилади. Соҳибқирон Измирнинг бошқа шаҳарлар билан қилаётган алоқасига чек қўйиш мақсадида шаҳар бандаргоҳ (гаван)ини тош билан тўлдиришга қарор қиласди. Икки ҳафталик муҳосарадан сўнг шаҳар қаттиқ ҳужум йўли билан Соҳибқирон томонидан фатҳ қилинади. Мудофаачиларнинг бир қисми очиқ денгиз орқали қочишга улгуради. Қочолмай қолганлар Темурбек аскарлари томонидан қатли омга гирифтор бўлади.

Темурбек вақтнчалик ўз бирлигидан, мавжудлигидан маҳрум бўлган усмонийлар сарҳадларини 1403 йили тарк этар экан, Ойдин, Гармиён, Қараман ва бошқа бир қатор бейликларга мустақиллик беради. Усмон авлодлари тасарруғидаги ерларни Соҳибқирон Боязид I Илдиримнинг тўрт ўғлига бўлиб беришини маъқул кўради. Натижада ака-укалар орасида таҳт учун кураш бошланниб кетади ва у бир неча йилларга чўзилади<sup>1</sup>.

Хулоса қилиб айтиш лозимки, Темурбек ҳукмронлиги даврида ҳарб иши ва ҳарбий санъат ўзининг олий поғонасига кўтарилди. Соҳибқирон барпо этган қудратли ва ўта интизомли армия жаҳоннинг ўша даврдаги энг илгори сифатида кейинчалик буюк саркардалар, ҳарихчи олимлар томонидан эътибор этилди, бир неча асрлар мобайнида ҳарб ишида андоза вазифасини ўтади.

Соҳибқироннинг ҳарбий таълимоти бугунги кунда ҳам ўз долзарблигини йўқотгани йўқ. Темурбекнинг ҳарбий маҳорати, жаҳон ҳарб санъатидаги новаторлиги Республикамиз сарҳадларини кўз қорачиғидай сақлап мақсадида барпо этилган Миллий армиямизнинг ҳар бир аъзоси учун дастуруламал бўлмоги мақсадга мувофиқдир.

<sup>1</sup> Қаранг: Петросян Ю. А. Османская империя... б. 28.  
259-бетлар.

## ЯКУНЛАНМАГАН ЮРИШ

Деярли ўттиз беш йиллик ҳарбий ҳаракатлар натижасида кўндан-кўп юрт ва мамлакатларни ўзи асос солган қудратли салтапат тасарруфи доирасига киритишга муваффақ бўлган Темурбек 1404 йилнинг сўнгти кунлари яқинлашиб келаётган дамларда дилига анча муқаддам туғиб қўйган, фикру зикрини чулғаб олган орзу, яъни турли-туман ажойиб-таройиблардан ташкил топган, Мовароуннаҳр авзоига нисбатан гоятда сирли ва ажиб туйилган Хитой ўлкасига қадам ранжида қилиш режасини рўёбга чиқаришга қатъий қарор қиласиди.

Бу пайтга келиб Темур давлати ва Хитой мамлакати ўртасидаги дипломатик алоқалар маълум даражада йўлга қўйилган, савдо карвоинлари «Буюк ишак йўли» бўйлаб қатнаబ туарар эди.

Баланд тоғлар ортидаги поёнсиз ерларда жойлашган Хитойга бориб-келиб турган тожирлар, савдогарлар, элчилар Темурбекка бу юрт ҳақидаги керакли маълумотлар — қўшинлар сони, қурол турлари, жанг қилиш усуллари, шунингдек йўллар, кечувлар, довонилар, даралар ва ҳоказо ҳарбий аҳамиятга молик хабарларни етказиб туарар эди.

Соҳибқирон сўнгти йилларда Хитойда содир бўлган сиёсий ўзгаришлар, яъни мўғулларнинг бу заминдан қувиб чиқарилиши ва маҳаллий Мин сулоласига асос солиниши Чинда яшаётган мусулмонлар аҳволининг кескин ёмонлашувига сабаб бўлганлигидан, айниқса, Мин сулоласи асосчисининг исломга душманлик назари билан қараётганлигидан яхши хабардор эди.

Низомуддин Шомийнинг таъкидлашича, Темурбек 1399 йил қиши мавсумини Қорабоғда ўтказаётган чогда Хитой ҳоқонининг ўлимидан маълум фурсат олдин арзиматан баҳона билан юз мингдан зиёд аҳли мусулмонни қатл этганлиги, ўз ҳукмронлиги остидаги эл-улусларда мавжуд бўлган исломни йўқ қилганлиги тўғрисидаги мудҳиш хабарни эшитади<sup>1</sup>.

Соҳибқирон аҳли мўминларни улар бошига тушган зулму жафодан ҳалос қилишга, Мин давлатининг кучайиб кетишини олдини олишга қандай йўл билан эришиш мумкинлиги тўғрисида кўп боп қотиради. Ва ниҳоят,

<sup>1</sup> Қараанг: *Баргольд В. В. Улугбек и его время. Сочинения. Т. II, ч. 2. М., 1964. с. 68.*

бунинг учун урушидан бошқа илож йўқлигига иқрор бўлади.

Шарқ томонга бўлажак юришга бир неча йил давомида пухта тайёргарлик кўрган Соҳибқирон фармони олий эълон қилиб, тавачиларга тезда лашкарнинг сонини ҳисобга олиш, изофа-кўмакчи кучлар беролувчи вилоят, шаҳар ва туманларни рўйхатга киритишга ҳукм қиласиди.

Хўмоюн хабар элтувчи буйруқлар — тавачилар орқали салтанатнинг барча томон ва чеккаларига қанот қоқади. Вилоят, юрт, ўлка, музофотларнинг ҳокимлари, атоқли саркардалару лашкарбошилар олий бош қўмон-доннинг муҳри билан зийнатланган ёрлиқларга бўйин эгиг, буйруқда аниқ кўрсатилган миқдордаги аскар, қурол-яроғ, аслаҳа-анжом, озиқ-овқат ем-хашак билан ваъдалашган жой — миод ерига белгиланган муддатда етиб кела бошлайди.

Темурбек боргоҳининг тупроги Эрону Турон, Хуросону Озарбайжон, Мўгулистону Дашиби Қипчоқ ва ўзга юрт улугларининг бўса жойига айланади.

Ўрдugoҳга йигилаётган черик аҳлини тавачилар тартибга солиб, уларнинг сонини дафтарларга киритадилар. Ўнлик, юзлик, минглик, туман бекларидан тортиб жангчиларнинг ҳар биригача улуфа — маош, инъом ва тортиқлар берилади.

Ушбу масъулиятли сафарга мутасадди бўлган ҳарб аҳли қурол-яроғ, аслаҳа-анжом, кийим-кечак ва ҳоказоларни тартибга келтириш, синону қиличларни ўткирлаш, қалқону зириҳларни таъмирлаш, айилу узангиларни шайлаш сингари ишлар билан машғул бўлиб турган чогда Темурбек давлатнинг бошқа зарур ва кечикириб бўлмас юмушлари билан банд бўлади. Сарой Мулкхоним мадрасасига келиб тунига Соҳибқирон суюкли набираси Нир Мұхаммад иби Жаҳонгир мирзога тулнор от, зарбоғ тўи, мурассасъ камар ва ҳокимлик нишони ҳисобланувчи жига инъом қилиб, уни Жанубий Ағғонистоннинг Зобулистон вилоятини бошқарини учун жўнатади<sup>1</sup>.

Шу асосда Самарқандга Миср кишварининг ҳукмдори Малик Фарруҳдан Темурбекнинг ашаддий ғанимлари ҳисобланмиш Султон Аҳмад жалойир ва Қора Юсуф

<sup>1</sup> Хитой юриши билан бөглиқ воқеалар баёни аксар ҳолларда Мирхондининг Огаҳий томонидан ўзбек тилига таржима қилинган «Равзат ус-сафо» асаридан олинган. Қаранг: Мирхонд. Равзат ус-сафо... 213 а -- 217 а.

туркманларнинг ҳибсга олиниб, банди қилингандиғи ҳақидағи нома билан әлчи келади. Соҳибқирон Миср әлчисига марҳамат назари билан қараб, уни подшоҳона ва тұхфалар билан ҳурсанд қиласы.

Шундан сүнг Малик Фаррухнинг ҳибсдаги Султон Аҳмад жалойирнинг қўл-оёғини кишанлаб, зудликда Сармарқандга юбориш зарурлиги қайд этилган мактуб әлчига топширилади ва унга юртига қайтиб кетишга ижозат берилади.

Айни шу кезларда пойтахтга фаранг ва Даشتি Қипчоқдан ташриф буюрган әлчиларга ҳам ўз масканларига жўнаб кетишга рухсат этилади.

Әлчиларни кузатиш маросими билан боғлиқ ишлар ниҳоясига етгач, Соҳибқирон Тошкент, Сайрам, Акпара, Янги (Авлиё Ота), Мўғилистон вилоятининг Хитой чегарасигача бўлган ҳукуматини амирзода жуванбаҳт Улугбек Кўрагон ибн Шоҳруҳ мирзога, Андижон, Ахсикат, Хўтан, Кошғар вилоятларининг ҳокимлигини эса амирзода Иброҳим Султон ибн Шоҳруҳ мирзога марҳамат ва мурувват қилганилигидан аркони давлат, беку бекот, амиру умаро, фозилу фузало, фақиру фуқарони хабардор қиласы.

Эндиғина ўн бир баҳорни қаршилаган ёш мирзолар Темурбекка ўzlарига кўрсатилган лутфу иноятлар учун чексиз миннатдорликлар билдириб, салтанат таҳт поясига мулозимлик қилишга тайёр эканликларини изҳор этиш билан бирга боболаридан инъон этилган юртларга жўнаб кетмасдан у кишининг музaffer лашкаргоҳида қолишга ижозат сўрайдилар.<sup>1</sup> Оз фурсатдан кейин Пир Мухаммад Тогайбуға, Шайх Баҳлул, Баён Темур Оқбўға, Муҳаммад Озод сингари номдор лашкарбoshiлар қўшинининг асосий кучларидан ташкил топган ўнг қўл — барангар қисмларини тўпланиш ўрни қилиб таъинланган Тошкентда жамлаш учун Сайрам, Шоҳруҳия ва ўзга вилоятларга илдам равона бўладилар.

Бибихоним мадрасасидан отланиб, Кўксаройга тушган Соҳибқирон ўзининг ноиби этиб белгиланган амир Бурундуққа сафарга отланаётган қўшинининг аниқ сонини олиш, сипоҳнинг қурол-ярог, озиқ-овқат, уст-бош, ем-хашак билан қай даражада таъминланганилигини аниқлаш, эҳтиёткорлик ва хавфсизлик чораларини кўриш каби вазифаларни юклайди.

<sup>2</sup> Қаранг: *Бартольд В. В. Улугбек и его время... с. 71.*

Ўз хиамат бурчини сидқидиллик билан ўташга киришган амир Бурундуқ Темурбекка Мовароунарх, Туркистон, Хоразм, Ўалх, Бадаҳшон, Хурросон, Мозандарон, Итил бўйи ерларидан йигилган икки юз минг кишилик отлиқ ва ииёда қўшиннинг Хитой сафарига шай турғанилиги ҳақида аҳборот беради...

Кези келганда қайд этиш лозимки, «Равзат ус-сафо» муаллифи Мирхонд темурий амирзода Султон Аҳмаддан Темурбек Кўрагон қўшиннинг адади, яъни сони битилган девонхона дафтарининг унинг қўлида эканлиги ва бу дафтарда Хитойга сафарга отланиш учун мўлжалланган икки юз етмиш икки минг олти юз ўн икки аскарга маош — улуфа берилганлиги ҳамда шу даврга келиб Соҳибқироқ армиясининг умумий сони саккиз юз минг суворий ва пиёдалардан иборат эканлиги ҳақида маълумот борлигини қайта-қайта эшитганлигини ёзади.<sup>1</sup>

Амир Бурундуқдан керакли аҳборотни олган Темурбек барангар — ўнг қанотга Ҳалил Султон ибн Мироншоҳ мирзо, Аҳмад ибн Умаршайх мирзоларни бош қилиб, уларга амир Худайдод Ҳусайнинӣ, амир Шамсуддин ибн Аббос баҳодир ва ўзга қўшун ва туман бекларини мулоzим қилиб Тонкент, Сайрам ва Шоҳруҳияни ўз аскарий қисмлари учун қишлоғ қилишларини буюради.

Сўл қанот — жувангар қўмондонлиги Султон Ҳусайн (Соҳибқирон қизиннинг ўғли) Мирзога топширилиб, мазкур қўшиннинг Ясси (ҳозирги Туркистон) ва Сабронга бориб, қишини ўша ерларда ўтказишига фармон қилинади. Самарқанд ҳукуматини вақтингчалик бошқариб туришни амир Аргуншоҳга, молия ишлари билан машғул бўлишни Шайх Чеҳрага ҳукм қилган Темурбек 1404 йилнинг 27 ноябринда қўшиннинг маркази — қўлга раҳбарлик қилиб, қўёнидек ёрқин байроқу ой кўринишли аламларни ҳилиннатиб, кўсу ногораларни уриб, Хитой томонга қараб йўлга чиқади ва Қорабулоқ мавзеида ором олини учун тўхтайди. Унбу мавзеда барпо этилган лашкаргоҳга теварак атрофдаги ерлардан аскарлар туругурух, фавж-фавик бўлиб келиб қўшилади. Бир оз муддатдан сўнг Қорабулогдан отланган қўшин анчагина масофа йўл босиб, Томонг мавзеига етнб келгач, ҳавонинг авзои бирдан бузилиб, еру осмонни зулмат қоплайди. Изгирин шамол эсиб, ҳавонинг ҳарорати кескин пасаяди. Аввал кучли ёмғир, сўнгра қалин қор ёғади.

<sup>1</sup> Қаранг: Мирхонд. Равзат ус-сафо... 214 а.

Қаттиқ совуқ шиддатидан аскарларнинг аъзойи-бадани титрайди, ёнаётган ғулханлар сўнади, оқиб турган кўлу — дарёлар музлайди, дараҳтларнинг шохлари оқ либосга бурканади, тепаликлардан сойлик ва жарликларга томон шарқираб оқаётган ирмоқу жилғалар яхлади, ҳайвонлар ўз тўқайзору уяларига яширинади. Борлиқ бу совуқ оғатидан қутулиш илинжида Аллоҳдан паноҳ ҳилайди. Совуқ даҳшатидан замин юзи сарғаяди, боғларнинг кўрку жамоли губорсимон тусга киради, майсазор ва чаманзорларнинг жисми сулиб, улардаги гўзаллик ва кўркамликтан нишон қолмайди.<sup>1</sup>

Соҳибқирон қўшини Туронзаминда шу вақтда қадар бўймаган жуда кучли совуқнинг хуружига эътибор бермай, от-увовларга ёпинчиқлар ёниб, аскарлар чакмону совутлар кийиб, юришда давом этади ва илгарироқ қишлоғ учун тайёрланган Оқсулотдаги бошпаналарда мақом тутади.

Оқсулотда Темурбек 28 кун давомида, яъни 1404 йилнинг 25 декабригача қолиб кетади. Бекларнинг, хосларнинг кўпчилигини қишини ўтказиш, отларни емлаш учун Тошкент жўнатади. Ўрдугоҳда амир Шайх Нуруддин, амир Шоҳмалиқ, амир Хожа Юсуфлардан бўлак саркардалар қолмайди.<sup>2</sup>

Қуёш жадий буржига кириши билан, яъни 1404 йилнинг 22 декабридан совуқнинг шиддати янада зўраяди. Ибн Арабшоҳнинг тасвирилашиба, агарда бирор киши нафас чиқарса, унинг нафаслари соқол ва мўйлови билан музлаб қолар, агар киши туфласа, туфуги ерга бориб етмай, яхлаган ўқ сингари ерга қадалар эди<sup>2</sup>.

Мана шундай оғир шароитга қарамай Соҳибқирон 25 декабр куни Оқсулотдан йўлга чиқади ва муз билан қопланган Сирдарёдан эсон-омон ўтиб, 1405 йилнинг 14 январида Ўтрорга етиб келади.

Ўтрор ҳокими Бердібекнинг уйига тушган Темурбек Ҳут ойининг ўртасида ҳаракатга келиши лозим бўлган барангар, кўкламнинг дастлабки кунларида юришга чиқишига тайёр турган жувангар ва ўзи раҳбарлик қилаётган марказ — қўл қисмлари босиб ўтиши мўлжалланган

<sup>1</sup> Қаранг: *Ибн Арабшоҳ. Ажойиб ал-мақтұр...* I китоб. 319 б.; *Мирхонд. Равзат ус-сафо...* 214 б.

<sup>2</sup> Қаранг: *Фасик Ҳавафи. Муджмал-и фасихи (fasikhov свод)*. Перевод, предисловие, примечания и указатели Д. Ю. Юсуповой. Ташкент, Фан, 1980. С. 125—126.

<sup>2</sup> Қаранг: *Ибн Арабшоҳ. Ажойиб ал-мақдур...* I китоб. 321 б.

йўлларнинг аҳволини билиш мақсадида Сайрам ва Кулон томонига киншиларини жўнатади. Борганилар у ерларга икки пайза бўйи қор туштаганлигини, қалин қор касратидан йўлларнинг, дараларнинг бутунлай бекилтганлигини матълум қиласидилар.

Шу аснода даштұ саҳроларда сарсону саргардон кеизиб юрган Тўхтамишхон ўзининг содиқ навкари Қораҳожани Ўтрорга Темурбек хузурига элчи этиб юборади.

Девонхонада Чингизий хонзодалар, темурий мирзо-лар, йирик саркардалар билан юриши бобида суҳбат қилиб ўтирган Соҳибқирон қабулига ташриф буюрган Қораҳожака Тўхтамишхоннинг Темурбек билан бўлган жангу жадалдан, сўнг кўп азоб-уқубат чекканлиги, душманлари таъқибидан қочиб, чўлу биёбонларда оч-ялангоч юрганлиги, энди Соҳибқирон гуноҳларидан кечиб, унга марҳамат кўрсатса, ортиқ итоат ва тобелик доирасидан ташқарига чиқмаслиги ҳақидаги тавба-тазарруга оид сўзларини баён этади.

Соҳибқирон элчига лутф кўрсатиб, Тангри таоло изн берса Хитой юришинидан кейин ўзаро уруш ва низолардан боши чиқмай қолган Дашиби Қипчоқ ва Жўми учусини гина — кудурат бўлганчидан мусаффо этиб, Тўхтамишга топширишга жазм қилганлигини хонга етказишни Қораҳожага тайинлади.

1404 йилининг 9 февралида Темурбекнинг соглиги тўватдан ёмонлашиб, иситмаси кўтарилиб кетади. Соҳибқироннинг хос табиби мавлоно Фазлуллоҳ томонидан беморни дарддан халос қилипи йўлида қўлидан келган барча илож ва муолажаларнинг қилинини ҳеч қандай натижа бермайди.

Қазо вақти етишаётганилигини сезган Темурбек иффатийни маликаларни, жуванбахт амирзодаларни, зафар ёр улуг амириларни ўзининг қонига ундан, уларга мулк ва миллат, дин ва давлат, қўшини ва риятни бошқаришда мавжуд қонун-қоидаларга риоя қилиш, адолат билан сиёsat юритиш, Она замини тупрогини ғаразли назардан кўз қорачигидай сақлани борасида бир неча сўзлар айтади.

Ўлимидан олдин Пир Муҳаммад ибн Жаҳонгир мурзони ўзининг валиахди — таҳт вориси этиб белгилаганлигини, шунинг сабабли қолган барча шаҳзодалару лашкарбонилар Пир Муҳаммаднинг таҳт меросхўри эканлигини таи олиб, унинг итоатларидан бўйин товламасликлари ҳақида қасам ичишларини талаб қиласиди.

1405 йилнинг 18 феврал куни шом билан ҳуфтоининг орасида Ҳазрат Соҳибқирон Темурбек Кўрагон бир неча бор калимаи тойибани такрор этиб, азиз жонини Яратганинг қўлига топширади<sup>1</sup>.

Соҳибқироннинг шамсий йил ҳисоби билан 70 ёшда тўсатдан вафот этиши Хитойга қилинган ҳарбий юриши давом эттириш ва уни ниҳоясига этишига имкон бермади.

---

<sup>1</sup> Қаранг: *Мирхонд*. Равзат уссафо... 217 б; Фасих Хавафи... б. 126; Якубовский А. Ю. Тимур... б. 73 ва ҳ.

## ХОТИМА ЎРИИДА

Атоқли саркарда, буюк давлат арбоби, истеъдодли ташкилотчи, ватанпарвар ва ҳалқиарвар инсон Темурбек Кўрагоннинг Туркистон ҳалқларини бирлаштириш, ижтимоий, сиёсий, иқтисодий, ҳарбий нуқтаи назардан кучли империя тузишдек ўта масъулиятли вазифани уддалаш борасида тинмай фаолият кўрсатганига салкам етти аср бўлди.

Бу йил, яъни, 1996 йили истиқлол нацидасини сурәттган эркесвар ҳалқимиз ўзининг улуғ ўглони Соҳибқирон Темурбек иби Тарагай таваллуд тоғган куннинг 660 йиллигини тантанали нишонлади.

Республика Вазирлар маҳқамасининг 1994 йил 23 дебрда қабул қилинган қарорида бу шонли сананинг Ватапнимизда кенг миқёсда нишонланиши алоҳида таъкидланади. Шунга мувофиқ «Амир Темур ва унинг дунё тарихида тутган ўрни» мавзуида ҳалқаро илмий анжуман ўтказиш, махсус ҳалқаро сайёҳ йўллари очиш, Соҳибқирон номи билан бевосита боғлиқ бўлган обидалар ва қадамжоларни таъмир этиш ва сайилгоҳларга айлантириш, жаҳонгирнинг ҳаётини ва фаолияти ҳақида асарлар нашр қилиш, бадиий, ҳужжатли фильмлар яратиш каби ишларни амалга ошириш зарурлиги қайд этилган.

Ушибу рисолада Темурбекка бутун жаҳон қўламида шуҳрат келтирган, номини Машриқдан Магрибга қадар достон қиласан асосий сифати, яъни саркардалик истеъодиди ҳақида юритилган мулоҳазалар Соҳибқирон ҳаёти ва фаолияти ҳақидаги кўпдан-кўн, тарихий-илмий асарларда келтирилган ҳужжатли материалларга асосланган.

Муаллиф мазкур мӯъжаз рисолада буюк ватандоши миз Темурбек Кўрагоннинг жаҳон ҳарб иши ва ҳарб санъатини ривожлантириш борасида олиб борган саъй-ҳаракатлари ҳақида маълум даражада китобхонларга маълумот беролса, беҳад мамнун бўлур эди.

## ЛУГАТ

- Адовий** — порох, дори  
**Адув** — ёв, ганим, душман  
**Алам** — байроқ, ялов  
**Амирул-умаро** — бош қўмондон  
**Аррода** — тош иргитувчи мослама, манжаниқ  
**Ахтачи** — сарой отбоқари  
**Бавурчи** — сарой ошпази, бакавул  
**Барангар** — қўшиннинг ўнг қаноти  
**Барангар ҳиравули** — ўнг қўл, ўнг қанот авангарди  
**Бекларбеги** — бош қўмондон, амирул — умаро  
**Боргоҳ** — ҳукмдор чодири; ҳукмдор қабулхонаси  
**Бору** — қалъа девори  
**Будал** — қисмларнинг жойлашиш ўрни, позиция  
**Бурж** — қалъа деворининг чўққиси, минора; шаҳар деворининг бурилиш жойларига қурилган ва соқчилар турадиган қоровулхона  
**Бурқа** — яккама-якка олишув чорида паҳлавонлар юзига тутиладиган симли ниқоб  
**Бўлжар** — ҳарбий қисмларнинг йигилиш ўрни, қўшин тўпланиш учун белгиланган жой  
**Бўлук** — полк  
**Гузар (гоҳ)** — кечув, кечик  
**Дафтардор** — кирим-чиқим, ҳисоб-китоб ишлари билан шуғулланувчи  
**Доруга** — шаҳар, қалъа, қўрғон бошлиғи  
**Дору** — порох, дори  
**Дорухона** — тўпнинг порох солинадиган қисми  
**Еги** — ёв, душман, ганим

**Жиба** — совут  
**Жибахона** — ислаҳиҳона, қурол-яроғомбори  
**Жидол** — жанг, саваш, уруш  
**Жувангар** — қўшишининг чап қаноти, сўл қўл  
**Жувангар** ҳиравули — чап қанот (қўл) авангарди, илғор қисми  
**Ички** — сарой мулозими  
**Каманд** — ҳалқа, сиртмоқ; арқон  
**Кежим** — жанговар от ёпинчиги  
**Куран** — аравалар ёрдамида доира шаклида қурилган лашкаргоҳ,  
лагер  
**Кўрага** — ногора  
**Кўс** — довул, катта ногора  
**Манжаниқ** — тош отиши қуроли, катапулта  
**Манглай** — илғор қисм, авангард  
**Масоф** — жанг, саваш  
**Машвараш** — ҳарбий кенгаш  
**Маърака** — жанг, уруш  
**Маъракагоҳ** — жанггоҳ, жанг майдони  
**Мингбеги** — минг жангчидан иборат қисм қўмондони  
**Минглик** — минг аскардан иборат ҳарбий қисм  
**Миод вақти** — ваъда вақти, келишилган вақт  
**Мубориз** — баҳодир, паҳлавон  
**Мужда** — хабар  
**Мунший** — девонхона котиби  
**Мурчил** — қисмларнинг жанговар сафар тартиби  
**Муқотала** — жанг; уруш  
**Муҳосара** — қуршов, қамал  
**Мўнду** — ўтқир тиғли (учли) санчиқ  
**Найзавар** — найзадор  
**Нақб** — ер ости йўли  
**Нақбкан** — ер ости йўли, яъни нақб қазувчи  
**Новакандоз** — ўқ — ёйчи  
**Пешкаш** — совға, тортиқ  
**Раъд** — тўн, замбарак  
**Раъдандоз** — тўнчи, раъд тўни отувчи  
**Сангандов** — тош отувчи

**Саркўб** — қалъа, қўргон деворлари ёнида сунъий равишда ҳосил қилинган тупроқ уюми

**Саропарда** — ҳукмдор чодири, ҳаймаси

**Сонсиз** — Темурбекнинг шахсий гвардияси

**Сирчи** — шиша ясовчи уста

**Суюргал** — зодагонларга маълум шарт ва имтиёзлар асосида бериладиган ер-мулк

**Табарзин** — ойболта

**Табл** — довул, ногора

**Тавачи** — ҳукмдорнинг фармонини қисмларга етказувчи амалдор, адъютант

**Талоя** — туғи соқчи гуруҳ

**Тахшандоз** — тахш (арбалет) отувчи

**Тиркам** — ўқдан

**Туман** — 10 минг кишилик ҳарбий қисм, дивизия

**Туманбеги** — туман қўмонидони, генерал

**Тунқал** — қўшиннинг белгиланган (миод ери) жойга тўпланиш тўғрисидаги олий бош қўмондон буйруги

**Тура** — одам бўйига тенг қалқон

**Тўқиши** — жанг, саваш

**Улуфа** — аскарлар маоши

**Фавж** — гуруҳ, отряд

**Фатила** — пилик, ўт пилиги

**Хабаргир** — айғоқчи, жосус, разведкачи

**Худ** — баҳодирлар дубулғаси

**Чанавул** — қўшин сўл қанотининг бир бўлаги

**Чапар** — ҳандаклар гирдига ўрнатилган четан

**Чарга** — ов, широк

**Чагдавул** — қўшиннинг аръергарди

**Чаҳоройна** — совут, зириҳ

**Черик** — қўшин, лашкар

**Шабихун** — тунги хужум

**Шақавул** — қўшин ўнг қанотининг бир бўлаги

**Шиба** — қалин ўқ ёмғири; қалин ўқ ёғдириш

**Юзбеги** — юз кишидан иборат қисм сардори

**Юзлик** — юз кишидан ташкил этилган ҳарбий бўлинма

**Язак** — кундузги соқчи отлик гуруҳ

**Ясавул** — амалдорни қузатиб борувчи, соқчи, қўриқчи  
**Ясол** — жанговар тартиб, саф  
**Ясоқ** — жазо, ўлим жазоси  
**Үнбеги** — ўн кишидац иборат бўлим сардори  
**Үнлик** — ўн кишидан иборат ҳарбий бўлим  
**Урон** — парол  
**Үрдугоҳ** — лашкаргоҳ, лагер  
**Үгруқ** — қўшин ортидан келувчи кўч-кўрон, обоз  
**Қажарчи** — йўлбошловчи, йўл қўрсатувчи  
**Қамурга** — ов қилинадиган жой, шикоргоҳ  
**Қаравул** — асосий кучлардан анча илгари юрувчи разведкачи су-  
ворий гурух, аванпост  
**Қишлоқ** — қиплов учун мўликалланган жой  
**Қозон** — тўп, замбарак  
**Қорураандоз** — ичига ёнувчи модда — нафт солинган шипса ирги-  
тувчи  
**Қувгуинчи** — таъқиб этувчи, қувувчи  
**Қунбул** — қўшин қанотларини ҳимоя қилувчи қисм  
**Қулавуз** — йўлбошловчи, йўл қўрсатувчи  
**Қўл** — қўшин маркази  
**Қўшун** — ҳарбий қисм  
**Ғул** — қўшин маркази  
**Ҳарб** — уруш; жанг  
**Ҳиравул** — илгор қисм, авангард

## **МУНДАРИЖА**

|   |    |
|---|----|
| Буюк саркарда . . . . .                   | 3  |
| Истеъоднинг сайқал топиши . . . . .       | 6  |
| Қарор қатъий, шикоятга ўрин йўқ . . . . . | 41 |
| Тўфон . . . . .                           | 50 |
| Ҳиндистон фатҳи . . . . .                 | 59 |
| Яшиннинг сўниши . . . . .                 | 71 |
| Якунламаган юриш . . . . .                | 82 |
| Хотима ўрнида . . . . .                   | 89 |
| Лугат . . . . .                           | 90 |

*Адабий-бадиий нашр*  
**Ҳамидулла Дадабоев**  
**АМИР ТЕМУРНИНГ ҲАРБИЙ МАҲОРАТИ**

*Муҳаррир. Екыт Раҳимова  
Мусаввир Юлай Габзалилов  
Расмлар муҳаррири Ю. Габзалилов  
Техник муҳаррир. Ульяна Ким  
Мусаҳҳих Моҳира Аҳмаджон қизи*

Босмахонага берилди 1.2.96. Босишга рухсат этилди 8.04.96. Ўлчами  
 $84 \times 108 \frac{1}{32}$ . Рӯзнома қофози. Адабий гарнитура. Юқори босма.  
Шартли босма табоги 3,0. Шашр табоги 5,14. Нусхаси 10000. Буюрт-  
ма 8045. Баҳоси шартнома асосида.

«Езувчи» нашриёти, 700129. Тошкент, Навоий кўчаси, 30.

Ўзбекистон Республикаси Давлат матбуот Кўмитаси ижарадаги  
Тошкент полиграф комбинатида босилди. Тошкент, Навоий  
кўчаси, 30.

**Дадабоев, Ҳамидулла.**  
Д 15 Амир Темурнинг ҳарбий маҳорати / Масъул  
муҳаррир А. Қаюмов.— Т.: Ёзувчи, 1996.— 96 б.

Ушбу рисолада Темурбекнинг жаҳоншумул обрў-эътибор ва шон-шуҳрат топишида бои омил ҳисобланган жиҳат, яъни сар-кардалик истеъоди, ҳарбий маҳорати, жаҳон ҳарб санъати риво-жига қўшган улкан ҳиссаси, у тузган армиянинг таркибий тузилиши, тактикаси ва стратегияси хусусида тарихий-илмий асарларда қайд этилган аниқ маълумотларга таянган ҳолда фикр юритилади.  
Рисола илмий жамоатчилик вакиллари, умуман, маданий ме-росимиз ва тарихимиз мухлисларига бағишлиланган.

**ББК 63.3(5У)**